

للحب كلمة

بقلم: نهى محمد

غاليه ومشو علي الظلظ يركبو المواصلات ... هنا لبست ساره عبايتها وبقت تتسحب عشان تمرق بس الحبويه قاعده ليها زي شوكة الحوت رجعت الصاله وطلعت تلفونها عشان تتصل

....

😊😊 بيت العروس 😊😊

لبنى افهميني عليك الله ... افهم شنو يا خالد انا مع اهلك مستحيل اسكن انت وعدتني انو ح يكون عندي بيت برأي ... يا لبنى انتي عارفه ظروفني نسكن مؤقتا عند ناس امي وبعدها ربك بدبرها وقعد يحاول معاها لحد ما اقتعها ... قامت الحبويه تدخل الحمام وهنا ساره انتهزت الفرصه وجرت علي الباب فتحتة وطلعت تجري لمن نفسها قام السرہ طلعت من الحمام لقت الباب مفتوح وووووب علي البت خلنتي دخلت الحمام وجرت طلعت تطلع روحك يا ساره السجم هسي أقول لي امها شنو الله لا كسبك يا ساره دخلت عليها جارتهم تهاني صحبه بتها وهي بتضحك مالك يا حجه بتكوركي صوتك سمعتو وانا في بيتنا ... مخير الله وطبعاً اول ما سمعتي صوتي جبتي جاريه تتشمشري يا شمشاره ما اليوم كله حايمه من بيت لي بيت ومن جنبه لي جنبه تلقطي الاخبار بقيتي زي ناس الدار ههههه حرام عليك يا خالتي انا اصلا كنت جايه عليكم الانبويه قطعت و قلت لحد ما يجي راجلي يعيبيها اجي اعمل الشاي حق المغرب راسي واجعني ... وطبعاً جايه تعملي شايك هنا الغاز دا ما غالي وكمان معدوم وأبشرك الانبويه حقتنا فاضيه امشي ولعي فحم في بيتكم واعملي الشاي وناوليني كبايه بالجد يا حجه غازكم قاطع ... شوف المره يعني انا بكذب عليك ... لا والله حاشاك بس مافي مشكله بولع لي فحم واكيد عندكم ... يا بت ما تمشي بيتك تولعي فحمك ... وسابتها تهاني بتتكلم ومشت علي المطبخ عشان تشوف ليها فحم الحجه نهاي ما عجبها التصرف وقالت انشاءالله ما تلقي حته فحم وهنا جاها صوت تهاني وهي بتقول خلاص يا خالتي لقيت الهيتر مافي داعي للفحم ... وب علي الكهرباء ان شاءالله كهرباء تطقك يا بعيده بتقولني حاجه يا خالتي يخلخل ضروسك ويطول شطورك وتهاني سامعه وميته ضحك اي ام محاسن كلامها كدا بس قلبها طيب وقعدت حجه السرہ تفرك في يدها يا خالتي اعمل ليك معاي كبايه ... شاي احمر ولا باللبن ... باللبن طبعاً ... بس خساره لبنا انتهي ... مافي مشكله انا جايبه معاي شويه لبن ... وجايبه السكر معاك كمان اي جايبه اه أعمل ليك احمر ولا باللبن وقت جايبه حاجاتك اعملي لي بس بالكبايه الكبيره وكترني اللبن والسكر حاضر يا خالتي يحضر ليك شيطان يلفحك قولي امين بتقولني حاجه لا بقول ليك تحضري ما تغيبني يا بتي وشويه وطلعت تهاني بالصينيه وجرت ليها بنبر وختت الشاي جنب حجه السرہ اتناولت السرہ كبايه الشاي وشفطت ليها شفته اه مضبوط ... مضبوط يختي يلا كدا ادينا شمار الحله وب علي يا خالتي ما شفطي سعاد عاد والخير الجاها سعاد وخير كمان الجملة ما جايه ابداء الحجه مثقفه طبعاً وعامله نفسها مشخصاتيه ... قالو جاها عريس لي بتها وجاب الخير كله ... عريس ودا حصل متين الما سمعنا لبنا زغروده ولا شفنا لبنا حلاوه بتتقسم ما قالو مكتمين علي الموضوع خايفين من العين ...

وقت مكتمين علي الخبر انتي يا نشره تسعه عرفتي كيف انتي ناسيه يا خالتي السره
سعاد قريبتني من بعيد عارفين يا ستي حسستيني انك قريبه الوزير اه كملتي العريس
قريبكم يعني لالا لالا دا غريب ومغرب في لندن ... لندن عديل كدا والله ولقتها بتها
العورا... يا خالتي البت ما عورا عندها حور في عينها بس وكمان سمحه وصغيره بس ما
قلتي لي وين محاسن محاسن مشت مع بنتها عشان الشغل ... الله يوفقها ويديها عريس
زي عريس بت سعاد يريحها ... امين يختي



ساره تعالي نطلع فوق عاوزه اوريك ... شي لالا انا اتاخرت انا بس جيت أرجع ليكي
الروايه واشيل وحده تانيه ياخ تعالي ما بأخرك ... طيب أرح وطلعو السطوح وهناك ...
مشت علي ركن في السطوح وزحت السرير ودنقرت رفعت حاجه من الارض ... دا شنو ...
ههههه دي هديه جابها لي ... حبيبي ... الله حلوه بس انتي ما كنتي تختيها في دولابك ما
خايفه انها تضيع وانتي ختاها هنا ... لالا لالا ما بقدر اختها جوا ما انتي عارفه. اختي بتجي
تفتش لي في الدولاب وخفت انها تشوفها وتكلم ابوي ... طيب اديني ليها ادسها ليك عندي ...
والله فكره بس انتبهي عليها دي دهب ... يختي بنتبه بنتبه ... ومسكت الخاتم تعالين ليهو
وهي عينها عاوزه تطلع عليه ... وهي من زمان نفسها تشوف حبيبها دا لكن صحبتها ما
عاوزه تعرفها عليه ... ونزلت ساره من فوق ومشت علي الباب وهي عاوزه تطلع ... تلقي
ليك اخو صحبتها داخل سلم عليها وهو اصلا كان معجب بيها شديد بس هي ما جاييه
ليهو خبر كان طموحها اكبر من انو تحب واحد وتعرسه ويسكنها في نفس الحله طلعت ساره
ومشت علي البيت واول ما وصلت تلقي ليك الحبويه وتهاني قاعدين واول ما لمحتها
الحبويه صرخت فيها وقالت ليها انتي يكسر ركبك ان شاءالله يا بتاعه الشوارع يا صايعه
مشيتي وين ... يا حبويه مالك بتدعي علي انا مشيت لي هناع صحبتي ودبت ليها كتاب ...
يكتبك فكي قولني امين ... اجي يا حبويه فكي عديل كدا اعوز بالله ... الله يكسرك قولني امين
وقامت بعكازها عليها وساره فكت الجريه وتهاني تمسك فيها والحبويه حالفه تضربها ... يا
خالتي استهدي بالله انتي عندك السكر احسن ما يرتفع عليك ... السكر اليجيها البت بقت
طوالي حايمه في الشوارع اتقول عاديتيها انتي ... لا حولا ولا قوة الا بالله ليه هي الحوامه
نزله عشان تتعادي كدا اقعدني واهدي وهنا جات داخله محاسن براها ... في شنو مالك يمه
بتكوركي ... بتك يختي خلنتي دخلت الحمام وجرت مرقت ... خليها لمن يجي اخوها يادبها ...
اه وأنتو عملتو شنو ووين سماح ... سماح الحمدلله الدكتور وافق واستلمت الشغل كمان ...
الحمدلله يا محاسن مبروك ... تهاني ما سلمت عليك مع كوراك امي ازيك اهلاً محاسن ...
اه المرتب كم ... نطت الحبويه وقالت ليها ٧٠٠ جنيه بس ابتسمت محاسن وعرفت انه
امها ما عاوزها تقول ليها ... ٧٠٠ بس بسيطه والله نعمل شنو يمكن لقدام يزيدا ...
الله يوفقها ... امين وسماح مبسوطه بشغلها وخاصه انه المرتب حلو ومغري ... بس
الساعه حداشر تخلص وكيف ترجع وهنا جات داخله عليها بت سنها تقريبا في الثلاثين

وسلمت عليها وقالت ليها اخيرا الدكتور لقي موظفه علي فكره انا رشا شغاله في العياده الجنبكم مع دكتوراه إقبال للنساء والتوليد انتي منو ... انا سماح ... عاشت الأسامي يا عسل وقعدت جنبها وقالت ليها انتي ساكنه وين ... في الصحافه ... طيب حلو جنبنا ... انتي ساكنه في الصحافه ... لا انا في الامتداد الدرجه الثالثه انتي طولتي في الشغل ... اي لي كم سنه ... طيب كويس ... ان شاء الله تنبسطي في الشغل ... ان شاء الله بس المشكله في مواعيد الطلوع ... اي صح الساعه حداثر متاخر بس نعمل شنو اكل العيش مر علي قول المصريين ... انتي بترجعي بالمواصلات ... لا لالا موصلات شنو بالليل دا نحنا ماجرين لينا امجاد انا ومعاي بت تانيه لو حابه ممكن تشتركي معانا ... والله كويس بس ما يكون الايجار غالي عشان ظروفنا ما بتسمح واتعدلت رشا في قعدتها وقالت ليها عايني حبيبتني الزول حق الامجاد زول طيب وغير كدا البت المعاي ساكنه في الصحافه ودا من حظك يعني ما ح تدفعي كتير لانه المشوار واحد وانا بكلمه ليم ... طيب الحمد لله الله عالم بحالتي ... يلا خلاص أخليك تشتغلي وبعدين بجي بسوقك معاي لمن تجي الامجاد وشكرتها سماح ومشت ارتاحت سماح عشان موضوع الرجعه اتحل وبدت في شغلها وبدت تدخل المرضي لدكتور وتنظم المواعيد بعد ما خلصت والدكتور طلع دخلت نضفت العياده وقفلتها وشالت شنتطتها وجات مارقه لقت رشا ومعاهما وحده عرفتهم علي بعض وطلعو طوالي وقفت رشا مع حق الامجاد واتفقت معاه علي سماح وهو وافق علي طول وخاصة انه المشوار ح يبقي واحد ورعاها في الايجار وركبت معاهم ومشو نزلو رشا في الامتداد وبعدها هي وهاله مشو وطلع بيت هاله قبل بيت سماح بي اربعة شوارع وبقت سماح براها في الامجاد وأتحرك بيها وصفت ليهو البيت ومشي وصلها ونزلت وقال ليها علي مواعيد المشيه في العصر وشكرته ودخلت البيت لقت الام وأخوها وحبوبتها قاعدين منتظرين واول ما شافتها الام حمدت ربه ان بتها رجعت كويسه وبقت سماح تحكي ليهم عن الشغل وكانت مبسوطه وحكت ليهم عن رشا والامجاد ... والله دي دعوه امك الله يجازيها بالخير رشا دي اي والله يا حبوبه كنت شايله هم علي الرجعه ... ليه يا سماح تشتغلي انا مقصر معاكم يعني ... لا يا اخوي والله انت ما مقصر بس انت داخل علي عرس لازم نساعد بعض ... اظمن يا خالد انا مشيت معاهما قبيل والدكتور باين ليهو عليا ولد حلال والمرتب كبير أهو نتساعد مع بعض انت احكي لي خطيبتك وافقت علي سكنتها معانا ... شنو وهي ترفض لشنو هي وين تلقي بيت زي دا وناس زينا خلياها بس ترفض والله بكره اشوف ليهو عروس تانيه الحق حبوبتك دي ح تكون سبب في خراب بيتك قبل ما تدخل ... قلتي شنو يا مفعوصه لالا لا ما قلت اي حاجه وغيرت الموضوع طوالي وقالت لي امها اه تعشيتو ولا لسه ... لا يا بتي كنا منتظرينك هسي بختو ... خلاص انا بغير هدومي وبجي بساعدك لا يا سماح انتي جايه من الشغل وتعبانه نادي الست الراقده جوا تساعدني مشت سماح عشان تغير وهنا تدخل علي اختها اول شي ساره قومي ختي العشاء مع امي انا تعبانه ما قادره ... تعبانه في شنو الجامعه وأجازته واليوم كله من التلفزيون لي التلفون ... اه خلاص سليلتي لسناك عشان اشتغلتي وح تصرفي ... ساره كيف بنفكري فيني كدا يعني لمن أقول ليك قومي ختي العشاء معناه اني عشان اشتغلتي بقيت اعمل كدا اوف خلاص قايمه وقامت وهي بتتقنق ومشت المطبخ ولقت امها بتتظبط الفول فتحت التلاجه وطلعت البيض وبقت تعمل فيهو جاء خالد وقال امي عليك الله اعلمي لي سلطه دكوه بالطماطم ... طيب يا ولدي ومشي خالد ياخذ ليهو حمام لحد ما يعملو العشاء ولقي

المويه قاطعه وبقي ينادي يااااا ساره ياااا ساره افتحي كدا الموتور المويه مافي ... اوف
اوف اوف مافي غير ساره في البيت دا ومشت فتحت الموتور وجات تكمل باقي العشاء

وطلع خالد من الحمام وهو بنقنق ويقول يعني قصه المويه دي ما ح تنتهي بالجد حاجه تحرق
الدم ومشى قعد معاهم والعشاء كله سماح تحكي ليهم عن العياده والشغل وبعد ما خلصو كل
واحد مشى علي سريره

..... وفي صباح يوم الجمعه الكل نايم وفجاه الباب بقي يدق بصورة مزعجه الكل قام مخلوع
وجرا خالد علي الباب واول ما فتح الباب يلقي ليك شاب وسيم واقف شكلو جاي من السفر
ودا من الشنطه الكانت معاه ... استغرب خالد وخاصه انه ما يعرفه بس سلم عليه وقال خير
يا اخوي عاوز منو ابتسم الشاب وقال ليهو دا بيت حسن عابدين ... هز خالد رأسه وقال
ليهو ابوه بس انت منو ... ابتسم الشاب مره ثانيه وقال ليهو انا حسام محمد عابدين ولد
عمك ... ولد عمي محمد وكان عمو محمد دا بسمعو بيهو سمع ساي من ابوهم الله يرحمه
وانه عايش في لندن من زمان وليهو اكثر من خمسه وعشرين سنه ما رجع السودان أخذه
خالد بالاحضان وقال ليهو مرحب بولد العم انا خالد ولد عمك حسن سلم عليه حسام وهنا
يسمع صوت امه بتقول دا منو يا خالد ... رفع الشنطه خالد وقال ليهو اتفضل وشويه كان في
وسط الحوش وحولينهو الحبويه والام والبنات الكل بقي يعين لتاني وفي عيونهم الف سؤال
دا منو الجاي بشنطتو من وش الصبح ابتسم خالد بعد ما عرف من نظراتهم انهم عاوزين
يعرفو دا منو قال ليهو يا جماعه دا حسام ولد عمي محمد ... ابتسمت محاسن ومشت عليه
تسلم اهلاً ياولدي. حمدلله علي السلامه ... الله يسلمك خالتو ... وسلم علي الكل ودخلو جوا
وقعد وسطهم وهنا السره بدون مقدمات بقت تسأل فيهو وقالت ليهو شنو الجابك السودان
بعد الغيبه دي كلها وعرفت دربنا كيفن ... والله الحاج دايمه كان بحكي لينا عن السودان وعنا
بيت جدي وانا من زمان نفسي ارجع بس الوالد ما كان راضي وكيفن رضا هسي
الحاج اتوفي الله يرحمه ... لا حولا ولا قوه الا بالله البركه فيك يا ولدي والكل عز حسام. وقال
حسام وانا لمن لقيت نفسي بقيت برأي قلت اجي اشوف اهلي وأكون وسطهم ... مسكه خالد
من يده وقال ليهو اهلاً بيك بين اهلك ونورت بيت جدك ... الله ينور عليك يا خالد وبقي
يعرف خالد حسام علي أخواته وقال ليهو دي سماح ودي ساره بنات عمك ... اهلاً بيكم
ابتسمت سماح بخجل وحست بي احساس جميل اتجاه اما ساره فرحت بولد العم الظهر فجاءه
وخاصه انه مززززز وجاي من لندن وقامو علي المطبخ يجهزو الفطور لولد العم
ومحاسن مبسوطة بي حسام خاصه انه يتيم ومن اهل راجلها وكيف كانت بتسمع راجلها وهو
بتمني يشوف اخوه بس مات وما لحق يشوفو بس ياربي امه وين ومالها ما جات معاه اصلها
من يومها شايفه نفسها وياربي ليه حسام ما نزل عند اهل امه خاصه وهم ناس مروقيين.

بس يا خبر اليوم بقروش بكره يبقي ببلاش ... وحسام وخالد داقين الونسه وشكلهم انسجمو
مع بعض وحسام بحكي ليهو كيف وصل ليهم هو كان عارف الحله ومربع كم بس البيت وين
ما كان بعرفو وكيف بدا يسال لحد ما وصل ليهم

محاسن الولد دا ح يقعد معنا ولا كيف ... ما عارفه يا يمه كدا بعدين نستفسر من خالد وحتى لو عاوز يقعد مالو ما يقعد اوضه ابوه وصالته في الحوش الثاني مقولين بخلي البنات يفتحوهم وينضفوهم ليهو وخالد بعد ما فطرو طلع هو ولد عمو وخالد كان مبسوط بجيه ولد عمه خاصه انو من يومه عايش براه لا صاحب ولا اخ ما صدق شاف حسام كان عاوز يعوض الفاتو مع ولد عمه وحسام مبسوط اي هو عنده اصحاب قدر شعر رأسه بس نهاي ما يكونو زي الأهل وخالد إنسان طيب شديد ... وأتلفت حسام لي خالد الكان قاعد بشرب في قهوته في المكان المتعود يشربها فيهو ... وقال ليهو اسمع يا خالد ... خير يا ولد عمي ... عاوز لي شقه أتلفت عليهو خالد وهو مضايق وطوالي خت الكاسه في الطربيزه وقال ليهو شقه لشنو يا حسام انت مَش قلت جاي عشان تقعد بين اهلك ... طبعا طبعا يا خالد بس انت ما فهمتني انا كان علي السكنه عندي شقه امي البناها ليها ابوي في عماره جدي بس انا ما عاوزها للسكنه انا عاوزها لشغل خلعتني ياخي قلت في بالي انو يمكن عملنا ليك حاجه تزعلك ... لا ياخ انتو ما قصرتمو وكفايه استقبالكم لي ... انت تستاهل يا ولد العم مرحب بيك بس انت عاوز تشتغل شنو يعني وانت دارس شنو اصلا ههههه صاح انت ما بتعرف اسمع يا سيدي انا دكتور أسنان وعاوز شقه اعملها عياده متخصصه وغير كدا عندي صاحبي دكتور نساء وتوليد ح يكون معاي انا قلت اشوف الموقع عشان اجهزو و هو بعدين يرسل ليانا كل الحاجات البنحاجها للعياده ...مشاءالله والله دي حاجه تشرف انا ولد عمي دكتور يلا يا دكتور انا عندي شقه بتنفع للقلت عليهو دا وجنب شغلي طيب يلا بينا ومشي حسام مع خالد وشاف الشقه وعجبته شديد بس المشكله وين في صاحبها إنسان ثقيل وكريه علي حد وصف الزول الفاتح الدكان في نفس العماره ياخ قول كلام غير كدا اي والله راجل حق مشاكل شفت قبل الشهر يكمل تلقاه واقف ليك هنا رد حسام وقال ليهو لالا لا من اللناحيه دي اظمن انا ما عندي مشكله في الدفع وخاصه انه الشقه تستاهل وموقعها حلو ... وهم بتكلمو وفجاه صاحب الدكان قال لو كْنَا جينا سيره مليون جنيه ما كان احسن أتلفت حسام وخالد علي نفس الاتجاه الكان بعين فيهو صاحب الدكان وشافو ليك عربيه فخمه مظهره جايه عليهم حسام ما اشتغل كتير بيهو بس صاحب العربيه شافو وفرح بيهو ورجع يعاين لي للعماره ... نزل صاحب العربيه وهو بضحك ومبسوط وجاي عليهم ولمن شافو صاحب الدكان انخلع معقول الراجل دا بعرف يضحك وفجاءه جاء الراجل وخت يده في كتف حسام أتلفت حسام علي الزول الخت يده فيهو واول ما شافه صرخ وقال خالي واخده بعض بالاحضان وبعد السلام الحار ولسه الخال ماسك ليهو يده وهو بقول امك قالت انك جاي بس ما ورتنا بيوم جيتك وجيت متين ووكيف ما بتنزل في بيت جدك سيد الدكان وكأنو صبت فيهو مطره الراجل طلع خاله الولد وووووب علي لساني العاوز قطعو كان في داعي للكلام القلتو وعرف حسام خاله علي خالد أتلفت الخال وقال لي صاحب الدكان جيب ليانا كراسي

خال مافي داعي لي دا كله والله خجلتوني بتعاملكم دا...يا ولد انا خالك وغير كدا انا زعلان
عشان انت ما ح تفعد معنا وقلت البيوت وحده وكمان ما عاوز تشيل العربية دي ح تكون
زعله كبيره....رد خالد وقال ليهو كلام خالك صاح والخال والد. شيل المفتاح وما تزعلو...
ربت الخال علي كتف خالد وقال ليهو الله يكملك بعقلك يا ولدي بس خليني اسالك ان شفتك
وين قبل كدا.... ابتسم خالد وقال ليهو بتكون شفتي جنب الدكان ألفي عمارتك لاني شغال
جنب عمارتك...بالله وانا أقول شفتك وين صحي الدنيا دي ضيقه.... ووودعهم وركب خالد
جنب حسام ومشى حسام علي وصف خالد لحد ما قربو علي البيت وبهناك القلق دب في
محاسن علي ولدها وخاصة انه نسي تلفونه في البيت وخطيبته ما بطلت اتصالات علي حسب
كلامها انه متفق معاها يمشو يشوفو غرفه النوم.... واول ما وقفت العربية كانت ساره واقفه
في السطوح واول ما لمحت العربية اتخلعت دا منو السائق العربية ووقفو جنب بيتنا وب علي
يمكن يكون جايني عريس.... وفي خطوتين نزلت السلام وجرت علي الباب وتفتحو تلقى
ليك حسام نازل من العربية ومعاها خالد اخوها وووب علي دا ولد عمي المزه وبقت تسألهم
دي شنو العربية الخطيره دي وب علي ما تقول حقتك يا سحس...ابتسم حسام ليها وانبس
شديد منها خاصة انه حسي انها بتعامل معاها كأنها بتعرفو ليها سنين رد عليها وقال لا يا
ساره ما حقتي دي حقت خالي بس طالما عجبك كدا بكرا بجيب ليك وحده زيها انا عندي كم
بت عم.... ضحك خالد وقال ليهو ما تهزر معاها احسن دي لصقه ح تصدق كلامك وح
تجننك... جات محاسن مارقه عليهم... دا شنو التأخير من الفطور تطلعو ما ترجعو الا هسي
العشاء قرب يأذن.... دي قصه طويله يا امي خلينا ندخل وبحكيها ليكم وبعد ما دخلو جرت
ساره تعمل ليهو الشاي باللبن المظبوط وقعد خالد يحكي لي امه ودخل حسام الحمام ياخذ
ليهو حمام كارب.....سماح كانت مع بت جيرانهم بتحكي ليها عن ولد العم الظهر فجاءه
وكيف انه دخل قلبها وحست انها بتحبه حتي قبل ما تشوفه وكأنها كانت داسه كل مشاعرها
ليهو هو بس لان من يومها ما عندها علاقات ولا زي البنات البحبو وبطلعو مع حبايبهم....
ومع كل المشاعر المكبوتة دي واول ما شأفته كأنها شافت فارس أحلامها الكانت بتتخيل انه
ح يجيها علي حصانه الأبيض ياخذها اي هي عمرها قرب علي الثلاثين وكل ألفي سنه عرس
بس هي كانت منتظره الفارس المجهول واخيرا الفارس ظهر....

قعدت قعدتها مع صحبتها وبعدها رجعت البيت وتشوف العربية الكبيره الكانت واقفه جنب
الباب ياربي دا منو العندنا ودخلت تتسحب لقت ولد عمها وأخوها وساره محكره وقاعده جنب
حسام وبتوريهو أليوم الصور وهو شكله مبسوط وهو بتفرج علي صور ابوه وجده وعمه
وقفت سماح حست بطعنه في قلبها بس في شنو يا سماح الولد يادوب رجوع وما وعدك بشي
مالك انتي موجوعه كدا هزت رأسها وطلعت الأفكار دي من رأسها وقررت تمشي عليهم
وتثبت وجودها وقفت سلمت عليهو وقفت منتظره يعاين ليها بس رد عليها السلام وهو بعين
في الصور وهنا ساره بقت تحكي ليهو عن الدرامات الكان بعملها ابوه وابوها والكانت
بتسمعها من جدّهم الله يرحمه وهو يضحك ومبسوط بطريقه كلامها وسردها للذكريات الجميله
..... حست سماح انه وجودها وعدمه واحد سحبت نفسها ومشت جوا عند امها المطبخ
وسألته اذا كان حبوبه ح ترجع من ببت خالتها ولا ح تبنت...خالتك اتصلت وقالت انهم

وووووواي انا منها عربيه تهوس وهنا ضحك حسام اول ما شاف صاحب العربيه الظاهر انه
بعرفه نزلت ساره ومشيت مع حسام علي اتجاه العربيه الكان صاحبها نزل منها ومعاه
بنوته كانت مشغوله بتلفونها بتتكلم واول ما شاف حسام بقي يسلم عليه بالاحضان ويقول
ليهو ولد عمتي بقي يعرف شارع واحد واربعين وكمان جايب معاه مزه ضربه حسام في كتفه
وقال ليهو اسكت ياخ دي بت عمي ساره ساره دا ولد خالي نزار

ما كانت هنا المصبيه المصبيه هي البت الكانت مع نزار ولد خالو لحسام 🤪🤪🤪

ابتسمت ساره بخبث وهي بتسلم علي هناع الكانت مصدومه اول ما شافت ساره وهي بتسلم عليها قالت ليها سبحان الله دستيهو مني وطلع ولد خالو لولد عمتي ههههههههه انغاضت هناع بس ما حاولت تظهر غيظها لي ساره واستغربت في الصدفة الغريبه دي اي انا كنت ما عاوزة وحده من صحباتي يعرفو حبيبي وخاصه ساره والبوجع انها اول وحده من صحباتي تشوفو كمان والله غريبه ... قالت هناع كلمه غريبه بدون ما تحس بصوت مسموع اتلفتت عليها ساره وهي بتقول صحي الدنيا دي غريبه وغمزتها بعينها وقالت بس الشباب فيها مززززز هههههههههه انتي مالك يعني زعلانه دا كله عشان شفت حبيبيك يعني انا لالا لالا منو القال ليك اني زعلانه بس بقول صدفة غريبه وتعالى هنا انتي ما برضو دسيتي علي حبيبيك دسيت شنو يختي انا واضحه زي الشمس اولاد ما حبيبي دا ولد عمي

ههههه عاوزة تقنعيني انه بس ولد عمك يعني مافي شي كدا ولا كدا وقيل ما تجاوب ساره جو الشباب ومعاهم الايسكريم



تاني يوم جاء العفش البيت ومحاسن استغربت وخاصه انه من الليل بتها طلعت الكنب القديم برا وقدر ما سألتها ليه طلعتيو تقول ليها خالد قال بنجده ... ولمن جاء العفش الجديد ما رضت الخاله وقالت لي حسام حرام يا ولدي تضيع قروشك انت العملنتو ما عملو زول كفايه انت ما قصرت ... ليه يا خالتي بتقوللي كدا ودا بيت العيله لازم يكون احسن بيت في الحي كله وغير كدا انا من جيت ودخلت بيتك انت بتعامليني زي خالد ويمكن احسن منه ودا ما شي سهل عندي وما حسستيني اني غريب عنكم رغم انه دي اول مره اشوفكم فيها ومشى باس ليها علي رأسها تسلم يا ولدي ودا بيتك كمان وانا ما عملت الا الواجب الحبويه جات تتقدر وقالت عاد حسام ما كله زوق تسلمي يا حبويه جات سماح لابسه وعاوزة تطلع وشافت العفش وأبدت إعجابها الشديد وقالت ليهو زوقك حلو والله يا حسام لا والله يا سماح دا زوق ساره ... والله كأنه رشاهها بجردل مويه بارد ساره واقفه ولاحظت لي اختها والتغير الحصل ليها ودا ما ريحها ياربي مالها سماح زعلت طلعت طوالي مشت علي الترحيل وقبل ما تطلع قال ليها حسام علي فكره يا سماح دا اخر شهر ليك في الشغل ... التفتت عليه وهي مخلوعه وقبل ما تسالو عن السبب امها طوالي قامت سالتة ليه يا ولدي في حاجه سمعت شي كعب يا ولدي عن شغلها ... وقيل ما يجاوب حسام قالت الحبويه غايتو يا محاسن بقيتي مخك تخين جنس تخن يعني انتي ما عارفه بالعياده البفتحتها حسام اكيد عاوز

سماح تشتغل معاهضحك حسام وقال ليها كلام حبوبه صاح ابقي انا موجود وانتي تمشي تشتغلي عند الغريب ... ولأول مره تبتسم سماح وحست انه حسام بفكر فيها وبغير عليها وطوالي قالت ليهو البتشفوفو يا ولد عمي انا موافقه عليهم جرت ساره عليها وقالت ليها مبروك يا سماح فرحت ليك الشغل مع سحس ح يكون غير ردت عليها ببرود سماح وقالت ليها شكرًا وطوالي طلعت ساره ما اشتغلت بالموضوع كثير وجرت علي حسام وجرتو وقالت ليهو يلا نرتب العفش وحسام بقي معاها يرتب والام مشت علي المطبخ فرحانه يااااا اخيرا البيت بقي بيت بعد الطقم الحلو دا وحتى المطبخ بعد ما ضربو ليها بقي نضيف قعدت تعين لدولاب المطبخ وقالت دا لازم ليهو تغير انا أبيع الطقم القديم واشيل من سماح أتم عليها وأجيب واحد جديد

جاء خالد من شغله وشاف الصالون بقي يقول دا شنو يا ربي أكون دخلت بيت تاني ولا شنو وهنا جات ساره وقالت ليهو لا وحياتك دا بيتنادا من وين ومنو الجابويا حليلو حسام لمن اشترى لشقته الفرش قال الا يجيب لي امي طقم وساقني معاه عشان انقي معاه ... لا ياخ والله دا كتير وانتي كيف وافقتي الولد وراه مصاريف عيادته يعني مافي داعي نكلف عليهو ... والله قدر ما رفضت هو كان مصر ...الله يقدرنا علي جازه بس ... المهم انت عملت شنو في طقمك ... ياخ انا كنت عامل حسابي علي غرفه نوم بسيطه والباقي افرش بيهو الصاله بس

لبني اختارت لي غرفه نوم غاليه شديد شالت كل المعاي وغير المكيفات الركبتها في الصاله والغرفة ... طيب والعمل يعني انت ما معاك ولا شي لا والله يا ساره المعاي يادوب ليوم العرس والنادي والفنان ... كانت امه واقفه قريب منهم وسمعتة طوالي دخلت جوا وقعدت في الاوضه تفكر تعمل شنو وووين لمن جاتها فكره طوالي قامت لبست توبها وشالت محفظتها ومشت لي اختها واول ما وصلت سلمت عليها اختها ودخلتها سلمني انا جايه وكلي عشم فيك بعد الله سبحانه وتعالى خير يا محاسن مالك فيك شنو وحكت ليها محاسن عن ظروفها وطلبت منها سلفه تجيب الطقم لي ولدها وبعدين من مرتب سماح كل شهر بتديها حاجه ... يخسي عليك يا محاسن في بينا سلف انتي ما عارفه خالد مكانته شنو في قلبي ...اي عارفه والله بس دا حقك ولزام تاخديهو ...انتي اسكتي بس وطقم خالد علي بكره يكون عندك ... وبكت محاسن وحضنت اختها وبقت تشكر فيها وسلمي بتقول ليها عيب عليك ما بينا شكر أنتي اطمني بس وانا لو كانت عندي بت ما كنت فوت خالد من يدي بس ملحوقه ان شاءالله يكون ولدي نصيبه عندك عارفه محاسن انه اختها ما عندها غير ولدها لؤي وحيدها ان شاءالله الله يجيب الفيهو الخير و هو كيف لؤي ...كويس والله أهو شغال مع ابوه في المصنع خساره الولد دا ما كمل قرايته ... نقول شنو رأسه مافي القرايه عاوز يختي يلم في القروش زي ابوههههههههه الله يديهو ويراضيهو ...امين يختي اه انقوم نسوي لينا شاي باللبن مطبوطلالالا مافي داعي انا ماشه ... تمشي وين والله ما بتمشي الا تشربي الشاي معاي وبعد شويه لؤي بجي البيت منو تشوفيهو ويوصلك وقعدت معاها محاسن بعد ما اختها مسكت فيها

اه قشرت ليكم ... اه شفتها كيف رأسها فاضي ما زي سماح ثقيله ورزينه ما اشتغل لؤي بكلام حبوبته لانه عينو كانت ح تاكل ساره بعينونها وكان معجب بجمالها ولا الغمازات ألفتي خدودها وبياضها الكان عامل زي لون القمر ولا جسمها البجنن بس ساره كانت من النوع البتحب تهظر وتضحك بس قلبها ابيض زي الحليب رغم انو بعض تصرفاتها بتثبت عكس الجواها وجو مارقين وركبت الحبوبه بقدام ودا طبعاً ما جاء علي هواء لؤي ومشو علي شارع النيل وقفو شويه وبعدها مشو شربو عصير في محل في الرياض وهنا اتلفتت الحبوبه وقالت ليهو وينو عشاك يا ولد ح تقضيها لينا لف في الشوارع ... ههههه لا طبعاً بس رائكم شنو نمشي نتعشي في السلام روتانا ... نطت ساره وقالت واووووو ياخ نفسي امشي الفندق دا من زمان بس كدا من عيوني انتي تأمري بس يا لؤي هدومي ما قدر كدا كيف ادخل مكان زي دا كدا ولا يهكم هسي بنمشي نختار احسن لبسه من المحلات ألفتي الرياض رانك شنو بالجد يعني ممكن طبعاً ممكن بس هنا الحاجات غاليه ... اتلفت ليها وقال الغالي برخص ليك نحن عندنا كم ساره يسلمووووو يا احلي ولد خاله بس ما عاوزه أكلف عليك مخير الله والأدب النزل عليك فجاءه دا من وين وتاني شي اشتريتو الهدوم اه يا ام لسان ح تلبسيها كيف وريني وانا اذا رجعت البيت ما بطلع تاني صاح يا لؤي ح أغير وين ياخ في محل يعرفو عنده غرفه بقيسو فيها عادي الناس الهدوم البشتروها لانه عندهم قوانين مافي ترجيع ... يلا طيب منتظر شنو وحرك العرييه ومشو واختارت احلي بلوزه وأحلي جيبه ودخلت غيرت وعابنت لي نفسها واتكيفت وجات مارقه ولؤي اول ما شافها صفر صفاره كبيره والحبوبه تعوج خشمها ساي وحاسب لؤي وجو مارقين بس الحبوبه حلفت ما تركب ... حبوبه يلا مالك وقفتي ... ما بركب الليله نهاي ... ليه في شنو انتي مش قلتي عاوزه تتعشي ... اي قلت ... طيب أرح لا ما متحركة من مكاني دا تشتري ليها كل الحاجات دي وانا حبوبتك يا وسخ ما فكرت اني كيف ح ادخل المكان القلتو عليه بتوبي دا ... بس يا حبوبه توبك حلو وجديد ... اسكتي انتي في واحد اتكلم معاك هسي ... طيب يا حبوبه انتي هسي عاوزه شنو ... عاوزه لي توب طبعاً وشبشب طقم التوب طيب هنا في محل تياب قريب ... والله يا لؤي في بس يعني حبوبه توبها ما محتاج تغيره ... يعني يا ساره انتي ما شايفه كيف راكبه رأسها يلا ياخ نشتري ليها ونخلص الساعه عشره هسي ... يلا يا سيدي



اه يا خال انا ونزار طالعين ... وين ما تقعدو تتعشو معانا ... ابوي انا عازم حسام علي العشاء برا ... طيب يا سيدي امشو بعافيتكم ... ندي سمعت الكلام من هنا واتشبكت فيهم الا تمشي

معاهم...ياخ دي عزومه اولاد انتي وين ماشه...بمشي بمشي بمشي... يا ابوي ما تشوف بتك دي...خليها تمشي معاكم هي وبت عمك يغيرو شويه....ياربي جيتك تحلها جبت لي وحده تانيه كمان....خلاص يا نزار خليهم يمشو معانا يلا ما تضيع الوقت..... وفعلا قعدو في العربية مستنين البنات يلبسو ويجوهم وفعلا خلصو البنات لبس وجو طالعين يضاحكو وركبو معاهم في عربيه نزار وخلو عربيه حسام عند بيت جده... اه الوجهه وين.... شنو رأيكم تمشو السلام روتانا... والله فكره وكمان بالمره نوري حسام الحاجات الحلوه ألقى بلدنا....بلدنا حلوه بكل حاجه فيها تصدقو هي احلي من لندن.... ههههههه هههههه هههههه الكل بقي يضحك لانه مافي وجهه مقارنه.... بس حسام كان جادي مافي زول يعرف قيمه البلد دي الا يطلع منها في النهايه سودانا حلو ومافي زيهو وتعالت الونسات وهم ماشين وحسام من جاء من لندن مافي طلعه طلعه من غير ساره هي الورته الشوارع والأماكن كانت رفيقه دربه يا ريت لو كانت معانا

.....

اه رانك شنو يا حبوبه قصرت معاك... يا اخوي خلينا نشوف العشاء بعدين نقول قصرت ولا.... وشويه ونزلو الطلبات وساره مبسوطه شديد دي كانت اول مره تدخل فيها الفندق دا ياخ لكن ما خطير ولا الناس الفيهو دا شنو دا معقول في السودان وبدو الأكل والحبوبه شغاله تبلع ساي وساره تقول ليها يا حبوبه بالشوكة والسكين خليك راقيه...سبت ليك انتي الرقي يختي بوشك العمال زي وش الغمايه...اتحرقت ساره من تشبيهه حبوبتها ولؤي ما عجبو كلام الحبوبه بس يعمل شنو وعاوزه ترد بس لؤي مد يده ومسك يدها وضغط عليها رفعت رأسها تعالين ليهو وبس تشوف حسام ونزار والبنات ولسوء الحظ كانوا ناس ساره قاعدين قصاد المدخل وهنا حسام اتخلع لمن شاف ساره والراجل الخاتي يده في يدها وطبعا حسام ما شاف لؤي قبل كدا ولا حتي عارف بصله القرابه البينهم....لؤي لسه ماسك يدها وبعالين ليها وهي عيونها علي حسام اتلفت لؤي علي الاتجاه البتعالين فيهو ساره ويشوف حسام ويرضو ما حصل شافو...ظهر الضيق في وشه ولمن عيونهم حمرة وضغط علي يدها بقوه لمن هي قالت اي وسحبت يدها وبقت تفرك فيها... حسام طوالي جاء عليهم وندي بتنادي عليهو بس هو ما جاب خبرها وهنا نزار عاين للناس الماشي عليهم حسام وقال لي ندي اه دي ساره...ساره دي منو كمان...ياخ دي بت عمه القاعد معاهم.... اه قلتيلي ومالها معولقه كدا...بالغني لكن دي معولقه طيب دي احلي وحده شفتها في حياتي...ضربته ندي في جنبه وهي متغايطه وهو ميت من الضحك وبعدها قال ليهم ح نفضل واقفين كدا يلا نشوف لينا تربيزه ونقعد فيها.... وقف حسام وقفت ساره ولؤي قاعد وعيونه طاقه شرار اتلفتت حبوبه لمن شافت ساره وقفت واول ما شافت حسام قالت حسام الزوق انت جيت من وين انتبه حسام للحبوبه الكانت قاعده معاهم ونوعا ما لمن شافها قلبو هذا كدا بس ليه انا اتغظت لمن شفت ساره مع الولد دا يمكن عشان هي بت عمي اكيد طبعا ما بت عمي وعرضي وشرفي بس دا منو اكيد قريبيهم ولو ما كان كدا البطلع حبوبه معاهم شنو... تعال تعال يا ولدي قوم يا لؤي اقعد في الكرسي الثاني

خلي حسام الزوق يقعد ... لؤي بقي عاضي علي شفایفه ما قادر يرد علي حبوبته لاحظ حسام انه ضيف غير مرغوب فيهو وساره طوالي قالت لي لؤي دا حسام ولد عمي ودا يا حسام لؤي ولد خالتي ... حسام ابي ما يمد يده بس اکتفي بقول اهلاً بيك ... رد لؤي وقال ليهو اهلاً بطريقه ناشفه اتعاظت ساره من لؤي وخاصه لمن الحبويه اصرت انه يقعد معاهم ولؤي رد قال خليهو براحتة اكيد معاه ناس جاي معاهم وعيب يخليهم رد حسام بكل ثقہ وقال فعلا معاي اهلي وبرضو دليل اهلي يعني لو انا حالي اقعد. ح اقعد معاهم لانه قعدتهم مافي اهلي منها بس انا عايش معاهم في بيت واحد يعني الأيام كلها معانا نقعد وننيسط كمان انتو اخدو راحتكم انا بس حبيت اسلم عليهم دا اذا ما بضايقتك يعني ردت الحبويه طوالي علي حسام وهي مبتسمه وقالت ليهو بضايق من شنو دا انت شوفتك تفرح تسلمي ي غاليه يلا انا استاذن منكم اذنتك معاك يا ولدي ومشي حسام وهنا ساره قعدت وطوالي قالت لي لؤي بالجد بالغت ليه المساخه دي كلها ... مساخه شنو وانتي مالك زعلانه عليهو كدا زعلانه بس دا انا عاوزه اطرشق ودا كله عشانه ما تنسي انه دا ولد عمي ... ولد عمك بلا ولد عمك ... لو سمحت ممكن نقوم انا عاوزه امشي ... بس انتي لسه ما اكلتي ... نفسي اتسدت ... لدرجه دي زعلانه عليهو ... لؤي لو سمحت خلاص ... لا ما خلاص انتي مضايقه كل الضيق دا عشان ولد عمك المايص دا ... حبوبه شفتي ولد بتك بقول شنو خلاص اسكتو فضحتونا ولو جيت لجد انت يا لؤي اتماسخت مع الولد انت لو بتعرف حسام ما كان اتصرفت معاه كدا ... خلاص انا أسف يا جماعه ممكن تكملو اكلكم ... ردت الحبويه وقالت ليهم اصلي مكمله انتو الاتنين ما عندكم موضوع اقعدو اتشاكلت بس قبل ما تشاكلي اطلب لي باسطه نحلي بيها بعدين ... يلا يا ساره اكلي ما عاوزه ... اتعاظت الحبويه وقالت ليها ما خلاص بطلي العناد واتطفحي تطفحي السم ان شاءالله حبوبه لو سمحتي ... اسكتي احسن والله أقوم ليك بشبشيبي دا واديك علي رأسك لا يا حبوبه ساره ما تستاهل منك دا ... شوف كمان التاني بقول شنو احسن خليهو تبهدلك انا مالي خليني في اكلي بس عاوزه أقول ليك انه البت دي ما وش فندق زي دا دي مفروض تؤديها الدكان الجنبنا تاكل بوش وبقت الحبوبه تاكل وما اشتغلت بيهم ... وحسام عينو علي ساره قدر ما حاول يبعد عينو بس يرجع تاني بعين ليها ولؤي شايف نظرات حسام وبقي ما قادر يقعد بقي عاوز يمشي بس الحبوبه البطلعها من هنا شنو وساره قارطه خلقتها وقاعده ودا كله من تصرف لؤي الما مبرر ولؤي ماسك السكينه لا قادر يقطع اللحم ولا قادر ياكل ونفسه يغرزا ليهو في عيونه عشان ما يعاين بيها لساره وهنا فجاءه ضرب تلفون ساره وساره فجاءه صرخت وبقت تبكي ورمت الموبايل من يدها وبقت تبكي وجرت علي الشارع وهنا الحبوبه ما قادره تجري ولا عارفه تعمل شنو ما فاهمه شي شالت شنطه ساره وتلفونها ولؤي دفع الحساب سريع وجري بس كان حسام وصل لي ساره قبله ومسكها عليهو وهي بتبكي ضمها حسام عليهو وهو بقول ليها مالك فيك شنو اتكلمي انت عاوزه تقتليني قولي منو اتصل عليك وقال ليك شنو وهنا لؤي يطلع ويشوف المنظر دا



هناء يا حسام هناء بت خالتها اتصلت علي وقالت انه هناء اتوفت في حادث ... لا حولا ولا قوة الا بالله استهدي بالله يا ساره الله يرحمها ادعي ليها جاء لؤي زي الشيطان زحاهها من حسام بكل قوه وهنا حسام عاوز يتكلم ويسأله ليه بتعامل كدا بس الجو غير مناسب الحبويه وصلت نفسها مقطوع فيبيبي شنو يا بت امك حصلت ليها حاجه ... رد حسام وقال ليها لا يا حبويه خالتو محاسن كويسه ... طيب في شنو اخوانك حصل عليهم شي ... لا يا حبويه دي هناء صحبه ساره اتوفت .. شنو لا حولا ولا قوة الا بالله كر علي البت لسنه صغيره وجاء نزار والبنات طالعين يشوفو الحاصل شنو وبس نزار يسمع وبالحوصل يتصدم وبقي ما قادر يتصرف ولا قادر بيكي ولا عارف يعمل شنو الكل طلع ونزار اصر يمشي مع ساره الكانت منهاره عاوز يمشي يودع حبيبته والكل أتحرك ومشو علي الصحافه يلقو البيت مافيهو ولا اي شي الحله هاديه وبيتهم هادي اتلفتت الحبويه علي ساره وقالت ليها البيت مافيهو صوت انتي منو الكلمك ... بت خالتها يا حبويه بس اه البيت مافيهو اي صوت بكاء ما عارفه يا حبويه كدا خليني انزل وأشوف ... نزلت ساره وبهناك نزل نزار ونزلت اخته وبت خالتو عشان ما ظريفه يمشي هو براه وكلهم بقو واقفين برا ساره تعالين لي حسام ... حسام هز رأسه وقال ليها اتصلي عليها اول شي وين تلفوني انا خلتيو في الفندق الحبويه طلعت رأسها برا العربيه وقالت ليها أهو معاي أمسكي مسكت التلفون وهي بترجف مسكت بيدها التلفون وبيدها التانيه بقت تُمسح دموعها وبقت تدق عليها بس تلفونها مقفول حسام تلفونها مقفول يمكن أهلها ما وصل ليهم الخبر وانا بصراحه بقيت ما قادره اتحمل ومشيت علي الباب وعاوزة تدق بس يجي أخو هناء واقف بعربيته واول ما شاف الجماعه ديل اتخلع ونزل طوالي واول ما شاف ساره مشي عليها وقال ليها مالك يا ساره خير شنو الجابك في الوقت المتأخر دا وديل منو ... والله يا احمد ما عارفه أقول ليك شنو وهنا الحبويه نادته احمد احمد تعال لي هنا حبويه اهلاً بيك مالكم ان شاءالله مافي عوجه ... والله يا ولدي العوجه دي ما عارفه عندكم ولا عندنا المهم نحنا كنا في فندق السلام روتانا بتعرفو داك الما بدخلو الا الناس الهاي هاي ... ضحك احمد وقال اي بعرفه ... اه بس كنا بنتعشي في امان الله اصلو ولد بتي ما كان عازمنا هناك ... اه وبعدين ... جاء تلفون لي سارمن بت خالتك قالت قالت قالت شنو يا حبويه والله ما عارفه أقول ليك شنو. صراحه قالو انه هناء ماتت ... شنو ماتت دا كلام شنو هناء هسي انا وصلتها عند خالتي لانه بكره سمايه بت خالتي ومشيت أودي اخواتي عندها بيبيتو ... بس دقيقه اتصل عليها وطلع تلفونه واتصل علي هناء وفتح السماعه الخارجيه ... هناء وجاء صوت هناء اهلاً يا احمد اه وصلت البيت ... دا شنو الهظار السخيف العملتو في ساره تمتت هناء وقالت ليهو انا ما عملت شي والله بس قلت أهظر معاها و اكذب عليها كذبت ابريل لانه اليوم يوم واحد اربعه طوالي جات ساره وشالت التلفون من يده وقالت ليها نهاي ما كنت بتخيل انك تتصرفي تصرف

طانش زي دا ... ساره والله كنت بهظر معاك .. دا ما هظار انتي ما عارفه انك عملتي فيني شنو بس الله يسامحك وتاني لا بيني ولا بينك ... ساره استني أفهمك وطوالي قفلت ساره في وشها السماعه وناولت التلفون لي احمد وقالت ليهو نحن اسفين للازعاج بس ربنا ستر انك جيت وما دقينا لي عمو الباب كان جاته صدمه وخاصه انه هناء مافي البيت ... اي والله الحمد لله ابوي عنده السكري بس كله من هناء وانا ما ح اخليها علي عملتها دي لا هي ولا بت خالتي الهبله بس انتو سامحونا يا جماعه ديل بنات مراهاقات ... ونزار كان نفسه يدخل التلفون ويلطشها كف مطبوط وحسام قال ليهو مافي داعي تتأسف اهم حاجه انها طلعت بخير ونحن نستأذن ... تسلم يا ... حسام انا حسام ولد عم ساره ... مد يده احمد وقال ليهو وانا احمد سلمو علي بعض . وقال لي احمد اتشرفت بيك والله ... وانا كمان طيب يلا مع السلامه ومشي حسام لي نزار وقال ليهو خلاص انت امشي انا البيت قريب ... وطيب عربيتك العندنا ... ياخ بكره بجي بسوقها ... تمام يلا نزار وحمد لله علي سلامه هناء يا صاحبي ... هناء وتاني انا بعين ليها بعد عملتها دي ... ياخ خلاص انسي ... انسي والله ما ح اخليها بس خليني ارجع البيت ... حسام حسام ... اتلفت علي ساره الكانت بتنادي عليهو تعال اركب معانا ... لالا لالا انا ماشي البقاله اشترى لي سجاير امشو انتو وانا برجع بعد شويه وطوالي لؤي ما صدق حكي فرامل ومشي وهنا الحبوبه قالت ليها الله لا كسبك ولا كسب صحبتك فوتت علي العشاء ... حبوبه انتي اكلتي ما قصرتي عشاء شنو الفاتك ... يفوت فيك قطر ان شاءالله انتي وصحبتك الهبله اه دي نهايه مبارياتك للبنات المعولاقات والقليلات الأدب ... حصل خير ان شاءالله بعوضها ليكم ... تعوض شنو بس نزني انت كمان ما الوقت كله قارط خلقتك اتقول ما راضي علي العزومه .

.. ونزلت الحبوبه وساره وجاء لؤي داخل معاهم اي الوقت متاخر بس لو لقي يبيت معاهم بعد ما عرف انه حسام بايت هنا ولقو خالد وسماح وأمهم قاعدين اه العشاء كيف كان ... اه اه بس من الحصل وقعدت الحبوبه بعد ما قلعت التوب وناولته لي سماح وقالت ليها طبقيهو كويس التوب جديد ... حاضر يا حبوبه يحضرك الخير انتي يا ثقيله يا راسيه وقعدت ومددت كرعينها وقالت ليهم اه انحكي ليكم بالحصل وقعدت تحكي وتحكي والكل مخلوع وساره دي اتخارجت دخلت جوا ولؤي كان واقف اتلفت خالد وقال ليهو مالك يا لؤي ما تقعد ... وقبل ما يجاوب جاء داخل عليهم حسام وجرت محاسن عليهو وقالت ليهو وين يا ولدي اتاخرت كدا ... اتغاظ لؤي من تصرف خالتو الما عملتو معاه وهو واقف من قبيل وهنا الحبوبه قالت ليهو ماهو كان معانا هناك وشاف الحصل بالجد كان معاكم ... اي يا خالد جاء هو و اولاد اهله داخلين في نفس المكان الكنا فيهو طيب كويس والله ضحك حسام وقال ليهم كان يوم تحفه بس انا بستأذن يا جماعه عاوز امشي انوم تصبحو علي خير ... اتلفتت عليهو محاسن وقالت ليهو انت من اهله يا ولدي وخالد قال ليهو ما تقفل الباب جاي انوم معاك طيب يا ولد العم ودخل حسام في شقتها الكانت في الحوش التاني وهنا لؤي قال انا زاتي ح امشي ... ردت عليهو خالتو وقالت ليهو ما تقعد معانا شويه .. لا يا خالتي عاوز امشي عندي شغل كثير بكره ... طيب يا ولدي خلي بالك من الطريق وسوق براحه ... ابتمسم لؤي ليها وقال ان شاءالله وقام خالد معاه يقدمو لبرا ... وبعد ما قدمو جاء راجع خالد لجوا

....ساره غيرت هدموها ومشيت علي سريرها ما صدقت رقدت فيهو بعد ما قضت اللحظات
القاتت في توتر وطوالي غمضت عيونها واستسلمت للنوم جات سماح داخله لقتها نامت
وقفت تعانين ليها مسافه وبعدها مشيت عليها وغطتها كويس ورجعت رقدت في سريرها
وحاولت تنوم بس غلبها النوم وقعدت تتقلب في السرير لحد ما راحت في النوم وما صحت الا
علي صوت اذان الفجر قامت طوالي ومشيت علي الحمام واتوضت وجات تصلي وهنا الام
قامت للصلاة وشافت نور اوضه البنات مولع جات عليهم لقت سماح واقفه في المصلايه
تصلي وساره بتشخر مشيت عليها ساره ساره ساره انتي يا قاشرهاووووو اوووو مالك
يا امي مالك بتصحيني خليني انوم ..قومي الصلاة الفجر اذن ...طيب طيب ح أقوم وشالت
البطانية منها عشان تقوم وطلعت الام ومشيت اتوضت وصلت وجات علي الاوضه تلقي سماح
بتقرا قران وساره نايمه ... البت دي ما قامت ساره انتي يا ذفته قومي ...وقامت ساره المره
دي بالجد ومشيت اتوضت وصلت ومن المصلايه علي السرير والحبوبه بتها دخلتها الحمام
واتوضت وجات قعدت في الكرسي تصلي وخالد اصلا قام من بدري ومعاه حسام ومشو
صلو في المسجد وجو يرقدو شويه

الساعه تمنيه صحي خالد ولبس ومشيت علي امه شرب الشاي ومرق لشغله وساره ما قامت
الا الساعه عشره وسماح قامت من تمنيه مع خالد وبدت تنضف وترتب محل ما امها
وحبوبتها كانوا نايمين وعلي الساعه تسعه ونص صحي حسام واخذ حمام ولبس وجاء مارق
لقي سماح واقفه برا ...صباح الخير ..صباح النور ... مالك واقفه كدا ...لا ابدأ بس كنت
عاوزه اشوف اذا صحيت عشان انضف ليك الشقه ...بس مافي داعي تتعبي حالك البيت
نضيف ... واصلا هي ما انتظرت يكمل كلامه وطوالي دخلت تلم في الملابس وترتب ...ابتسم
ليها وطلع مشي علي خالتو محاسن الاول ما شافتو صبحت عليهو وجات تسوي ليهو الشاي
وهنا جاء داخل عليها المطبخ وقال ليها خالتو محاسن ...يا عيون خالك ...عاوز لي شغاله
... شغاله لشنو في حاجه ناقصه عليك ...لا والله بس سماح حرام تشتغل جوا وبري يعني
نجيب وحده تساعدكم ...يا ولدي سماح متعوده علي كدا وانت زيك زي خالد البتعملو لي خالد
تعملو ليكلا يا خالتو الشغاله ضروريه ...نطت الحبوبه وقالت ليهو خلي الشغاله علي انا
بكلم تهاني تشوف لينا اخت شغالتها ولا قريبتها ...امي دا كلام شنو شغاله ليه ... ما تشتغل
بكلام بتي دي من يومها بتحب الشقا... خلاص يا حبوبه الموضوع دا عليك ... تمام يلا اقع
عشان تشرب شايبك ...جات ساره بكسل داخله وقالت ليهم صباح الخير ... تصبحي قرده ان
شاءالله عندك عين تصبحي ورد حسام وقال ليها صباح الأنوار يا سرو ... امي امي سوي لي
شاي ... شفت يا حسام بجاحه زي دي اه تعالي قابليني لو ما راجلك رجعت لينا تاني يوم
...بري علي ليه يرجعني ...يرجعك زي ما حصلت حاجه عشان كسلك دا اختك قامت من
الصباح تنضف وترتب وانتي مخموده نايمه ... وانا لو ما جاب لي شغاله ذاتي ما بقعد معاه
..... حسام دا ميت من الضحك علي نقاشهم شغاله وانتي شبيهه شغالات ...مالي عورا
ولا شينه ... ولا عوره ولا شينه بس مكنسه شوارع ...امي ماتشوفي امك دي ياخ طوالي
بتداعي فيني ... يابت عيب دي حبوبتك اتكلمي معاها كويس ...تحبها القراده ودي بتعرف

العيب دي خليها لقله الأدب وقعدو يشربو الشاي وجابت محاسن لي امها شاي احمر
هي متعوده تشربه بعد شاي الحليب



والله امبارح اليوم كان حلو لو ما عمله صحبه قاشره دي ... شكلك حبيبتني المكان ... طبعا
حبيتو بس خساره ما اتهنيت ... ولا يهكم يا حبوبه انا الليله بوديك ... بالجد يا سحس ...
هيبيبي انتي ناظه مالك في زول كلمك ... ح امشي معاكم ... تمشي بطنك ان شاءالله ...
ماله يا حبوبه خليها تمشي ... تمشي الترب قولي امين ... جات سماح داخله عليهم ... اه
انا عاوزه سماح تمشي معانا

حسام طلع يشوف التشطيبات النهائية لي عيادته هو وندي بعد ما اتفق مع الكل انه اليوم ح يوديهم روتانا حتي خالتو محاسن ح تمشي وخالد قالو يعملو عزومه لي خالد لوداع العزوبية لان العرس بعد اسبوع ... ومحاسن مشت جابت خدره من السوق وجابتها للحبوبة تنقي فيها ساره يا فاشره تعالي نقي معاي ينقو ليك شعرك من القمل ان شاءالله جات ساره وهي بتضحك وبقت قاعده تنقي مع حبوبتها الملوخيه وهنا جات داخله تهاني ازيكم يا ناس يا تقيانه تهاني ازيك وكيفك وكيف امورك والله ما تقي ولا شي انتي عارفه العرس قرب وراسي جايط عاينت ليها الحبويه وقالت منو المفروض يجي لي الثاني نحنا عندنا عرس مفروض تجي علينا وتسألني اذا ناقصنا شي ... خالتي السره ازيك ومشت سلمت عليها وقالت ليها والله معاك حق بس انا ما كنت مسافره عشان تعرفو انكم حتي ما فقدتوني ... جات عليها محاسن وقالت ليها بري والله ما عارفين وانت مالك ما قلتي انك مسافره ... قعدت تهاني بعد ما سلمت علي ساره وبدات تنقي معاهم الملوخيه والله يا محاسن ضربو لي بالليل انه ابوي عيان والصبح طوالي سافرت ... كر عليهو سلامته ماله ان شاءالله يكون مافي شي خطير ... جلطه والله بس الحمد لله عدي منها ... لا والله الف سلامه عليهو ... سلامته يا بتي ان شاءالله هسي احسن ... لا كويس الحمد لله بس تعالو قولو لي عملتو البيت دا متين كدا رفعت الحبويه أصابعها الخمسه وقالت ليها الله اكبر عليك قولي ما شاءالله احسن البيت يقع فينا ههههههه ما شاءالله ما شاءالله يا خالتي والله عجبني ليكم ... دا يا تهاني ولد عمهم للعيال رجع من لندن وسان بيت ابوه وقال الا يصين لينا بيتنا كمان عشان عرس خالد وأنتو عندكم اهل عايشين في لندن ... شوف بالله الحاسده دي كيفن يعني ما عندنا فاكهه اننا مقطعين ولا شنو ... لالا لالا طبعا يا خالتي بس ما حصل سمعت بي اهلكم ديل ... قعدت محاسن الكانت واقفه من قبيل وقالت ليها دا اخو المرحوم كان مهاجر من سنين وولده لمن ابوه مات رجع السودان دكتور عشان يفتح عيادته هنا ... ما شاءالله عليه الله يوفقه ... امين والله يا تهاني الولد طيب ويدخل القلب طوالي شفتي يا خالتو تهاني يشبه منو ... منو يا ساره ... تامر حسني ... يعني الولد مزه يلا شدي حيلك عشان تعرسيهو ... تهاني دا كلام شنو ما تقولي كدا وما تفتحي ليها عيونها شوف الهبله الثانيه بتك يختي تفتيحه وشايله مفاتيحها ... شفتي يا امي حبوبه بتقول شنو بتضحك معاك يا ساره ... وشالت فرع من الملوخيه وطمطمتها طمطمه لمن ساره قالت اي وقالت ليها بتشتكيني لي بتي فاكهه انها ح تقوم تضربني يعني والكل ضحك علي مناقره الحبويه وساره الما بنتهي وهنا جاها لساره تلفون لقتها هناع ابت ما ترد ... الحبويه قالت ليها دا منو البتصل ... دي هناع او عك تتكلمي مع ذفته دي تاني دي بت قليله أدب وشويه جاتها مسج فتحتها ساره لقت هناع كاتبه ليها سرو عليك الله ردي علي نزار خلاني ... ساره مسحت المسج وما اشتغلت بيهو وهنا تهاني اتلفتت علي ساره وقالت ليها هيبيني عرفتي قالو قروب فسخ وجلخ هكرو

وأصرت اني اعمله وانا اخترتك انتي عشان اعرف معزتي في قلبك ... اتلفتت عليها ساره وقالت ليها اه وعرفتي ... عرفت يا ساره انتي عارفه انك صحبتي الوحيده وانا بريدك وما برضي علي زعلك بس انتي سامحيني وبقت تبكي هناء وساره لمن شافت دموعها صعبت عليها وقالت ليها خلاص خلاص ما تبكي جيتك دي نستني الحصل وحضنو بعض واتصافو وجرتها لي الدولاب وقالت ليها تعالي اختاري معاي حاجه البسها بكره ... ليه انتي ما اشتريتي ... لا يا ستي امي قالت مافي الا فستان واحد للعرس ... طيب يلا نشوف ... وشافت معاها الهدوم وبس مافي حاجه تنفع الا البسه الشترها ليها لؤي وعجبت هناء بس ساره قالت ليها البسه دي شافوها علي ودي حقت طلعات ما حقت حفله طيب ممكن امشي البيت وبجيك ... ليه خليك قاعده ياخي ... جايه ... جايه بس ح امشي أقول ليهم اني ح اقبل معاك عشان العرس ... طيب حلو يلا بس ما تتاخري وختها جوا الاوضه والحمدلله لمن دخلت الحبويه كانت ماخده ليها غفوه ولمن جات مارقه لسّه الحبويه نايمه يعني ما شافتها ومشت هناء البيت غابت زي نص ساعه وجات راجعه كانت محاسن وأختها وتهاني مارقين بعربيه اخت محاسن ماشين يجيبو الخبائز وجات داخله هناء واول ما دخلت علي الصاله لقت الحبويه صاحيه وقاعده في نص السرير واول ما شافت هناء قالت ليها انتي وليك عين تجي بيتنا يا كدابيه يا بتاعه كدبه ابريل انتي ساره سمعت صوت حبوبتها جات جاريه وهي بتقول حبويه خلاص هناء صالحتني وانتي رضيتي يا بومه اي رضيت صحبتي وبحبها انتي موتي بالغيط ... ان شاءالله انتي وهي التموتو يا قليلات الأدب ... وبقت تضحك ساره وهناء وجرتها ساره ودخلو جوا والحبويه لسه بتشتم فيهم لحد ما تعبت وسكنت واول ما بقو جوا هناء طوالي طلعت ليها حاجه من الكيس وقالت ليها شنو رايك ووووووووو دا شنو الفستان الخطير دا دا يا ستي ليك لي انا لالالا ما قادره اصدق ... لا صدقي اول الفستان دا جبته في اخر مره مشيت فيها لمصر وما لبستو لا يا هناء كيف البس فستانك وانتي ما لبستيها ... وفيها شنو يعني وتاني شي انا اشتريت الفستان دا وخالتي بالصدفة جابت لي نفس الفستان بس لون تاني يعني عندي اتنين انتي شيلي واحد وانا واحد وعشان تصدقي انا جبته فستاني ودخلت يدها في الكيس وطلعت فستان اخو الورتو ليها ... صحي والله ياهو زاتو بس يعني ممكن تديهو لي اختك بدل ما تديهو لي ... اول اختي خالتي جابت ليها نفسه يعني ما محتاجه ليهو ... يعني اشيلو ... ايوه طبعا تشيليهو بس رانك شنو تلبسي انتي كمان حقك ونكون الاتنين زي بعض ... طيب بس يعني عادي انتي ما ح تضايقي ... اضايق من شنو يا بت عادي وخالص اخيرا ساره أمورها اتظبطت



اه يا رشا رايك شنو في الفستان دا ... لالالا يا سماح ما حلو ولونه باهت تعالي نشوف المحل الثاني يا حليلك يا رشا ما قصرتي حايمه معاي من الصباح ... سماح نحنا بقينا صحبات يعني عادي مافيها شي وتاني شي امي بتحبك ولو ما كدا ما كانت خلنتي اليوم امشي معاك السوق وكمان اببت معاك ... يا حليلها خالتي والله ما قصرت اببت ليك يوم عرسك ان

شاءالله .. ان شاءالله يختي بس هو يجي العريس وبعدين البيات سهل .. وبقو لافين لحد ما لقت فستان حلو وسعره معقول اشترته واشترت ليها شبط رهيب ... وطرحه لانها محجبه ومشت علي محل الشباشب واشترت لي امها وحبوبتها طقم مع تيابهم واشترت لي ساره اكسسوار عارفه انها بتحب الهتش وجو مارقين كان العصر آذن ركبو الامجاد ومشو علي بيت رشا شالت هدومها ومشو علي بيتهم ولقت الشكله مدروه بين ساره وحبوبتها عشان تطبق ليها الحنه وهنا الحبويه لمن لقت انه ساره معنده معاها شالت المحفظه من بتها وطلعت ليها الف جنيه وناولتها ليها ساره قبضت القروش وهي فرحانه واول ما شافت اختها بالأكياس جرت عليها اه وريني اشتريني شنو ...جرت سماح منها الكيس وقالت ليها بعدين اترجت ساره وخاصه الكل كان قاعد مشت طوالي علي حبوبتها تطبق ليها حنتها وهنا جاء تلفون للخاله من الحنانه عشان تجي تخت ليهم حنه ساده وقالو الرسم يبقي يوم الخميس .. ودخلت رشا مع سماح اوضتهم وهنا الام قالت أقوم نخت الغدا وقالت لي ساره استني ما تختي الحنه خلي حبوبتك تتغدا وبعدها ختي ليها الحنه ... حاضر يا امي سبحان الله جابين الحنانه تحننكم و ما تكلموني ...امي انتي استعجلتي وختيتي الحنه وتاني شي انا ما كنت عارفه بموضوع الحنانه بتك هي الاصرت علي انا زاتي ما كنت عاوزه اتحنن لا يا بتي انا بهزر معاكم اتحنني اتحنني دا عرس البكري بتاعك واول فرحه ليك دقيقه أقوم اعمل معاك الاكل ...تعالى يختي وطلعو الأخوات يعملو الاكل وهناء قاعده جنب ساره مع الحبويه والحبويه اتلفتت علي هناء وقالت ليها العصر ما إذن انتي ما ماشه بيتكم خجلت هناء ... بس ساره قالت ليها هناء مقيله معاي ولا عندك مانع حسست الحبويه انه ساره عينها قوت بعد ما اخدت القروش وهي محتاجه ليها عشان الحنه

انتعدو وبعد كدا قامو البنات رشا وسماح وساره وهناء يرتبو وينضفو في البيت وبعد ما
 خلصو جات محاسن لي سماح ... سموحه اخوك وحسام جو امشي سوي ليهم الغدا طيب يا
 امي وعاينت لي رشا وهي مبتسمه ورشا عارفه الحب ألقي قلب سماح لي حسام بس ساره
 واقفه بيناتهم ساره ساقت هناء عشان قالت انها ح تمشي وإذا ابوها وافق ح تجي تببت
 معاهم قدمتها لحد الباب وجات راجعه لقت حسام في وشها ... سحس ازيك ... تمام يا
 عسل تعالي معاي عاوز اوريك شي وجراها من يدها وهي بتقول مالك في شنو واول
 ما بقت في الحوش الثاني قال ليها انتظريني دقيقه ... في شنو يا حسام ... قلت ليك
 دقيقه طيب دقيقتين بدل واحده ودخل حسام جاب ليهو شي واول ما وصل ليها مد ليها
 الكيس طوالي وقال أمسكي دا شنو دا امشي اوضتك وشوفيهم برواقه كدا وبعدين
 قولي لي رانك وبالمناسبة دا ما مني ... من منو ... من امي دايم بحكي ليها عنك وكيف انتي
 انسانه عسل معاي وانا طبعا كلمتها عشان تجيب بدله لخالد ولقيتها مرسله ديل ليك
 لالالا ما تقول ديل فساتين ... ما بعرف حسام قول عليك الله ... ايون فساتين وعرفت
 مقاسي كيف ... تزكري الصورة الكان اتصورناها في روتانا لمن عملنا عزومه لخالد انا
 رسلت ليها الصورة كانت نفسها تشوفكم لكن خالتو ما زوق الله يخليها ... أمين يارب
 بس انتي الزوق وانتي الحلا كله يلا امشي من قدامي خليني امشي اخذ لي حمام عشان العمال
 جاين يركبو الصيوان وكمان الزينه لازم أكون واقف معاهم واي يا حسام الحمد لله انك
 ظهرت في حياتنا في الوقت المناسب ووقفت مع خالد خاصه وانه خالد ما عنده اخوان بقت
 ليهو اخو ... خالد دا اخوي وصاحبني وكل شي كفايه طبيته ودي بالدنيا انا لو عندي اخت ما
 كنت خلتيو يعرس غيرها ... اي والله خالد طيب وبحبك يا حسام دائماً كان يقول انه ربنا
 عوضو بيبك وانه عمره ما ح ينسي ووقتك معاه يابت نحنا كم اصلا ما يانا انا هو في
 العيله ولازم نقيف مع بعض وتاني شي هو بستاهل كل شي حلو وغير كدا ابوي دائماً بقول لو
 ما ابوك باع قطعه الارض الوحيده الكانت عنده عشان يقري ابوي ما كان ابوي بقي مهندس
 ولا قدر يسافر برا ويعمل قرش وعلي فكره في موضوع مهم ح افتحو قدام الكل بعد ما ننتهي
 من موضوع الحنه دا امانه شنو الموضوع قول ... لا ما بقول ويلا امشي عاوز اخذ حمام
 ... ثقيل لكن ضحك حسام ضحكه غيظ وهو شايف كيف وشها حمر من الغيظ ومشي
 وسابها وهي جرت الاوضه وشافت الحبويه ساره داخله بالكيس وتكورك ليها عاوزه تعرف
 الشايلهو ساره يابت دا شنو الدخلي بيهو لجوا ... وساره من جوا ردت وقالت ليها دي قنبله
 🤔🤔🤔 وفجاه تمتها ليها الحبويه وقالت ليها سماحه الزول في الطول والعلا دي قنبله
 ان شاءالله قنبله تفرقع فيك ما تبقي فيك حاجه يا وسخه جاها خالد داخل عليها
ايوووووي ايوووووي ايوووووي مبروك عليك يا ولدي ان شاءالله بيت مال وعيال
 ان شاءالله يا حبوبه وجات داخله رشا اول ما شافها خالد جسمه كله عرق لمن بقي

يرجف ما عارف ليه بس البت حلوه طوالي نزل عينه في الارض هي لاحظت توتره بس هو عريس اكيد بكون متوتر خجلت منه وسلمت عليه وقالت ليهو الغدا جاهز...تسلمي دي رشا صحبه سماح بت عاقله وظريفه وتتخيل طلعت منو...تتذكر ناس صالح الحلفاويين الكانو جيران خالتك زمان بس دي بتهم...بالله فرصه سعيده يا رشا...انا الأسعد وطوالي سأبتهم ودخلت علي ساره ساره كانت بتقيس في الفستان الخطير ولا الجزمه طيب الفستان وعرفت مقاسي من الصوره بس عرفت كيف مقاس جزمتي دا اكيد حسام قالت ليها رشا دي منو دي ... اه رشا تعالي وريني رائك في الفستان دا...خطير والله....مَش كدا دا طبعاً جابتو لي خالتو ام حسام ولد عمي هديه مع بدله خالد حقت العرس ما عرفت رشا انها تضحك ولا تبكي عشان سماح بس ابتسمت وقالت ليها حلو شديد تتهني بيهو ان شاءالله...تسلمي يا عسل وبقت تفتش في الكيس تلقي عطر واكسسوار وساعه ووووووب تعالي شوفي يا سماح الكانت داخله يادوب الاوضه وبقت تتفرج وهي ساكتة

👉👉 بيت العروس 👉👉

يا ابوي ما تتكلم مع امي دي نازله تزن لي لبني في رأسها ولبني رأسها خفيف ... يا ولدي انا من امبارح بتكلم معاها بس مافي فايده نعمل شنو طيب والعقدالفضل ليهو يومين دا ح نقول للناس شو .يعني ولد اختها ما لقي يجي الا في الأيام دي ليهو سنين في السعوديه ولا حس ولا خبر جاي هسي يقول انه امك وأمه قالو من زمان انه لبني لي عصام وعصام لي لبني...دا كلام ساي لمن كانو عيال لكن لا جاء أتقدم ولا قال لنا انه عاوزها بس هسي امي مستحيل تغير رائها وخاصة العريس معترب وجاي بشي وشويات جات داخله ام لبني عليهم وقالت اي جاي شاييل وانا مستحيل ارمي بتي لخالد السجم دا الما عنده تعريفه وح يسكن بتي مع اهله انا اصلي من الاول ما كنت موافقه وهسي مستحيل ازعل اختي عشان خالد دا...يا امي خالد ولد ممتاز والله مافي زيهو ولا تقولي عصام ولا غيره بتك المدلعه دي دايره زول زي خالد عشان يكسر ليها نخرتها الرافعاها فينا....ريحو نفسكم لبني قالت ما عاوزه خالد...وقف اخو لبني علي حيله وقال كيف يعني بكره حنه خالد جايبه هسي تقول ما عاوزه ... وجري طلع مشي لي لبني انتي يا ذفت صحي الكلام السمعتو دا ... اي ما عاوزهو ياخي هو العرس بالعافيه...وجايبه هسي تقولي كدا ... أقول وليه ما أقول جاء الإبو داخل عليهم وقال ليها يا بتي اسمعي كلام اخوك زي خالد ما بتلقي دا زول كويس ما تسمعي كلام امك عصام دا زول تافه ابوي انا خلاص قررت ما عاوزه خالد والله والله تغضبوني عليهو الا اسيب ليكم البيت واطفش والإبو زول مسكين مرته مسيطره عليهو وطوالي أخوها أدها كف والبيت ولع حريقه

العشاء إذن ولسه البت مصره...طوالي الإبو قال لي ولده اسمع يا ولدي شيل الحاجات دي ورجعها لخالد اختك وأمك مستحيل يغيرو رائهم لا حولاً ولا قوة الا بالله والله صعبه

علي بس بتك دي عندي تصرف تاني معاها وعصام دا نهاي ما ح اخليهو يمسك يد اختي
امشي يا ولد امشي ودي ليهم حاجاتهم دي البقي بقي نعمل شنو قول ليهم كل شي قسمه
ونصيب ... وشال اخو لبني الحاجات وختاها في العربية وبعدها دور عربيته ومشي وطوالي
ام لبني اتصلت بي عصام عشان تبشره هو وأمه

بيت العريس 🥰🥰🥰

الصيوان اتركب والزينة والبيت مليون وخالد ونزار وحسام في الحوش الثاني قاعدين يشربو
في الشاي

وقف اخو لبني والحاجات في العربية واول ما شاف الصيوان دمعه نزلت بس يعمل شنو ما
باليد حيله نزل وخلي شنت الشيله في العربية وشال بس الذهب والمهر ومشي رجل وراء
ورجل قدام

واول ما وصل دخل علي طول لان الباب فاتح وشفع الحله عاملين هيصه في الصيوان وفي كم راجل قاعدين وجنبهم صينية شاي وناس خالد جوا وكل شوي خالد يجي يقعد جنب رجال الحله شويه وشويه مع الشباب عاوز يرضي علي الكل وفي بتين داخلين علي البيت وشال نفسه ورجعه ودخل طوالي يلقي ليك خالد في وشه.... اول ما شافه خالد قال اووووو ابو نسب ازيك مد يده بخجل اخو لبني وهو بقول ليهو الله يسلمك يا خالد.... والله فيك الخير جاي وتاعب نفسك عشان تقيف معاي تعال شباب العيله جوا تعال أعرفك بي بالدكتور حسام ولد عمي وهنا جاء حسام علي السيره حسام سلم علي مصعب اخو لبني... اااااااااا يا مصعب اهلاً بيك اتفضل اتفضل مافي زول غريب وهنا صوت الزغاريد ملت البيت حسي مصعب بي قصه في حلقه كان نفسه. يفتح عين ويغض. عين يلقي المهنه الجاي عشانها خلصت بس الله ياخذك يا لبني انتي السبب خلبتيني اقيف في الموقف دا لاحظ خالد وحسام وعابنو لبعض انه مصعب ما طبيعي خير يا مصعب في شنو بلع ريقه وقال ليهو ممكن نتكلم برانا ... جدا بس حسام ما غريب.... لالا لالا ما قصدي العفو طبعاً لا يا خالد انا بمشي لنزار اصلا قاعدين براهيم يلا استاذن.... لا يا جماعه ما قصدي عادي ممكن اتكلم قدامك مافيه شي لا والله انا معاي ضيوف وبالجد ما فاضي ومشي حسام وخالد دخل مصعب صالته وقفل الباب عليهم اتفضل اتفضل بالمناسبه الكنب دا ما خليت زول من البيت يقعد عليهو قلت لبني هي يلي ح تقعد عليهو اول وحده ما علق مصعب وقعد ونزل رأسه خالد قعد قصاده وهو مستغرب مصعب ما طبيعي خير يا مصعب في شنو مالك والله ما عارف ابدأ ليك كيف .. هههههه ابدأ يا ابو نسب في حاجه ناقصه في ترتيبات العرس وبالمناسبة نحنا حجزنا صاله مارينا ولد عمي حجزها لينا ودي كنت عاملها مفاجاه لي لبني مافي داعي يا خالد للمفاجاه لشنو بتقول كدا خير في شنو والله يا خالد انا ما عارف أقول ليك شنو الحاجه الوحيده العاوز اقولها ليك انو كل شي قسمه ونصيب خالد حسي انه الدنيا بتلف بيهو ياربي دا حلم ولا علم بلع ريقه بصعوبة شديده وهو بفرك في يده الكانت زي التلج مصعب انت انت انت بتقول شنو دا كلام شنو والله يا خالد انا ما عارف أفسر ليك الحصل دا كيف وقف خالد علي حيله وهو برجف انت جاي تقول لي وبكره حنتي انه كل شي قسمه ونصيب ... خالد افهمني افهم شنو افهم شنو انت بتقول كلام ما بدخل عقل خالد بصراحه لبني كانت مخطوبه لولد خالتي من زمان يعني خطوبه اهل امي وخالتي متفقين علي كدا ولمن ولد خالتي رجع من سفره بصراحه لبني لبني غيرت رانها وقالت ما عاوزاك خالد ما قادر يصدق لالا لالا دا اكيد فيلم عربي قديم يحضره لالا لالا يا مصعب لالا لالا انت جاي تكذب علي كذبه ابريل زي ما كذبت هناك صحبه ساره اختي عليها هههههههه لا يا شيخ والله وقدرت تعملها فيني لبني عارفاها بتحب المقالب لا يا خالد دي ما كذبه ابريل ولا شي دي للأسف الحقيقه وفجاءه قعد خالد في الكرسي بقوه وخت يدينو في وشه وبقي يقول لا لا لا يا لبني انا عملت فيك شنو عشان تعلمي فيني كدا عشان كدا ليها يومين بتصل عليها مره ترد وعشره لا وحتى في المره الكانت بتترد فيها كلام مسيخ وانا الحمار فكرت عشان قربت تفارقكم نفسيتها تعبانه اتاريتها باعتني عشان الاغتراب والقروش

وبقي يبكي زي الشافع خالد كل شي قسمه ونصيب الله يرزقك بالأحسن منها و هي مَش اختي والله ما تستاهل ضفر رجلك انا وأبوي لبنا يومين بنحاول نقتع فيها وفي امي بس مافي فائده مسح دموعه خالد بيده وقال ليهو مافي داعي تقنعوها انا الما عاوزني انا زاتي ما عاوزه سكت مصعب ونزل الكيس وقال ليهو دا المهر والذهب والشنط برا طلع مصعب وحسي انه عاوز يجري عشان يطلع ما قادر خالد وجع قلبه ومشى نزل الشنط وختاها جنب الباب وطلع جات الام طالعه لقت الشنط مختوته ووووب علي دا منو الجانا من السفر ما انتبعت للشنط المشت اشترتها بنفسها عشان تخت شيله خالد فيها بس ما لقت اجابه علي سؤالها مشت علي ناس حسام تشوف منو الجاء لقت حسام ونزار وولد خالتهم قاعدين بس خالد مافي ولدي حسام ... نعم خالتي ... دي شنط منو البرا ... شنط وين دي ... مختوته برا جنب الباب وووين خالد ... خالد معاه اخو لبني جاه هسي قلب الام نقرها رجعت تعين للشنط وتقول يارب تطلع ما ياها واول ما وصلت لقتها ياها نفس الشنط حقت الشيله مدت يدها وهي بترجف وجاء حسام وراه يشوف حكاية الشنط دي واول ما فتحتها وشافت هدوم الشيله شهقت وختت يدها في خشمها خالتي في شنو دي شنط منو قامت علي حيلها ومسكت يد حسام وهي بترجف ... خاف حسام وبقي يقول ليها مالك فيك شنو دي شنط منو وفيها شنو يخليك ترجفي كدا ... ودموعها نزلت زي المطر وهي بتأثر لي الشنط وبتقول دي دي شيله لبني رجعوها ... شنو بتقولني شنو يمكن جاين يختوها في الدولاب دي مَش برضو عوايدنا....لالالالا يا ولدي مفروض يجيبوها يوم بكره ومعاهام العروس وخالاتها بس يجيبوها بالطريقه دي تبقي فيها انا وجرت علي خالد وراها حسام واول ما دخلو عليهو يلقوه قاعد وخاتي يدينو في وشه والكيس جنبوولدي خالد في شنو حصل شنو وحسام قعد ليهو في الارض وفك يدينو كان وشه مليون بالدموع وب علي ولدي عمره ما بكي في شنو اخو لبني قال ليك شنو ...سكت خالد وبعد مسافه قال تصدقو خطيب لبني القديم رجع وقال عاوزها وهي وافقت عشان معاه قرش وانا للأسف ما عندي حاجه عندك يا ولدي عندك الما عند زول قلبك الطيب دا والكلبه الحقيه دي الله لا يوفقها دنيا ولا اخرهلا يا امي ما تدعي عليهاوبعد العملتو ولسه بدافع عنها ... لا يا امي ما بدافع بس زي ما قال اخوها كل شي قسمه ونصيب وانا رضيت بنصبي وعسي ان تكرهو شيئا فهو خير لكم ودا كلام ربنا وانا زول مؤمن ... ونعم بالله بس ياااا ... خالتي خلاص خالد اخوي قوي وبطلع من محنته دي قوي وضربه في كتفه وقال ليهو مش كدا يا ولد العم وجات داخله ساره وتعرف بالحاصل وساره بقت تقول ليهو ولا يهكم بتعرس ست ستهها هي ذاتها كانت طويله وزى النخله علي قول حبوبه وبقو يضحكو وحسام يهز فيهو ويقول ليهو انا معاك وما بسبيك والا وانت ناسيها وناسي النخله البتشيها بس حسبي الله ونعم الوكيل غير ما خسرونا ما عملو حاجه جات سماح بتقول امي حريم الحله جو وفتت الام وقالت أقول ليهم شنو ولا اعمل شنو ...ليه في شنو يا امي ...ساره الملقوفه طوالي ردت و قالت لبني الحيوانه رجعت الشيله وقالت كل شي قسمه ونصيب ...ليه في شنو وانت عملت ليها شنو عشان تتصرف كدا ...انتي لسه ح تسألني خلينا نشوف حل للمصيبه دي وللخسائر الخسرناها دي وهي خسائر بجد والحل يا عيالسرحت ساره مسافه وهنا صرخت لمن امها اتهجمت وقالت ليهم لقيت الحل بس حلي دا بقیف علي موافقه خالد رفع رأسه خالد وقال ليها وتخلي في حل للمصيبه إلانا فيهاطبعاً في حل طالما ساره اختك وحبيبك في ح

وظلعت هناع مع ساره ورشا ركبو عربيه الخاله خاصه انه الخاله كانت جارتهم زمان وربت اخوانها مع لؤي ولدها وفعلا طلعو ووصلو قبلهم ولمن الام عرفت انه خاله خالد ياها جارتها زمان وعشره سنين اطمنت اكثر والأولاد شافو الخاله وانبسطو بشوقتها وقعدت معاهم ادتهم فكره علي الموضوع والاخوان قالو طالما انتي خالته نحنا نوديهها ليهو لحد باب بيتو والله وطمرت التربيه فيهم ورشا معقول انا ح اعرس يوم الجمعه وب علي اليوم الاتنين ح الحق اعمل حاجاتي كلها متين اسمعي يا بتي انا بوديك عند ساميه حمدتو تظبطك وتطلعك نجفه وب علي يا خالتي ساميه حمدتو عديل كدا وانا عندي أغلي من خالد ولا منكخالنتو اماته وديني اتمكيح مع رشاام رشا ميته ضحك علي ساره وخفه دمهامن عيوني يا سرو الجماعه من هناك اتحركو في عربيه حسام وبالصدفة جاء خال حسام عشان يجامل خالد طوالي ساقو معاهم وسماح تحججت بالناس ألي البيت وانه مافي زول ح يكون قاعد معاهم

وصلو الجماعه ودخلو وسلمو علي الموجودين وشويه وخال حسام فتح الموضوع وبهناك ام خالد فتحت الموضوع والكل رحب والزغاريد بقت تجلجل ساره وام رشا وخاله حسام وأمه وبهناك وقفو الشباب وبقو يباركو وخاصه انه خالد ما محتاج انه يسألو عنه كفايه انه ولد اختها لي ام لؤي وطلعو الشباب واتفقو بكره ام رشا تعزم حبايبها واهلها عشان العصر ح يجو عشان يجيبو المهر والشيله بس ام رشا قالت ليهم ما ح تلحق نعمل ليها ريحتها ...الام طوالي قالت ليها مافي داعي الريحه موجوده وجاهزه انا ح اجيبها ليك في شنطه براهها وانتي مافي داعي توريها للناسعلي خيره الله ... ومشو كلهم ورشا اتصلت علي هاله وعلي صحبتاتها انه عقدها الخميس والدخله الجمعه بس مافي زول صدقها كلهم فاكرين انها كدبه ابريل

ابوي طوالي قال ليهم يا جماعه انا بطلب يد البت لي ولدي الكل فرح واولهم ابو البت ومسك ابوي بالاحضان وقعدو ليهم طوالي شفتو كيف يعني قسمه زول ما بشيلها زول ثاني نهاي ورشا دي قسمه خالد...حبوبه...اي يا فاشره.... والبت وافقت طوالي.... اي كانت خفيفه زي رشا ما صدقت ما كانت بايره وطبعا الكل وافق لأننا كن جيران وعارفين عن بعض كل شي...طيب والنشيله متين اخوك اشتراها... بعد العقد ثاني يوم أبوي ساق اخوي وأشتري ليهو من كل شي تلاته تلاته وزمان لا كان في صاله ولا يحزنون العرس بكون جنب الباب والكفايه حقتهم اصلا كانت يوم العقد وبعد خمستاشر يوم عملنا كفايتنا ودخلو علي بعض وأبوي فرش ليهم اوضه في البيت وقعدو معانا... غريبه اول مره نسمع الحكايه دي رغم انه خالي.... اي ابوي حلف علينا ما نحكي او نجيب سيره عن الموضوع دا ثاني لانه البت بقت مننا وفينا.... طيب وخالي وافق يا امي طوالي كدا ما اعترض نهاي..... اياها يا سلمي يا بتي اخوي كأن زول طيب وافق وما كسر لي ابوي كلمه والله خالد دا بذكرني بي خالكم طالع زيهو في طبيته وأخلاقه الله يتم ليهو علي خير.... امين يارب بس والله الحاجات دي بقت بتحصل عادي وكل يوم بنسمع بيها.....



صبح الصباح الكل صحي بس ما يلقو ليك الحبوبه وبقو يفتشو فيها ما لقوها نهاي وخافو انها تكون زعلانه لسه ونفذت تهديدها وسابت البيت بس يلقو هدمها زي ما ياها في الدولاب حتي الموبايل في الشاحن قاعد ومشو سألو عند جارتهم حاجه نفيسه لانها صحبتها الوحيدة وعرفو من بتها ان حاجه السره جات من الدقش و ساقتها وطلعو...طيب ما قالو ليكم ماشين وين... بري يا محاسن ما قالو لينا شي...ياربي مشيتي وين يا امي....



الكل قام مخلوع من دق الباب... السره براحه ما كده... اسكتي يا نفيسه خليني افش حرقتي وبقت تدق بشده والجماعه بقو يجرو علي باب الشارع واول ما فتحو يلقو ليك الحبوبه بدق الباب بعكازها.... حاجه السره...اي حاجه السره يا معفين... اتقدمت ام لبني وقالت ليها اتفضلي يا حاجه مافي داعي للفضاح... انتو بتهمكم الفضاح انتو الفضاح ذاتها... يا حاجه استهدي بالله كل شي قسمه ونصيب... انت عليك الله اسكت راجل ما عندك كلمه في بيتك... نزل ابو لبني رأسه لتحت ما كلامها صاح.... جات لبني وقالت ليها اسمعي يا حجه...تسمعي سمع السؤ قولي امين انتي ترفضني ولد بتي يا معصصه... انتي جايه تشتمينا في بيتنا.... وأشرت بعكازها للبيت وقالت ليها ودا بيت من اصلو انتي بتسمي الوسخ دا بيت بس الحق ما عليك الحق علي ولد بتي الفكر فيك وعملك زول وعبرك يا بومه... ورفعت يدها

لبنى في وشها وقالت مش رجعنا ليكم حاجاتكم جايه تعملي عندنا شنو تاني رفعت الحبويه
عكازها وادتها ضربه في يدها لمن لبنى صرخت وام لبنى بقت تكورك في الحبويه وتقول ليها
تطلعي برا ولا اتصل علي البوليس يجي يخمك ... تخمك عربيه الوساخه ان شاءالله ومع
الكوراك الناس اتلمت ووهجمت الحبويه وأدت لبنى جنس علقه و الجيران بالقوه فكوها منها
.... وقبل ما تمرق اتلفت عليها وقالت ليها او عك تتخلي انك قدرتي تكسري نفس خالد
العرس قايم وح يعرس وحده تليق بيهو وبيننا وطلعت الحبويه بس اتذكرت حاجه مهمه رجعت
وفتحت الباب بقوه الكل بقي يعاين ويقول دا رجعت تاني ومشت طوالي علي لبنى ومسكت
يدها وقالت ليها ألقى يدك دا حقك عشان لابساه لحد هسي وجرت الخاتم من يدها بقوه لمن
جرحت لبنى بضفرها وجات مارقه

وركبو العربيه ومشو علي البيت واول ما وصلت البيت ودخلت جو البنات جرو عليها امي
كنتي وين ... آلت ترد ومشت قعدت في الكرسي وشالت نفس وبعدها فتحت يدها وقالت ليها
مشيت جبت دا واديت لبنى علقه عمرها ما ح تنساها والله عضيتها عضه لمن طقم سنوي كان
ح يقع من خشمي وكلهم بقو يضحكو واصلا الحبويه لمن شافت عليه الذهب الرجعوها و ما
لقت الخاتم الكان جابو ليها ابوها يوم عرسها وهي ادتو لخالد عشان يقدمو لمرته لانها حلفت
تديهو لأول حفيد من أحفادها يعرس

👰👰👰 الحفله 👰👰👰

الحنه شغاله وخالد قاعد في وسط سريره والحبويه وحاجه نفيسه بحننو فيهو وبعد ما
العريس اتحنن الشباب قالو الا يتحننو طوالي تهاتي قامت وحننت حسام ونزار وولد خالتهم
ولؤي

وساره وهناء داخلين مارقين واخر انبساط و بعد ما طلع العريس الحنه ابتدت الحفله وساره
ليست وقشرت وهناء زيهها وسماح طلعت زي القمر الكل انبهر بيها وجاء حسام عليها
وهو مبسوط وقال ليها وين كنتي داسه الحلا دي كلها بالجد طالعه حلوه شديد ... ابتسمت
وقالت ليهو دي عيونك الحلوه لا والله لا عيوني ولا شي بس اليوم فيك شي غير من جبت
ما شفتو فيك بس امانه عليك خليك كدا علي طول انت تأمر طيب يلا نطلع ومسكها
من يدها وجاء مارق كانت حاسه كأنها طالعه للكوشه يااااا علي مسكه يدك يا حسام واتمنت
انها ما تفكها نهائ اول ما طلعو لقتهم ساره وهم كدا طوالي صرخت وقالت خليك كدا دقيقه
عليكم الله وطلعت تلفونها وادتهم صوره وجرت ورتها لسماح وقالت ليها شوفي شوفي كيف
حلويين وشافتها سماح وقالت ليها اي حلوه شديد...وسابتهم ساره وجرت ترقص وهنا جاء

لؤي يرقص جنبها واصر انه ياخذ صوره سيلفي معاها واتصورو بس فجاءه يلقو لؤي
الحبوبه ظاهره وراهم وعامله يدها كدا 🌸

وكمان ريم وطوالي طلعت من تحت اباطها عليه وفتحتها وطلعت ليها غويشتين ومدتهم ليها ... دا شنو يا امي ... ديل غوايشي انتي اتنين وريم لمن يجي عدلها اتنين كمان ... بس يا امي دا دهبك ... وانا اعمل بيهو شنو ما هو في النهايه حيكون ليكم ... بعد الشر عليك ربنا يخليك ليينا أمسكي يا ريم امشي بكره السوق الشعبي خليههم يلمعوهم ... حاضر اه المهر ح نعمل ليك منو الكفايه يوم العقد انا أديت اخوانك عشان يمشو يجيبو حاجات الكفايه والباقي تاخديهو لا يا امي خليهو معاك انا ما محتاجه ليهم بس ح اشيل مليون عشان رشا تمشي تجيب لي حاجا داخلية طيب مافي مشكله الله يتمم علي خير ... ❧ ❧ ❧

❧ ❧ ❧ العرس ❧ ❧ ❧

رشا وساره في الكوافير وريم مشت لكوافير تاني ورشا قاعده منتظره دورها لانه ساميه عندها زحمه شديد وهنا جات داخله سماح ... اول ما شافتها رشا جرت عليها وهي بتلوم فيها وبتبكي ليه يا سماح اشوفك اخر واحده زي الما فرحانه لي ... سلمت عليها وقالت ليها ما تبكي عشان عيونك ما تتورم وانا والله مشغوله مع خالد واه ان جيتك انا عندي منو غيرك وحضنتها وباركت ليها وقعدو واتفاجات ساره بان سماح حاجزه عند ساميه كمان وبعد شويه قعدو يتمكيجو وطلعت رشا خطيره وساره بالفستان حق لندن طلعت حاجه كدا ولا سماح كانت برضو رهيبه وجو ناس خالد وحسام ونزار ولؤي والخاله وريم واول ما طلعت رشا وقابلها خالد حسي انه بالجد ربنا عوضه وأتقدم عليها وهي كانت بترجف مد يده ومسك يدها الكانت زي التلج حسي بيها عاين ليها وقال ليها انا بحمد ربنا انه اختارك لي شريكه مبروك علينا ... ردت بتمتمه وقالت الله يبارك فيك وطلعو ركبو مع حسام وساره عاوزه تركب بقدام طوالي رشا قالت لي سماح اركبي معانا ... وجرت سماح وزحت ساره الكانت ماده يدها عشان تفتح باب العرييه بس سماح فتحتو وركبت حسنت ساره باحراج وطوالي رجعت لي وراء وهنا نزار جاء عليها وقال تعالي يا ساره معاي بس لؤي مسك يدها وقال ليهو ح تركب معاي ... اوكي اوكي مافي مشكله ... ورجع علي عرييتو وهنا حسنت ام لؤي بتعامل ولدها الما حلو وطوالي قالت لي نزار انا وريم ح نركب معاك يلا طيب وركبو والكل أتحرك وحسام بعين لي ساره ساي كان عاوزها تكون معاه دا الإحساس الجاه في أللحظه دي عاينت ليهو سماح لفتو بعين علي ساره وهي في عرييه لؤي وساره لأول مره حسنت انه هي المفروض تركب معاه وبقت تقول لنفسها انا مالي الليله بحسام مالي حسيت بالإحساس دا أكون بوح وقطعتها حتي قبل ما تنمها لالالا ما أظن انا ما اتعودت علي اني احب بس في احساس في نفسي بقول عكس كدا وما انتبتهت لي لؤي الكان بتكلم معاها وبتغزل فيها وهي بالها في حته تانيه خالص ووصلو الاستديو واتصورو وبعدها مشو علي صاله نادي الضباط ودخلو علي الصاله والزفه اشتغلت بس الجيران كلهم اتخلعو دي ما يها العروس وكل اتنين قاعدين جنب بعض بقو يقطعو أهي انا اسمعت انه العروس رجعت ليهم الشيله قالو انه العروس لقت في جوال العريس صور بنات وكلام ما كويس معاهم لا يا حي انا سمعت انه ام العروس وام العريس اتشاكلو مع بعض وطبعا كلام الناس كثير والبمشي وراء كلام

الناس عمرو ما ح يرتاح ومر العرس بسلام وبعدها مشو علي الجرتق في صاله مارينا
وكانت حفله او فر التايم بي نزار المهندس وعمل عمائل في الحفله والعروس بالتوب الأحمر
تجنن

ومن الصاله طلعو قريب الساعه اربعه وطوالي جاهم لوي وقال لي خالد يلا عشان تمشو
تشيلو شنطكم وتمشو علي المطار ... مطار شنو يا لوي ... دي هديتي ليكم اسبوع في شرم
الشيخ وحاجز الفندق وكل شي تمام عاين لي امه وخالته كأنه بسألهم متين قدر لوي يعمل
دا كله وهنا الخاله قالت ليهو عاوز تعرف صاح جوازك وجواز رشا انا الشلتهم علي فكره
حتي رشا ما بتعرف ريم جابت لي الجواز والله يا جماعه دا كتير علي ... تستاهل يا ولد
الخاله والله ما قصر تو كلكم وربنا يقدرني وارد جمائلكم ... يا زول جمائل شنو مافي بينا
الكلام دا انت زول طيب وتستاهل كل خير وطلعو علي البيت وطول الحفله ساره كانت ما
بطبيعتها وسماح هي الكانت مستلمه الجو كله ولمن جو يركبو العربات مشت ساره ركبت مع
هنا وأخوها احمد وكانت هي اول وحده تمشي البيت وطول الطريق احمد يعاين ليها ساي
بالمرايه هي عارفه انه احمد بموت فيها كم مره رسل ليها في الواتس بس هي ما عبرته
وحسام بقي يسال وين ساره ... ساره يا ولدي ركبت مع هنا صحبتها حسي بضيق ومشى
طوالي ركب عربيته كان نفسه يحصلها لانه حسي بيها طول الحفله ما كانت بطبيعتها
دخلت ساره البيت وبدلت هدومها وشالت العلبه حقت الاكسسوار الجابتو ليها ام حسام وقلعت
الاكسسوار وعاوزه تختو و العلبه وقعت من يدها دنقرت وهي مضايقه وبتقول في نفسها انا
انا فعلا بحبو ما قادره اطلعو من راسي ليه وبس ترفع العلبه تنتبه للورقه الكانت مطبقه
صغيره خالص زي ورقه قطعه اللبان فتحتها واول ما شافتها لقت مكتوب فيها بحبك يا
ساره وجنبها توقيع صغير باسم حسام جسمها كله بقي يرجف حست انها عاوزه تقع لالالا
مستحيل حسام بحبني زي ما انا بحبه ايوه بحبه والله بحبه وحست بدوخه دا شنو الفيني
معقول ورقه زي دي ح تخليني ادوخ ولا انا مالي خنت الحاجات وقفلت العلبه وجات مارقه
حست برأسها ثقيل شديد قالت دا اكيد من صوت الساونات بس تمشي خطوه تلقي نفسها
جسمها تلج شديد ورأسها بقت لافه وشويه وبقت ما شايفه قدامها ورب جات واقعه من
طولها جنب عتبه باب الاوضه في اللحظه دي حسام كان في شارع جاي علي البيت وفجاءه
حك فرامل من غير ما يشعر لمن الكل صرخ وهنا سماح قالت ليهو مالك فيك شنو يا سحس
هو اول ما سمع كلمه سحس اتذكر ساره لانها اول وحده قالتها ليهو وخالد بقي يقول ليهو
حسام مالك عاوز تطلعني من الدنيا وانا لسه ما دخلتها انتبه حسام انه موقف العربيه في
نص الشارع والعربات الكانت وراه تضرب البوري انا أسف بجد أسف وأتحرك وهو بقول
في نفسه انا مالي ودا شنو الحصل لي وبقي ماشي وسرحان في ساره ... وصلت الحبويه
وبتها محاسن وسلمي وجات الحبويه داخله اي جوا قلعت توبها ورمته في السرير وعاوزه
تقعد تنتبه لي ساره الكانت مرميه في الارض وبقت تصرخ وتكورك جات سلمى ومحاسن
يجرو خافو انها تكون وقعت يلقو الحبويه مدنقره علي ساره وتبكي وتضرب فيها والام بقت
تكورك جاء حسام ونزلو من العربيه يسمعو الكورك يجرو جري وحسام خلا باب العربيه فاتح
وجرا يحصلهم بس يسمع الكل بقول ساره يقيف في مكانه مصدوم ما قادر يتحرك وهنا

يشوف خالد شايل ساره وطالع بيها علي برا وكلهم طلعو الا واقف ما قادر يمشي أتمالك
نفسه وجرّاً طلع لقي خالد ختاها في عربيه خالتو ومعاه محاسن وسلمي وجات الحبويه
بقميصها تتسند واي يا ولدي أمسك بيدي خلينا نمشي وراهم وسندها حسام وعينه علي
العربيه الماشه وركبو وساق حسام باقصي سرعه وسماح دخلت رشا جوا بس يا سماح
مفروض نمشي معاهم ... اسكتي اسكتي دي بتتدلع ساي هسي ح تقوم زي القرده ما تخافي
عليها

وبعد ما التحاليل جات خير يا دكتور مالها بتي ... مافي شي اطمنو بس عندها انميا حاده
 شنو انميا وجاتها من وين . مشي خالد علي الدكتور وقال ليهو يعني هي بتاكل كويس من
 شنو جاتها يا دكتور دي بتجي من عدم وجود كميه كافيه من خلايا الدم الحمراء في الجسم
 لتنتقل كميه كافيه من الأوكسجين للانسجه ودا يسمي

تركيز الهيموجلوبين (HGB): وهو تركيز الحامل الاساسي لغاز الاوكسجين في الدم

انا بكتب ليها علي علاجات وان شاءالله بتبقي كويسه حسام بقي يتكلم مع الدكتور بالإنجليزي
 مسافه

وطلع الدكتور وجات الحبوبه اه يا ولدي الدكتور كان برطن معاك بقول شنو ... لا يا حبوبه
 مافي شي اطمنو ... رجعت تاني لساره الكانت راقده في السرير ومركبين ليها محلول انتي يا
 بت انميا تجيك كيف ما قاعده تأكلي اكل البيت كله عامله زي نمل السكر ما يشوف ليها حاجه
 يجي جاري يتلم عليها ... ضحكت ساره ضحكه خفيفه وسكتت واصلت الحبوبه كلامها وقالت
 بس غير ما جبتي لينا الفضايح ما عملتي حاجه الناس تقول علينا شنو ما عندنا اكل وحات
 الله امك بتكب باقي الاكل من كترو وانتي بتاكلي اكل الحمير في النجيله لا الحمير بتشبع ولا
 النجيله بتخلص مخير الله غايته مرضك مرض جوع والله انتي من كتر ما بتاكلي قربتي تأكلي
 ناس البيت كلهم بقو يضحكو علي كلام الحبوبه بس الحبوبه تفاجأ الكل وتقول ليها بس
 بصراحه وقعتي قلبي ما كنت عارفه نفسي بحبك قدر دا يا مقصوفه ما يا امي شكك دا
 معاها ما بدل الا علي حبك ليها ... اي والله بحبها بس هي لو تبطل طولها لسان وتبقي زي
 سماح محترمه مالو بس ما بتقدر لسانها بياكلها وقعدو زي ساعه وجو مارقين وهم في
 الطريق قالت ليهم الحبوبه اوكم تقول قدام العروس عندها انميا احسن ما تفتكر انه نحنا
 جعانيين ما عندنا اكل الكل بقي يضحك ووصلو علي البيت اول ما شأفتهم سماح مشت عليهم
 اه مالها ساره ردت الحبوبه وقالت هبوط عندها هبوط ... طيب الحمدلله الحمدلله علي السلامه
 ودخلو وجاء حسام قال ليها انتبهي علي حالك لو سمحتي ما تخوفيني عليك ... ابتسمت وقالت
 ليهو ان شاءالله يا حسام حسام ولا سحس والله ما حلوه كلمه سحس الا من لسانك

يا خالد انت يا خالد يلا امشو عشان تتطلعو ما بقي وقت علي سفركم وذاتو لوي وينو عشان
 معاه الجوازات ... ردت سماح علي خالتها وقالت ليها لوي مشي عليكم اول ما عرف ... كيفن
 هو ما عارف نحنا مشينا ياتو مستشفى طيب دقيقه اتصل عليه صاح نحنا ما شلنا
 تلفوناتنا معانا باللحمه ومشت تشوف سلمى تلفونها ولقت لوي مكسر علي التلفون اتصلت

عليه ورتو انهم مشو ابراهيم مالك ورجعو وقلت منه وجاها خالد وقال ليها انا ما ح اقدر اسافر واسيب ساره كدا ساره مالها ما كويسه هي بس تاخذ دواها وتاكل كويس تاني ما بتجيبها عوجه انت امشي انبسط ليك يومين ان شاءالله يا خالتو

.. - - - بعد مرور ثلاثه أشهر - - -

حسام فتح عيادته مع الدكتور ندي والدكتور الفاتح صاحبه وسماح و رشا بقو شغالين معاهم رغم اعتراض خالد بس رشا قدرت تقنعه وساره نزلت الجامعه و حسام صارحها بحبه بقو يوميا يتلاقو يجيها جنب الجامعه ويرجعها وكأنو داسين العلاقه دي من ناس البيت وفي يوم جمعه قاعدين يفطرو كلهم وفجاءه الباب بقي يدق شديد قام خالد ومشى فتح الباب يلقي ليك لؤي وخالته سلمى جاين وشايلين فطورهم معاهم سلمو علي الكل وختو فطورهم وبقو ياكلو معاهم وبعد الفطور عملو الشاي ولؤي قاعد وسطهم يتونس خالد وحسام مشو بهناك وهنا جات مارقه رشا وهي لابسه اه يا جماعه استاذن منكم ...ردت سلمى عليها وقالت وين ماشه كدا ...يوم الجمعه بمشي علي ناس امي وهنا جاها خالد وقال ليها اه جاهزه ...اي جاهزه ...تمام يلا عشان أوديك وارجع ...انت ما ح تقيل معايلالالا انتي ما شايفه خالتي عندنا ...ردت عليها الحبوبه وقالت ليها انتي امشي بعافيتك وخلي ولدنا يرجع لينا طيب طيب وطلعت طوالي

شكلها زعلت يا امي ماكان في داعي تقولي ليها كدا بقول كان ما عجبها تضرب نفسها بي اكبر حيطه قدامها

..

يوم الأحد قامت ساره بدري عشان عندها محاضرات ولبست ومشت علي رشا عشان تشيل طرحتها البيضا منها وقبل ما تخش تسمع رشا بتقول ...انت يا سماح وقت بتحببوهو الحب دا كله امشي اتكلمي معاه عديل كدابس يا رشا صعبه امشي أقول ليهو كدا في وشه ما بقدر وبعدين حسام يقول علي شنو يعني ح يقول شنو اتدردحي كدا وقولي ليهو رشا طالما ساره بيناتنا. مستحيل يفكر فيني ... ساره قلبها وقع اول ما سمعتها بتقول كدا وسكنت ما عرفت تعمل شنو. وتسمع سماح بتقول لي رشا انا كبرت وخايفه القطر يفوتني وانا املي كله حسام يتزوجني والله ما عاوزه شي غير كدا ان شاءالله بعدها اموت ...بعد الشر عليك انتي اسمعي كلامي وما ح تندمي بس ساره ح اعمل شنو معاها ...انت مش قلتي لؤي بحبها وعاوزها خلاص تعرس لؤي ... بس هي ما بتحبو .. وانت مالك تحبو ولا. الحب بيحي بعد

العرس اه انا كنت بحب خالد ولا خالد بحبني هسي كان سألتيني ح أقول ليك بحبو وبحب
التراب اليمشي عليه وهو كمان بقي روحه فيني

ساره رجعت وهي محطمه معقول سماح بتحب حسام وانا ما حسيت بكدا ياربي

اعمل شنو 🗣️



جرت لبست طرحه تانيه وطوالي مرقت

لقت حسام واقف برا بشرب في سيجاره اول ما شافها قال ساره. وهي دموعها ماليه وشها
مشت من غير ما ترد عليه بقي حسام واقف مستغرب من تصرفها ليه عملت كدا انا عملت
شنو عشان تتصرف كدا اضايق شديد وركب عربيته يحصلها هي كانت وصلت الظلط اتلفتت
وراها تشوف عربيته جايه عليها طوالي اول ركشه كانت ماشه وقفها ونطت فيها بقي
ماشي وراها وهو بكورك وبضرب بيده الديركسون في شنو يا ساره ليه كدا ليه يا عمري
ومشت الركشه لحد ما وصلت الجامعه وحاسبت الركشه ونزلت بس تلقي ليك حسام في وشها
... مالك فيك شنو ممكن افهم تصرفك دا معناه شنو

نزلت رأسها للأرض وقالت بصوت واطي حسام امشي انا قدام الجامعه ... وصرخ حسام فيها
ويعني شنو انك تكوني جنب الجامعه ردي علي مالك حسام من فضلك ما تعلي صوتك
نحننا جنب الجامعهجامعه جامعه فليكن ياخ انا بسألك تردي علي انتي فاهمه ... رفعت
رأسها وقالت ليهو حسام امشي من قدامي انا ما طايقه روجي ... واول ما شاف وشها
والدموع ماليه عيونها مسك يدها وقال ليها انتي بتبكي منو زعل عمري انا انا انا وفكت
يدها من يده وجرت طوالي دخلت الجامعه تلاقى هنا ء في وشها رمت نفسها في حضنها
وبقت تبكي وتبكي لمن البنات والأولاد بقو يعاينو ليها ...في شنو يا بت مالك ...انا تعبانه
تعبانه يا هناء قلبي واجعني شديدسلامه قلبك تعالي تعالي الناس بقت تعالين علينا
وساقتها ومشو بعيد وقعدو ...يلا احكي لي مالك وبقت تحكي ليها ودموعها نازله

اه وفي النهايه ح تعلمي شنو يا ساره مسحت ساره دموعها وقالت ح انسحب يا هناء ما تشوفي كلام سماح اثر فيني كيف هي اختي والكبيرة وكبرت وانا لسه المستقبل قدامي يعني هي دايمًا شايله همنا واي شي حلو بتجيبو لي أقوم اعمل فيها كدا مستحيل مستحيل يا هناء دي اختي وامي وكل شي حلو في الدنيا ومستحيل أكون سبب في تعاستها حتي لو كان دا ح يحرق قلبي ما مشكله اتحرق انا وهي تكون مبسوطه ودا الوقت البثبت ليها حبي وخوتي دي الأخوه في الدنيا يا هناء شنو انتي مجنونه لو كنتي فاكراه دي تضحيه منك تبقي غلطانه لانه هي حتي لو عرسته ح تبقي شايفاك بينها وبين حسام وكدا ح تدخلني الشك في قلبها ودا اذا افترضنا انه حسام وافق بيها انتي اذا ضحيتي البضمك انه حسام ح يوافق ان مشاعره تبقي لعب بيناتكم ... طيب أعمل شنو اتصرف كيف ... اسمعي انا قدامك بحب نزار ونزار من يوم المشكله وقطعها معاي قدر ما اعتررت ليهو هو ما رضي قال لي اني لعبت بمشاعره والرجال ما زينا بسامحو وبنسوا وانتي بعملتك دي ح تعلمي مشاكل في العيله واهلك يعرفو ويمكن حسام يسيب البيت ولا البلد كمان فكري كويس قبل ما تقرري

حسام مشي شغله وسماح الوقت كله بتحاول تفكر أنها تصارحه بمشاعرها زي ما وصتها رشا بس كل ما تقوم عشان تدخل عليه يجي مريض ومر الوقت كله كدا ورشا كمان ما جات الشغل وهي الشغل كله عليها ما لقت فرصه نهاي لحد ما رجعت للغدا وبعدها رشا مشت معاها دوام المساء وهم هناك رشا قوتها وخلتها تدخل ليهو ... دخلت وهي بتقدم رجل وبتاخر التانيه لحد ما لقت نفسها قدامه ... سماح في شي لالالا بس في موضوع كدا كنت حابه اقوله ليك والله انا ذاتي عندي موضوع حابي اقوله ليك اقعدي اقعدي مالك واقفه قعدت سماح وقال هنا حسام خير احكي لي ... ابتمت وقالت ليهو لالالا انتي اول شي احكي موضوعك وانا بحكي بعدك ... طيب شوفي يا ستي انا امي الأيام دي ناقه فوق راسي اني أخطب وانا قلت افاتحك انتي اول زول لانه انتي ليك معزه خاصه ... ابتمت وعدلت قعدتها وقالت في نفسها بركه الما قلت موضوعي اول شي بس طالما قال لي انه انا عندي معزه خاصه عنده معناها عاوز يفاتحني ويمكن الكلام السمعتو عن حبه لي ساره اختي ما كان صاح ساره اصلها مستهتره منو البعاين ليها وتمتمت وردت عليه وقالت طيب كويس كلام امك دا عين العقل وطالما هي عاوزه تفرح فرحها اكيد اكيد بفرحها وانت ذاتك ح تفرحي اخ يا حسام الفرحة الفيني مافي زول انت غالي علي تسلمي يا بت العم دا العشم بس ان شاءالله لقيت العروس البتناسبك وتناسب مركزك انت دكتور والمفروض تعرس زوله زيك ... اهم شي سماح انها تكون بت حلال وانا طبعًا لقيتها وأزيدك من الشعر بيت انه انا عايش معاها في نفس البيت ... زاد الأمل في قلب سماح لدرجه قربت تنطط بالفرح وردت وقالت ليهو في بيتنا نحنا ... اي يا ستي في بيتكم انتو وانا عايش مع منه غيركم ... انا قلت يمكن في بيت خالاتك يعني ... لالالا في بيت خالاتي مافي وحده شدتني زي ما اتشدت في

انا هي وين اختي ودووها وين رد علي عليك الله طمني ... دخلوها علي العمليات وهنا قبل ما يتم كلامه سابو وجرت ومعاها الشاب وهو شايل شنطتها في يده واول ما وصلو قال ليها دي شنطتك وان شاءالله ربنا يطمئنكم عليها ... ان شاءالله وشالت شنطتها وفتحتها ويدها بترجف وطلعت تلفونها واتصلت علي رشا عشان تكلم ناس البيت وقفلت منها ورشا بقت ما عارفه تعمل شنو ولا تتصرف كيف دخلت علي حسام وهي بترجف وقالت ليهو حسام في موضوع كدا عاوزه اكلمك بيهو رد عليها وقال معلش يا رشا اقدي دقيقه بس بتصل علي ساره وما بترد كدا ارجع ليها تاني ... مافي داعي ترجع ليها لانها ما ح ترد عليك ... نزل التلفون من يده ورفع رأسه ليها وقال ليه مالها ما ح ترد علي لانه لانه ... وقف علي حيله وهو معصب وقال ليها في شنو يا شا لو سمحتي اتكلمي .. بصراحه . ساره عملت حادث وحالتها خطرته وهي في العمليات هسي ... شنووووو ساره وين ومتين وفي مستشفى شنو

الخرطوم في مستشفى الخرطوم شال مفتاح العربيه وجرا علي العربيه زي المجنون ودموعه نازله جاء دكتور الفاتح علي رشا وهو شايف حسام طالع وهو بجري ... ماله دكتور حسام ... بت عمه عملت حادث لا حولا ولا قوة الا بالله طيب مش مفروض نحصله ... ايوه بس انا لازم اصل البيت اكلم خالد اخوها وامها طيب أرح أوصلك ومن هناك نمشي معاهم ... كتر خيرك وطلعت شالت حاجاتها ومرقت معاه واول ما وصلت البيت وقابلتهم حك ليهم بالحصل والكل بقي ببكي وركبو مع دكتور الفاتح ومشو علي المستشفى وهناك وصل حسام وسأل في الاستقبال واول ما عرف طلع فوق يلقي سماح والشاب يا حليلو لسه واقف معاها اول ما شافته جرت عليه وهي بتقول ليهو الحق ساره ساره بتموت يا حسام ما قال ولا كلمه وجرا وقف جنب باب غرفه العمليات كان زي المضروب علي رأسه ما عارف يعمل شنو ولا يتصرف كيف يصرخ ولا يبكي ولا ولا ولا وشويه وجاء خالد وأمه وحبوبته ورشا ودكتور الفاتح وبقو واقفين وحسام قاعد في الارض ومنزل رأسه بين ركبته ومرت أكثر من ساعتين والام بتبكي واكثر زول كان متجرس الحبويه وجات الخاله وراجلها ولوي وأخو رشا وأمه بعد ما كلمتهم رشا بالتلفون ووورين حتي أتفتح الباب وطلع الدكتور واول ما شافو جرو عليه يسألوه ساره كيف هنا حسام رفع رأسه واول ما شاف الدكتور قام علي حيله وجرا عليه وهنا الدكتور قال ليهم نحنا عملنا العلينا بس الباقي علي ربنا ... كيف يا دكتور يعني بتي ح تعيش ولا والله هي نزلت كتير لحد ما جاتنا وكله بيد الله انتو ادعو ليها بس وسأبهم ومشي



الكل قاعد جنب العنايه ويدعي والماسك كتاب القران يقرأ والوقت بعدي والصبح قرب يصبح حسام بقي ما قادر يستحمل طوالي نزل لدكتور عشان يعرف حاله بالضبط خاصه انه مشي ليهو ولفاه في العمليات وهنا لمن نزل المره الثانيه مشت وراه سماح بس هو ما شعر بيها ودخل عليه لقاها ماسك ورق تحاليل واول ما شافه قال ليهو انتو تبع المريضه ساره ... ايوه ايوه انا الدكتور حسام خطيبها بس ياريت يا دكتور تظننا وهنا وقفت سماح جنب الباب

الجزء ١٥

جات الحبويه وامها داخلين عليها ودموعهم نازله ووقفت الحبويه ومسكت يدها ... ساره يا
بتي فتحي عيونك ما تسيبنا برانا البيت مسيخ من دونك يلا قومي يا ساره ديل امي
وحبويه يااااااا مالها حبويه بتبكي لحظه لحظه دي بتنادي علي ومالها بتقول لي فتحي عيونك
وانا عيوني فاتحه والله حبويه دي غايتو بتقول حاجات تضحك وبقت تضحك بس تحت
يدها في خشمها وبقت تقول لو سمعو ضحكتي ح يعرفو انا هنا لالا لالا اخير اسكت وما اعمل
حركه بس انا تعبانه خليني ارتاح شويه وقبل ما تغمض عيونها تجي داخله سماح بعد ما
امها وحبوبتها طلعو ساره ساره ساره تتلفت دا صوت سماح ايوه سماح لالا لالا يا
سماح ما تزعلي مني انا مشيت منكم خلاص ما ح اطلع من البئر انتي امشي عرسي حسام
وعيشو وسماح خنت يدها في رأسها وبقت تقول يا روعي انتي انا اسفه عشان زعلتك
مني بس انا غلطانة وأنا فيه ما فكرت الا في نفسي ونسيت انه كل شي قسمه ونصيب وانتي
نصيبك حسام يلا قومي عشان نعمل ليك عرس ما أتعمل قبل كدا لوحده وانا ح اقيف معاك
واخت يدك في يد حسام سماح انتي بتقولي كدا مستحيل انتي بتحبيهو اكثر مني
ساره فتحي عيونك وشوفي منو الجاء وكان ح يموت بخوفه عليك منو منو انا ما شايفه
حاجه ما شايفه بس دي ريحته ايوه ريحه حسام اه مافي تحسن والله مافي شي جديد بس
انت تعال قياف قريب منها يمكن تحس فيك وقف حسام جنبها ومسك يدها وبأسها وقال يا
عمري انتي ان شاءالله فيني ولا فيك يا قلب حسام انتي وسماح دموعها نازله كان همها
كله ساره تبقي كويسه وتعرس حسام اسمع يا حسام انت مش قلت عاوز ساره ان شاءالله اول
ما تقوم بالسلامه تعملو العرس طوالي اكيد اكيد بس هي ترجع لي ثاني وانا بكره اعقد
عليها اه اه سماح حسام انتو بالجد عاوزني ارجع ليكم يااااااا سلام طيب انا هنا
تعالووووو طلعونني يا هووووووي يا ناس انا هنا ليه ما قاعدين يسمعوني انا هنا يا
سماح تعالي ساعديني عشان امرق



يا جماعه امشو والله وقفتم مافي داعي ليها امشو البيت نومو شويه وبعدين للعصر كدا
ارجعو ان شاءالله تكون فاقت وفعلا الناس كلها تعبانة وكان لازم تمشي تنام عشان تقدر
تواصل مشو وفضلت سماح وحسام وقعدو في الكافتيريا وكل واحد اخذ ليهو تكيه وغفي
شويه ما حسو قدر شنو نامو بس حسام قام مخلوع بعد ما حلم حلم مزعج شديد كان الضهر
بأذن مشي طوالي اتوضأ ومشى صلي وقعد يبكي بكاء شديد ودعي لساره وشويه تلفونه
ضرب طلع التلفون من جيبو ورد من غير حتي ما يشوف المتصل واول ما سمع صوت امه
كأنه ما صدق بقي يبكي ويقول امي محتاج ليك شديد ... سجمي مالك يا ولدي فيك شنو وقعد
يحكي ليها وهي تواسيهو وأصرت انه يجيبها هنا ووعدته انه تعمل المستحيل وتجهز ليها

ورقها بس لازم ترسل لي التقرير بالفاكس وكل اوراقها طيب يا امي ح أرسل ليك بس
انتي ادعي ليها ... الله يرفعها ويقومها بالسلامه امين يارب ... وقفل منها وطوالي قام
مشي لدكتور يشوف عمل التحاليل ولا يلقي سماح سبقته ومن شكلها عرف الكارثة
المنتظر هو وقف وما قدر حتي يسأل ... بس الدكتور اول ما شافه هز رأسه وقال للأسف
النتيجة ايجابية سرطان في الدم قعد بكل قوه في اقرب كرس وخت يدينو في وشه وبقي
يقول اللهم لا أسألك رد القضاء ولكن أسألك اللطف فيه



بعد مرور يومين فاقت ساره وعدت مرحله الخطر بس لسه الخطر الكامن بنهش في جسمها
.... الكل قاعد وهناء جنبها من ما عرفت من رشاء كانت كل يوم بتجي مع ناس بيتها وكلهم
حولها مبسوط بقومتها بالسلامه وخاصه الحبويه ما عاوزه تبعد منها ومفروض تبدأ العلاج
بس هي لسه ما عرفت والدكتور مصر انها تعرف عشان اي تاخير مافي صالحها وقعد حسام
يفكر كيف يوصل ليها الخبر اكيد ما ح تستحمل وفي يوم كلهم قاعدين معاها في العنبر وقبل
ما حسام يجي داخل عليهم جات داخله عليهم ممرضه وقالت ليها يلا لانه عندك جرعه ...
جرعه شنو جرعه الكيماوي انتي عندك سرطان في الدم اهلك ما كلموك يعني انتي
متأكداه انه لي انا ... طوالي اتلافتها الحبويه وقالت ليها ان شاءالله صاروخ كيماوي يفرتك
.... هاجت الممرضه فيهم عشان شتيمه الحبويه وهنا دخل حسام وعرف بالمصيبة حصلت
وام ساره اول ما شافتو بقت تقول ليهو شفت الممرضه الما عندها قلب جايه تقول بتي عندها
سرطان سلامه بتي من المرض دا ... دنقر حسام رأسه لتحت وسكت ... حسام مالك ما بترد
انا بتكلم معاك ... للأسف يا خاله الممرضه بتتكلم صاح ... نزل الخبر زي الصاعقه علي الكل
الام بقت ماسكه بتها وبتبكي والحبويه تبكي كانوا يبكو عليها قبل ما تموت بس الخلا كل
القاعدين يتصبرو كلام ساره وهي في حضن امها وهي بتقول الحمدلله يا امي مافي زول
بموت ناقص عمر وانا مؤمنه بالله ولازم ارضي بقدره ودا امتحان من رب العالمين عاوز
يعرف صبرنا ح يكون قدر شنو جات عليها سماح وقعدت جنبها ومسكت يدها وقالت ليها
ياريت الفيك في اختك سماح ... قفلت خشمها بيدها وهي بتقول ليها بعد الشر عليك من اي
مرض



مرت الأيام وأخذت اول جرعه وطلعت من المستشفى وكان عندها كسر في يدها الشمال من
الحادثه ورأسها مربوط من جرح الحادث والكل بقي معاها ما بقارقها وهنا وصلت الاوراق
وكلمهم حسام انه امه جهزت ليها كل شي عشان تسافر تتعالج في لندن بس الخاله تفاجأ الكل
وتقول قبل ما تسافر لندن وانا وقدام الكل بطلب يدها لي ولدي وتعرس وتسافر وهو يكون
معاها رانك شنو يا محاسن يا اختي ... وانا وين ألقى زي لؤي بس ساره توافق وانا ما
عندي اي مانع اه يا ساره رانك شنو في طلب خالتك انا انا مووووو وبس تقطع كلامها
سماح وتقول لا ساره ما ح تعرس لؤي كلهم اتلقتو عليها واولهم ساره الكانت اصلا ح
توافق عليهو عشان تخلي حسام لي سماح اختها ... سماح انتي بتقولي شنو ... بقول لا يا
خالتو ساره ما ح تعرس لؤي ولدي انا مالو عشان تقولي عليهو لا يا بت كيف

تقولي علي ولد اختي لا ونحن عارفين من زمان انه لؤي عاوز ساره ... الحبويه قاعده تسمع وتشوف ساي وعينها كانت علي ساره ولاحظت انه عيونها في اتجاه حسام وحسام البشوفو بعرف قدر شنو هو بحب ساره لانه يا امي حسام كلمني وقال عاوز ساره وساره موافقه عليه وقبل ما يتكلمو ولا يعلقو ردت الحبويه وقالت صاح كلام سماح انا زاتي حسام كلمني وقال لي انه عاوز يتقدم ليها وغمزت ساره بعينها والخاله هاجت وكوركت وأختها تهدي فيها بس الذاد الطين بله كلام خالد القال انه موافق علي حسام ودا ولد عمها وهو أولي وهو التكلم الاول اي لؤي دايرها بس مافي زول فيكم أتقدم رسمي ... وزعلت الخاله وطلعت وسابت البيت ومحاسن بقت في موقف زي الذفت اختها ولا بتها العيانه هي همها كله انه بتها تعيش باقي أيامها سعيدة مافي وقت للمجاملات المافي داعي ليها ولؤي عرف بالحصل وزعل شديد وساب الخرطوم ومشى جوبا اصلا عنده مكتب هناك وشغل ومرت الأيام والخاله زعلانه وما بترد علي اتصالات اختها وفي يوم اختها تقرر تمشي ليها عشان تنهي الزعل البينهم وعارفه اختها قلبها ابيض ما ح تردها وفعلا مشت ليها واستقبلتها سلمي ببرود بس محاسن مقدره موقف اختها وما زعلت بس بقت تقول ليها يا سلمي يا اختي انا اكثر واحده اتمنيت لؤي لوحده من بناتي بس لو كان عندي شك واحد في الميه انه ساره بتحب لؤي وما بتحب حسام انا كنت جبتها ليك لحد عندك بس ساره عاوزة حسام وانتي عارفه بتي لو عاشت سنه ما ح تعيش التانيه نحنا عارفين المرض دا نهايته شنو وانا عاوزة بتي تعيش الأيام الفاضله ليها وهي مبسوطه وانتي مستحيل ترضي لبتي غير كذا وبقت تبكي محاسن وسلمي صعبت عليها اختها لانه كل كلامها كان صاح وباركت ليها وقالت ليها ربنا يتمم علي خير بس ح تعقدو ليها متين امه جايه اليومين الجايين واول ما تصل ح نعقد ونعمل كل شي وح تسافر علي طول عشان تكمل علاجها هناك الله يسهل عليها ... يعني خلاص انتي ما زعلانه ما اكدب عليك في الاول زعلت بس لمن سمعت كلامك لقيتو عين العقل وزى ما لؤي ولدي ساره زاتها بتي ومسكو بعض وبقو بيبكو وبعد ثلاثه ايام جات ام حسام ومشى استقبالها ولدها وخالد ونزلت عند ناس امها الفرحو بجيتها بس زعلت ندي شديد بعد ما عرفت انه عمتها جايه عشان تعرس لحسام بت عمه وبهناك الكل قاعد يحضر للعرس وسماح بتخدم ساره بعيونها وكل تجهيزات العرس قايمه بيها براها وهناء ما فارقت ساره نهاي وتنهاي جارتهم قعدتها عندها عشان العريس ما يشوفها قبل الدخلة والحبويه معظم الوقت قاعده مع ساره وموقفه تهاني زي الألف تخدمها مره شاي و مره قهوه ومره اكل بس هي مبسوطه لانها بتزكرها بي امها وهنا قاعدين الحبويه وساره يتونسو وفجاءه ساره قالت ليها تفتكري يا حبويه ح اعيش لحد ما اتزوج وأجيب عيال واربيهم نزلت دمعه الحبويه وهي بتقول ليها تفي من خشمك دا كلام شنو ان شاءالله تعرسى وتجيبى عيال وتحضري جديدهم وبقت تبكي طيب انتي ليه بتبكي طالما انا ح اعيش ان شاءالله زي ما قلتي ببكي عشان تاني ما عارفه اتشاكل مع منو ... وتجي سماح داخله وهي شايله توب الجرتق مشت عملتو عند وحده مصممه تياب وهنا ضحكت ساره وقالت ليها بس او عك بعد ما اسافر تتلفتي علي اختي وتقعدي تداعي عليها ... دعاء تاني توبه خشمي دا ما ح يقول الا الكلام الحلو بس فجاءه سماح بعد ما توربهم التوب ويعجب ساره تقوم ومن غير ما تشعركش كبايه إلقهوه القدام حبويه وفجاءه الحبويه قالت تتكشحي بالتراب يا سماح ان شاءالله ووووين الفيهو داء عمره ما ببطلو وكلهم بقو يضحكو حتي الحبويه بعد ما انتبهت لذله

لسانها هي قالت ما ح تدعي تاني بس صدق من قال ادعي علي ولدي وأكره البقول امين بس ياريت نفهم ونتعظ انه الدعاوي حتي اذا كانت من غير قصد وبغفويه ممكن تصادف انه باب السماء يكون مفتوح علي قول اهلنا الكبار وتستجاب

الجزء ١٦

ازيك يا محاسن مشاءالله عليك زي ما انتي ما انغيرتي ... تسلمي حبيبتي وانتي كمان مشاءالله بقيتي حلوه شديد ... ههههه دي عمليات التجميل يختي ههههههه والله يا خالتو انتي عسل وصريحه شديد ... والله انتي العسل ومهما الوصف الوصفو حسام لي بحس انه قليل في حقك ولدي نسي يقول لي انك زي القمر ... تسلمي يا خالتو دا بس من زوقك دا ما كلام ساي دي الحقيقه وأتلفت علي ام ساره وقالت ليها والله يا محاسن بالجد بناتك عسل وحلاتهم وطالعين زيك عيونك الحلوه حبيبتي ماهم بناتك برضو ... دا العشم وعشان كدا جيت الليله اطلب يد بتي ساره لولدي حسام رغم أنك عندكم خبر وحسام أتقدم ليكم بس دي الأصول ودا كمان حقم لازم كنت اجي وأتقدم ... ونحن انتظرنا جيتك لانه بالجد كمان اشتقتنا ليك وتاني شي والله نحن لو لفينا الدنيا كلها ما بنلقي زي حسام في أدبه وأخلاقه فعلا كبرتي وربيتي طيب اه قلنتو شنو ... مافي قول بعد قولك ونحن ما عندنا اي مانع ... خلاص علي خير الله اه ما قلنتو لي طلباتكم شنو ... طلبات شنو كمان يا اختي نحن ما عندنا اي طلبات ... كيف ما عندكم طلبات دا حقم وحق العروس وما تنسي دا عرس حسام وساره ولازم نجيب ليها الغالي والنفيس وعلي كلا انا جبت الشيله كامله مكمله وان شاءالله يوم الجمعه نجيبها والخميس الجاي نعمل العقد والعرس مع بعض ويسافرو طوالي يوم السبت ... ان شاءالله والله يتمم علي خير ... نطت الحبوبه وطلعت من الموضوع لانه كان في شي شاغلها اهم من عرس قاشره وقالت يختي طالما عمليات التجميل بتغير الزول كدا انا زاتي عاوزه اعمل يصلحو لي ركبي دي وسنيناتي كمان وأشد شويه واشفط شويه الكل بقي يضحك خالات حسام وأمه والكل كان مبسوط بكلام الحبوبه 😊😊😊😊

حسام بقي قاعد مع امه في بيت جده وجاء يوم الجمعه وجابو الشيله وكانت سماح قايمه بكل شي عملت لي اهل العريس بوفي مفتوح عشان تكبر اختها قدام نسابتها وجابو ثلاثه أطقم ذهب وستة غوايش ومن كل شي تمنيه تمنيه

وكان يوم جميل جدا طلعو اهل العريس مبسوطين من الاستقبال والكرم الشافو عندهم رغم بساطه حياتهم بس قدرو يظهر بمظهر سمح وندي الوقت كله ماده البوز ولمن رجعت البيت

نادتها عمتها ام حسام علي جنب وقالت ليها مالك يا ندي قالبه خلقتك اليوم كله لالالا يا
عمتو مافي شي بس مصدعه عشان كدا وفاجاتها ام حسام بسؤالها وقالت ليها انتي
بتحبي حسام صاح ارتبكت ندي وقالت ليها انا لا والله مافي حاجه زي دي بس حسام
يستاهل وحده احسن من دي ... كيف احسن منها يعني البت فيها شي كعب ونحن ما بنعرف
ببهبو لا يا عمتو ما القصد انا قصدي المستوي الاجتماعي يعني حسام مشاءالله عليهم
وضعه غير وهم مافي مستواه ... ومالو مستواها عشان يعني انهم فقرا حاجه زي كدا
... بس عمره الفقر ما كان عيب العيب انه نحنا نعاين للناس من فوق وما تنسي اني عرست
ابو حسام وهو ما كان عنده شي غير شهادته ورغم رفض اهلي وكلامهم لي انه ما ح اقدر
يعيشني في نفس مستواي وانه ما اقدر اعيش في اقل من مستو اهلي لأنهن كانوا ناس علي
قدر حالهم بس نسو انه القرش ماهو كل شي في حياه الناس اهم شي العيله الطيبه والسمعه
الكريمه واهو انا قدامك قروشي دي كلها واملاكي كلها من تعب راجلي واجتهاده وقرش واحد
من ابوي ما شلته وربيت حسام بقروش ابوه وفي النهايه اذا في فضل بعد الله سبحانه وتعالى
ح يكون لي ابو ساره لانه هو السبب انه ابو حسام يكمل تعليمه ويبقى مهندس قدر الدنيا وفي
حاجه عاوزك ما تروح من بالك انه دي بت عمه ودي كانت وصيه ابوه وطول ما انا عايشه
ما بخلي وصيه حبيبي وشريك عمري ما تتنفذ ... بس دي عيانه وممكن تموت في اي لحظه
... لا حول ولا قوه الا بالله دا كلام شنو الإعمار بيد الله مافي زول ضامن بعد ساعه يحصل
فيهو شنو وياريت تغيري من طريقه تفكيرك لانها ح اضرك انتي اول شي ... وسابتها ومشت
وهي مصدومه علي تفكير بت اخوها رغم انها متعلمه ودكتوراه صحي الجهل مافي الناس
المتعلمة الجهل الأكبر في المتعلمين العاملين نفسهم بفهمو وهم للأسف بهانم خساره يا اخوي
ما رببت وخليت بتك تربيتها امها علي الحقد والأناية

🌸🌸🌸 يوم الفرح 🌸🌸🌸

الكل مشغول وساره وهناء عند مدام سوسن الخفجي و رشا وسماح عند مدام هند حمدتو
وحسام ونزار وخالد مع بعض وحسام بعد الثواني عشان يقابلها ومرت الدقائق كأنها سنين
طويله ولمن جاء الوقت وطلعت ساره كانت زي البدر في ليله تمامه وهنا بقي ما قادر يتحرك
والكل بكورك ليهو عشان يمشي عليها بس هو مبهور بالشايفو دي ساره دي مرتي وهنا
اتذكر مرضها في ثانيه وانه ممكن في اي لحظه يفقدها بس لا هو مستحيل يخلي الموت يهدم
سعادتهم وحتى لو بقي في عمرها ساعه هو ح يعيشها معاها في سعادته استجمع قواه واخذ
نفس طويل ومشي علي بخطوات ثابتة ومع كل خطوه كان بثبت فيها لنفسه انه احسن قرار
اخده في حياته رغم اعتراض اهل امه وخاصه بعد ما عرفو بمرضها وانه كيف يعرس وحده
عيانه ووصل عندها وهي بتعاين ليهو مبتسمه وزى الكانت حاسه ببهبو وبشنو كان بفكر بس
هي قالت حتي لو بموت بعد دقائق ما بهمني لاني ح اموت وانا في حضنه ودا يكفيني مد يده
ومسك يدها وبأسها وقال ليها لو بيدي أهديك عمري بس عمري ما ح يكفي السعاده أيلي انا
ح اعيشها معاك مبروك يا قمر بضوي في سماي يا عقد من اللولي ملفوف حولين رقبتى يا

عشقي الابدي يا سعادتي ونور عيني بحبك بحبك بقدر كل لحظه عشتها معاك وح اعيشها
معاك يا تاج علي راسي وعشانك يا ساره انا ح اعيش حياتي كلها في سعادته ودنقر عليها
وطبع احلي بوسه فوق جبينها والكل بقي يصفق ويصفر والبنات بزغرتو وركبو كلهم العربات
وبقو لافين شوارع الخرطوم والعربات تزمز وبعدها مشو علي الاستديو واتصورو مع بعض
وفي اخر صورته طلبت ساره انها تتصور مع سماح ومدت ساره يدها لي اختها وقالت مين
عارف يمكن ما نلحق نتصور مع بعض تاني ونزلت دمعه سماح بس ما حبت تعكر فرحه
اختها وقالت ليها ان شاءالله ح نتصور وفي عرسي كمان ولا انتي ما حابه تتصوري معاي
في عرسي ... تفتكري ح اعيش لحد اليوم دا يا سماح ... بعد الشر عليك حبيبتي وان شاءالله
ح تعيشي وح تتصوري كمان ومعاك بنتك ولا ولدك ويقو يضحكو واتصورو وهم في حضن
بعض وطلعت احلي صورته وحسام واقف بعين ليهم وهو مبتسم وبعدها مشو علي الفرح
وبدت الزفه ودخلو الكل كان مبهور بجمالهم واي زول بيقول لانقين علي بعض وبعض الناس
متآثره وبقولو بس يا خساره العروس ممكن تموت في لحظه بس اي زول كان في الحفل كان
بدعي ليها أنهت تشفي وتعيش اخلي الأيام 🤔🤔🤔🤔

واشتغلت الاغنيه و رقصو عليها الاسلو وبعدها اتحركو علي الجاتو وقطعو هو وشربو بعض
العصير وهم مبسوطين والحفل اشتغل والكل مبسوط وبرقص وقيل ما الحفل تنتهي بنص
ساعه كانت ساره بترقص مع حسام وهي في قمه سعادتها بس المرض كان بنهش في
جسمها الضعيف والالم كل ماله زايد بس سعادتها كانت اقوي من نوبات الالم الكانت بتجيبها
بين اللحظه والتانيه وهي بتحاول ما تظهر وجعها لحبيب عمرها كانت عاوزه تسعدو في اجمل
ليله استناها من وقت بس نوبه الالم المره دي كانت اقوي بمليون مره من سعادتها
وووووو وقعت ساره واسودت الدنيا في عيونها

انه سرطان الدم، يتفاقم في بعض الأحيان، على الرغم من العلاج . ويتحسن الوضع في بعض الأحيان، أو يحدث تراجع . ويكمن ان يعاود المرض أحياناً . حتى عندما يحصل كذا ، فإن هناك العديد من العلاجات التي قد تساعد في علاج سرطان الدم، أو تساعد على العيش لفترة أطول . وانا دائما بطلب من المرضى المصابين بسرطان الدم الليمفاوي المزمن (CLL) ، فحصهم بشكل منتظم عشان اعرف اذا ما كان هناك أنواع تانيه من السرطان . عشان الناس البجيهم

يكون معرضين لخطر اكبر ب CLL الإصابة بنوع آخر من السرطان

اما انواع العلاج ح تكون كالاتي

زرع خلايا جزعيه

وعلاج بيولوجي

وعلاج إشعاعي

اطمن حسام لكلام الدكتور واطمنت ساره وزرع فيها آلامل ووكلت امرها لله سبحانه وتعالى

السودان

قاعده سلمى بتحضر التلفزيون وفجاءه جاء داخل عليها لؤي كان ليهو زمن اكثر من ثلاثه شهور واول ما شأفته صرخت وجرت عليه وحضنته وهي في حضنه عينها علي البت الكانت واقفه برا جنب باب الهول

والبت كانت حاسه انها ح تكون مرفوضه بينهم عشان كذا وقفت وما قدرت تدخل من غير لؤي ما يدخلها زحت من ولدها وقالت ليهو انت جبت معاك شغاله لي اتلفت علي البت وهو بقول لا يا امي دي كرستينا مرتي ... شنو عرست جنوبية وووووب علي وووووب علي وووووب علي الحقني يا راجل الحق شوف ولدك عمل شنو وبقت تبكي وجاء ابوه جاري

واول ما شافها كانت كرسيتينا خدوريه وخذرتها ناعمه زي الحرير وملامحها جميله وكانت في منتهي الاتاقه والعطر فايح منها زي ريحه الياسمين كانت جميله بكل معني الكلمه بلع الإبو ريقه وقال ليها اهلاً يا بتي اتفضلي وكان رده فعله غير متوقعه وهنا هبت فيهو سلمي وبقت تقول تدخل وين ابدأ ما تدخل بيتي ... يا امي كرسيتينا مرتي وإذا طلعت انا بطلع معاها و هو عارف معزته عند امه مستحيل تقبل انه يطلع وحست سلمي انه مسكها من يدها البتوجعها وسكتت ومشت قعدت وهي لاويه خشمها دخلت كرسيتينا وقعدت جنب لؤي وهنا لؤي قال ليهم طبعاً يا جماعه كرسيتينا عايشه حياتها كلها في أمريكا وعندها الجنسيه كمان واول ما اتخرجت وبقت دكتوراه حبت تجي تشتغل في بلدها وتخدم ناسها ... مشاءالله يا ولدي يعني عرسك دكتوراه ... اي يا ابوي كرسيتينا احلا وأحسن دكتوراه في جوبا كلها وشويه وقام الإبو ساق مرته ودخلو جوا يعني انت موافق علي العملو ولدك ... اسمعي يا سلمي ولدك كبير وواعي يعني مسؤال عن تصرفاته وياخ انتي تحمدي ربك انه هي قبلت بولدك الجاهل وهي دكتوراه قدر الدنيا وما تنسي انها سودانيه زيها زيك وكلنا واحد ... بس يا راجل دي ما علي دينا ... عادي الرسول صلي عليه وسلم قال لكم دينكم ولي دين ويمكن ولدك يخليها تسلم ويكون ليهو اجر كبير وإذا علي اللون مؤذن الرسول صلي الله عليه وسلم كان اسود والببت سمحه وما فيها شي يعيبها بظلي الكلام الفارغ واتمني ليهم انه ربنا يسعدهم ومرت الأيام وكل يوم بمر كانت كرسيتينا بتثبت ليهم انها الأفضل ولحد الان ما قدرت سلمي توري امها ولا اختها وفي يوم مافي زول في البيت ويرتفع السكري عند سلمي وتجي داخله كرسيتينا البيت وتلقاها مرميه وتساعدتها وتعالجها ولمن بقت كويسه عرفت انه مرت ولدها عالجتها وبقت المعامله غير وبقت تدخل قلب سلمي ومره في ساعه عصريه جاتها وقالت ليها حبيبتي اذا ما عندك شي المغرب حابه اسوقك لي امي واختي عشان أعرفك عليهم حتي ولو عندي شي يا ماما اجله عشان خاطر ك انتي تأمري بس ... وحضنتها عليها لأول مره وقالت ليها الف مبروك وربنا يسعدكم يارب امين امين امين يا ماما

اهلاً يا سلمى كيفنك وين ما قاعده تجي... اسكتي يا محاسن اصلا ما تساليها من يوم ما ودعتي ساره مشيتي بوشك بقيتي جافيه يا بتي ما فيك خير... ليه يا امي انا كل يوم مَش قاعده اكلمك بصبح وبمسي عليك.. اي بتكلميني ما كدبتي بس ما بقيتي تجي تشوفيني يا خساره علي تربيتي فيك كدا اترزعي اقعدي اقعدي بس وتاوقت برقبته تشوف ال بوراء بتها ودي منو المعاك انتي جبتي ليك شغاله جديده ولا شنو... بلعت ريقها. وشالت نفسها وبقت تضحك ضحكه غلب وقالت بخوف دي يا امي دي الدكتوره كريستينا... دكتوره وجايبه الدكتوره معاك لشنو قالو ليك عندنا زول عيان ولا شنو..... لا يا امي بعد الشر عليكن بس قصدي دي مره لؤي ولدي.... وفكت الحبويه صرخه بي اعلي صوت عندها وبوووووووب علي وتاني ووووووووب بتقولني شنو انتي

وجو جارين رشا وسماح من جوا يشوفو الحاصل شنو لانه صراخ الحبويه خلعهم افتكرو في حاجه حصلت لي ساره ومحاسن خنت يدها في خشمها من الخلعه والحبويه بقت تكورك كيفن تعرضي لولدك من غير ما تشاورينا... يا امي والله انا زي زيكم دخل علي وهي معاه وما عرفت اعمل شنو في النهايه دي رغبته وهو حر... اطلعي يابت من قدام وشي وسوقي التيس الجايهوه معاك دا... امي اسمعيني والله كريستينا بت كويسه ودكتوره كمان... يابت انا مالي كان دكتوره ولا حتي وزيره قلت ليك اطلعي من هنا ومن الليله لا انتي بتي ولا انا بعرفك طالما ما عملت خاطر لكبير يبقي مافي شي تاني انتظره منك وبقت تخبط في نفسها وتبكي... اتلفتت سلمى علي اختها وقالت ليها محاسن ما تقولي حاجه... امي خلاص مافي داعي تكبري المواضيع الحاصل حصل وهي سلمى ذاتها زيها زينا ما كانت عارفه... محاسن انتي تسكتي فاهمه ولا اقسام بالله العلي العظيم اسيب ليك البيت دا واطلع ما تعرفو طريقي تاني وين... خلاص خلاص الحبويه معصبه شديد ولمن تحلف خلاص مافي زول بقدر عليها تاني بس محاسن مسكت يد سلمى اختها ومشت بيها بعيد وقالت ليها أمشي خلاص يا سلمى انتي عارفه امك يومين كدا وبتكون هدت وتعالى ليها تاني... وبكت سلمى شديد وكريستينا واقفه ساكته ما عارفه تتصرف كيف بس اتلفتت علي الحبويه وقالت ليها ممكن يا خاله تسامحي ماما سلمى لانها ما ليها ذنب اذا في حد غلطان يبقي انا لاني ما فكرت انه انا ح اكون مرفوضه من الكل ومهما كان منصبى ولا حسبي ولا نسبي ح افضل وحده من الآلاف الكانو بشتغلو عندكم يوم في الأيام بس حابه أقول ليكم كلكم حاجه عمر الشغل ما كان عيب العيب انه نفرق بين الناس ونضهدهم بالشكل المهين دا ونبيكم قال: ألا لا فضل لعربي على عجمي ولا لعجمي على عربي ولا لأحمر على أسود ولا لأسود على أحمر إلا بالتقوى، إن أكرمكم عند الله أتقاكم.

نعم انا مسيحيه بس قرئت كثير عن الاسلام فإسلامكم بقول كدا انتو كيف تعملو عكس كلام نبيكم الكلام كان زي القنابل علي رؤوس الكل والحبوبه كأنها صبت فيها مطره ومع ذلك ابت تتنازل عن رائها بس كريستين ما انتظرت زول يرد عليها قالت الكانت عاوزه تقولو وطوالي مرقت عاينت محاسن لأختها وقالت ليها حصلها وخلي امي علي وانا يومين وبتصل عليك انتي عارفه امي بتكورك تكورك بس قلبها ابيض وكلام البت اثر فيها بس هي بتقاوح مرقت سلمى وحصلت مرت ولدها ومشو وجات محاسن ولقت رشا بتعلق علي الموضوع ادتها تحميره خلتها سكتت طوالي ...

🌸🌸🌸 لندن 🌸🌸🌸

مشت ساره علي العلاج والتحسن بان عليها والفضل بعد الله سبحانه وتعالى يرجع لي حسام كان معاها علي طول وبدعما وبدا شهر العسل الا تاخر بسبب مرض ساره وسافرو جزيره كدا يقضو فيها يومين واول ما وصلو الفندق ودخلو الغرفه خت حسام الشنط وقال ليها انا اخذ حمام سريع واجيك هزت برأسها وابتسمت وهو شال الروب ودخل الحمام وهي فضت الملابس من الشنط وختتها في الدولاب وطلعت ملابسها وقعدت تنظره يطلع من الحمام واول ما طلع كان ماسك البشكير بنشف شعره الكان نازل علي جبينه مشي عليها وطبع بوسه علي خدها وغمز ليها وقال يلا ادخلي اخدي حمام عشان عاوزك تكوني فائقه كدا ضحكت وقالت ليهو انا بالجد ما عارفه أشكرك كيف ..تشكريني ليه وانا عملت شنو يستاهل الشكر ...نزلت رأسها علي الارض وقالت ليها بخجل كفايه انك استحملت الوقت دا كله ... علي شنو يعني استحملت وهو بضحك عارف قصدها بس عاجبه خجلها وأنها ما قادره توضح ليهو ...حسام بطل ياخي انت فاهم ...لالالا ما فاهم شي فهميني ...خدودها حمرت وبقت تفرك في يدها وهي بتتمتم وتقول بصوت واطي خلاص يا حسام ما تخجلني ...ههههه طيب خلاص يلا بقي عشان انا مشتاق ليك موت وما قادر استحمل اكثر من كدا ... جرت منه وهي ميته من الخجل ودخلت اخدت حمام دافئ أنعشها وطلعت برا من الحمام كان الحمام مفصول عن الغرفه باب بدخلك علي صاله فيها مرايا والدولاب الختت فيهو الملابس طلعت الروب الأبيض وليسته واتمكيجت وفكت الشعر بقي نازل علي أكتافها واتعطرت بالخمرة والصندليه وكان معاها مبخر بالكهرباء جابتو ليها سماح شالت بخور الصندل من الشنطه وبخرت نفسها وجات مارقه بس رجعت تاني وقفت تعالين لنفسها وشالت عطر فرنسي عطرت نفسها تاني وختت حته خمرة وراء اضانينها وانتبهت انها لابسه شبشب الحمام ضحكت ورجعت تلبس شبشب من الفرو الأبيض ودا كات من زوق حماتها وهنا تسمع صوت حسام الكان بكورك ساره وينك دا كله حمام اطلي ولا أجيك ...ضحكت وقالت ليها او عك تجي انا خلاص مارقه ليك يا عمري وجات مارقه كانت زي القمر في وسط السماء قمر يضوي الارض المظلمه واول ما شافها قام ناظي من السرير زي المجنون وقف قصاها وهو بصفر ومشى عليها وهو كان لابس البجامه البيضاء والسكسوكه ح تاخذ منه حته ولا شعره الكان زي الحرير ونازل علي جبينه ولا ريحه

العطر الكانت بتفوح منه مسكها من يدها وقال ليها في حد قال ليك قبل كدا انت حلوه ... ردت
بخجل وقالت ليها ايوه اه منو دا اه قولي ضحكت وقالت ليهو سمعتها منك يوم العرس
.... ههههههه ياخ مالك عاوزه تجننيني بس أقول ليك بصراحه انا يوم العرس كنت متوتر وما
حسيت بفرحه العرس ودا بسبب مرضك وتعبك بس الليله انا حاسي انه دا يوم فرحي والله يا
ساره انا كان علي اجيب ليك قطعه من السماء لانك غاليه علي وبحبك وبموت فيك وانا
كمان بحبيبيبيبيك قلتي شنو ... قلت ليك وانا كمان لالالالا البعدها البعدها ردت
بدلع وقالت ليهو بحبك يا إخوانا يا هوووووي انا ما بستحمل دا كله وطوالي شالها وهو
بكورك وهي تضحك وتضحك ومشى بيها علي النور وغمز ليها انها تطفيهو وهي طففتو
وتكون الغرفه علي النور الباجوره ويختها علي السرير براحه ويمد يده ويطفئ الباجوره
كمان



تاني يوم الصباح قامت ساره من النوم وتعاين ليهو وهو كان نايم خت يدها علي خده
ومررتها بكل حنيه ونزلت رأسها وباسته علي خده وبعد داك اتسحبت براحه ودخلت ملت
البانيو مويه دافيه وقلعت الروب ودخلت في البانيو ورقدت وهي بتلعب في المويه بالصابون
كان محتاجه للاسترخاء بعد ليله طويله (...). وطولت في الحمام كانت عاجباها المويه وبعد ما
خلصت طلعت واستشورت شعرها ولبست اسكيرت قصير اسود ومعاه بلوزه حمالات
بالأخضر ورفعت شعرها بالمشبك ل فوق وجاء الباقي مرمي من وراء علي أكتافها ونزلت
حاجه بسيطه بالجنيه واخذتت روح بيحي فاتح وظبطت نفسها واتعطرت وجات مارقه متخيله
انه حسام لسه نايم بس تلقاه مافي وقبل ما تفكر انه ممكن يكون طلع يحي هو مارق من
الحمام ... انت انت استحميت ووين الحمام بهنا ... مشى عليها وقال اول صباح الخير
وصباحيه مباركه يا أعز الناس صباحو حبيبي بس بالجد انت استحميت وين
.... ههههههه حبيبيتي في حمام هنا تاني وكمان مطبخ انتي امس ما شفتيهو كويس شكك
انا انا امس عيوني ما شافت الا انت يا ابووووي انا ما بستحمل الكلام دا يا إخوانا والله
والله بنتحر ليك هنا وغمز ليها وقال ليها رانك شنو ... فهمتو هي طبعا وطوالي ردت
عليهو وقالت حسام بعدين انا جعانه عاوزه أموت من الجوع ... حبيبيتي جعانه وانا واقف
احسن وأحلي فطور يجيك لحد عندك وعندك واحد فطور وصلحه هههههههه بقيت عامل
زي المصريين الشغالين في القهاوي ... عندك واحد شيشه وصلحها ... حاضر يا معلم وبقو
الاتنين يضحكو وهنا قالت ساره سحس يلا بقي البس عشان بالجد جعانه ما عارفه بعد علاج
الدكتور دا حاسه انه شهيتي رجعت ... طيب الحمدلله خلاص يا عمري ثواني وبخلص ونطلع
نأكل ليه ما ح نأكل هنا لالالالا اكل شنو هنا نحنا نمشي لمطعم كدا انا جيته قبل كدا
عندهم سمك مشوي رهيب شديد جيتو مع منو اتكلم ... ياخ مالك انتي عاوزه تاخريني
مش تخليني البس عشان نطلع نأكل طيب طيب زوج من السؤال بس بقبضك وبقي
يضحك ومشى لبس وهي مشت لبست بنظلون جينز ازرق فاتح مع البلوزه الحمالات الكانت

لابساها مع الاسكيرت ومعاهم بالطو من الجلد طويل لحد الركبه ولفت طرحتها علي شعرها
ولبست بوت اسود وشالت شنطتها وجات مارقه تنتظره وبقت تقول الحمد لله ياربي علي
السعاده المنحتني ليها بس الله يستر انا عارفه حظي ما بفرح كدا والا تحصل لي حاجه هزت
رأسها وقالت اعوز بالله دا كلام شنو البقولو الله ما يجيب الا كل خير وجاه مارق سحس وهو
لابس بنطلون جينز ازرق فاتح ومعاه تيشرت ابيض وجاكيت جلد اسود وجزمه سودا وريحه
العطر فاичه فرح منه مشي عليها وحضنها شديد وقال ليها الله لا يحرمني منك يارب وشال
مفتاح عربيته وتلفونه ومسكها من يدها ومرقو فتح العربيه وانتظرها تركب وقفل الباب
وجاء عشان يلف تلفونه رن يلقاها امه رد عليها وهو مبسوط اهلين يا احلي ام قولي لي
مبروك ولدك شرفك امس ... الف مبروك يا ولدي ... امي مالك فيك شنو صوتك متغير كدا
حصل شي ... والله يا ولدي ما عارفه أقول ليك شنو ... وقف وهو كان مادي يده عشان يفتح
الباب ويركب بس كلام امه خلاهو وقف امي اتكلمي مالك فيك شي انتي كويسه ... انا كويسه
بس جينا جات وسالت عليك ... أتحرك حسام ومشى بعيد وقال ليها جينا وجات لشنو ومالها
بي ... ما عارفه قابلتها السكرتيرة ورتها انك مع زوجتك في الجزيره ... شنو انتي بتقولي
شنو وكيف الذفت دي تقول ليها عن مكاني انا غيرت تلفوني عشان ما تعرف توصل لي ... يا
ولدي انا جيت بعد ما البت ورتها وقالت جايه عليك ... لا حولا ولا قوه الا بالله ليه يا امي ليه
بس ودا حصل متين ... أمس بالمساء ... حرام عليك يا امي وليه ما كلمتيني من بدري يا
ولدي اتصلت عليك بس انت ما كنت بترد علي ... يا الله وخت يده علي جبينه وهو صاح
بالليل كان التلفون بضرب بالليل وهو ما اشتغل بيهو حسي انه رأسه عاوز يطرشق ...
طالما هي اتحركت من الليل بتكون وصلت الجزيره وياااااااا علي غباي هي بتعرف انا لمن اجي
هنا بنزل في الفندق دا ساره بتعαιν ليهو من جوا العربيه وما سامعه هو بتكلم شنو بس
الشافتو انه شكل حسام اتغير شديد ولف حسام وأدها ضهره وبقي يتكلم مع امه عن جينا هنا
ساره لقت القصة طولت قامت فتحت العربيه ونزلت وبقت ماشه عليهو

خنت يدها علي كتفه وقالت حسام اتلفت عليها مخلوع لمن التلفون وقع منه ... اندهشت ساره من هجمه حسام الكانت غريبه هو حس انه اتصرف تصرف ما ليهو داعي نزلت علي الارض ورفعت التلفون وكان صوت امه واضح وهي بتقول الو الو خنت السماعه في اضانها وسمعتها بتنادي عليهو حسام انت وين مالك ما بترد من تكون جاتك وهنا بلعت ريقها بصعوبة ورأسها بقي يودي ويجيب قصدها علي منو ما تكون كانت بتتكلم فيني ردت وقالت دي انا يا ماما .. اتهجمت الام وخافت تكون ساره سمعت كلامها بس ساره حست بيها وحاولت تتكلم معاها بهزار وقالت ليها شنو يا ماما لحقتي تشتاقي لينا ... اي اي طبعا اشتقت ليكم ياخ تعالو وبقت تتمم انا بصراحه حجزت عشان نساfer تركيا اصلا عندي شغل هناك وقلت يعني قلت نتفسح ونغير جو وانتي بالذات محتاجه التغير دا ولا رائك شنو وقبل ما ترد عليها حسام جسمه كله عرق رغم بروده الجو ما عارف الكان بدور بين امه وساره بس ساره طبيعيه اكيد امه قدرت تكلفتها عشان ما تحس بشي فقلت ساره التلفون وعانيت ليهو مالك حبيبي انت مالك ما موافق علي كلام امك ولا شنو ... كلام كلام شنو ... عشان موضوع سفرنا لتركيا ... تركيا اه اه تركيا صاح ... في شنو يا حسام مالك مرتبك كدا وما علي بعضك في شنو غير موضوع تركيا ... لالالا ابدأ بس بس قاطعته ساره وقالت ليهو يا سيدي اذا انت ما موافق علي مشيه تركيا خلاص رغم انه امك حجزت التذاكر وبصراحة السفره مغريه بس القعه هنا حلوه شديد وجوها حلو ... صح صح والله يلا نمشي عشان نأكل انتي مش جعانه ... اي جعانه يلا طيب وخلاص ما تشغل بالك انا بتصل وبعتر من ماما بقول ليها سافري براك ... لا حبيبي مافي داعي وانا حاسي انك نفسك تسافري تركيا ... بصراحه ايوه دايمًا بشوفها في المسلسلات التركييه واي يا سحس فيها مناظر تجنن ... طيب حبيبي نأكل ونرجع طوالي عشان نساfer ... طيب بس نحنا امبارح جينا واكيد السفر ما ح يكون الليله ولا بكره نقعد اليوم وبكره المساء نساfer وطبعا خنت ساره العقده في المنشار ليهو هو حاول يكون طبيعي ويسيطر علي نفسه قدر ما يقدر وعشان ما يبان عليهو شي و انه عاوز يهرب من هنا وهو لو لقي هسي يدور ويرجع ... وبقي ماشي وهو تفكيره في جينا والممكن يحصل اذا جات وبقي يفكر ووووين لحد ما وصل لحد ممكن يكون فيهو حل مؤقت والحل كان انه يتصل عليها ايوه لازم اتصل عليها اثبتها قبل ما تصل ويحصل الخايف منه وصلو للمطعم ونزلو زح الكرسي ليها وقدها واستأذن انه يمشي يجيب سجاير ويجي هي وافقت وقعدت تعابن للناس الجنب البحر وكيف ماشين بالبكيني عادي قدام الناس وقعدت تتفرج وبهناك طلع تلفونه واتصل علي جينا الو هاي جينا انا حسام. او حسام where are you ... انا في لندن ... ماذا انت في لندن ولكن لماذا قالو انك في الجزيره صاح انا كنت ماشي بس حصلت ظروف ورجعت من الطريق ... او كي او كي انا الان في الطريق إليك ولكن سأرجع الان

لكي اراك حبيبي ... ايوه انا عارف انك في الطريق وعشان كذا اتصلت عليك عشان ترجعي ليولكن كيف عرفت انني ساتي إليكمن ماما اتصلت بي وكلمتني ...اوكي حبيبي | **miss you so much baby... Me too lovely** قفل منها وشال نفس وختاه وفجاءه انزكر ساره انه أتأخر عليها جري عليها لقاها قاعده زي ماهي وساره طبعاً ما مات عندها غيره عشان تنتظره حبيبي مالك اتأخرت ...لا ما تأخرت ولا شي عاينت لي يده لفتها فاضيه استغربت وقالت ليهو وينو السجاير المشيت عشان تجيبوارتبك وقال ما لقيت حبيبتي ما لقيت اه تأكلي شنو ولا تخليني اختار ليك... طيب اوكي اختار ما انا بعد كذا ح أخليك تختار لي اي حاجه في حياتي ...تسلمي يا عمري وطلبو الاكل وقعدو ياكلو وبعدها مشو يلفو شوي في المحلات وطول الطلعه دي وحسام ما قادر يكون مبسوط ودا كله عشان جينا وجاء المساء ومشو علي الفندق وهو عاوز يمشي بس ما عارف يقول ليها شنو هي حست بيهو وقالت ليهو حسام خلاص نوم ليك كم ساعه عشان نرجع ...الالالا مافي داعي للنوم انا فايق يلا نتحرك ...اوكي براحتك وقامت لمت الحاجات وهو ساعدها وبعدها طلعو وصلت جينا وما لفتو في المكتب مشت علي البيت وكان عندها مفتاح والدنيا كانت ليل ... دخلت وام حسام كانت نايمه فوق ما حست بيها ولا جابت خبر قابلتها الشغاله وهنا سألتها عن حسام قالت ليها انه حسام مافي ردت جينا وقالت مافي مشكله هو عارف اني ساتي اليه من فضلك احضري الي النسكافيه الي غرفه حسام ومشت جوا الغرفه واترمت علي السرير كانت حابه تعمل مفاجاه لحسام

Mam mam mam... اتخلعت ام حسام وقامت علي حيلها لقت الشغاله واقفه بتصحي فيها دعكت عيونها وقالت ليها what happened ردت الشغاله و قالت ليها Miss Gina here.... What ساره وتلفون ساره مقبول هنا عاوزه ترجع تاتي لحسام بس حسام ما برد اتصلت علي انا خلاص قريب من البيت ...او عك او عك تجي جينا هنا ...شنو ضرب يده في الدير كسون وعاوز يكورك بس ساره نايمه بقي يتكلم بصوت واطي طيب والعمل يا امي ... العمل انت تشوف حته تمشي ليها وانا ح انزل اتكلم معاها وأشوف يمكن اقدر اتصرف معاها بس كله منك قلت ليك البت دي ح توديك في ستين داهيه اذا عرفت انه انت اتزوجت ...طيب يا امي انا نهيت كل شي معاها من زمان وانتي عارفه بس يحس بساره اتلفت عليها لقاها بتتقلب في الكرسي الكانت مرجعاهو لوراء ... طيب طيب تتصرفي معاها واتصلي علي او رسلي لي مسح وقفل مع امه وبقي سائق ما عارف يعمل شنو ... صحت ساره ورجعت الكرسي لقدام وقالت ليهو اه وصلنا يا حسام ولا لسه ...ايوه وصلنا يا عمري ... يعني قربنا من البيت لاني تعبانه شديد وما مصدقه اترمي في السرير متين النومه في الكرسي متعبه وحاسه جسمي كله اتربط طيب رايك شنو انه نحنا نمشي نأكل وبعدين نمشي البيت ...لالالا يا حسام ما قادره امشي اي مكان خلينا نصل البيت وناكل هناك اي شيما قدر يصر عليها لانها ح تشك فيهو بقي ماشي ويدخل بشارع ويطلع بشارع منتظر تلفون امه عشان تكلمه انها اتصرفت والام نزلت سلمت عليها وقعدت معاها وكانت جينا بتشرب في النسكافيه والام ساكته ما عارفه تتصرف كيف ومرت دقائق زي السنين وهنا جاء تلفون لجينا وبعدها وقفت وقالت ليها انه جاها مشوار ضروري وأنها ممكن تتأخر ووصتها انه تخلي حسام يجيها في شقتها اول ما يصل وباستها وطلعت شالت الام نفس وختته وطوالي رسلت رساله لحسام عشان يرجع وحسام كان لافي في الشوارع وحمد ربنا انه ساره ما بتعرف البلد كان زمان عرفت انها علي بعد أمتار من البيت طوالي مشي علي البيت ولمن وصلو سلمو علي الام وطوالي استأذنت ساره عشان تدخل تاخذ حمام وتنامما ح تأكلي ...لا يا ماما انا جعانه نوم يلا تصبحو علي خير ...وانتي من اهله مشت دخلت اخدت حمام وحسام دخل وراها ودخلت ساره الحمام ولمن طلعت لقت حسام منتظرها وهنا ابي ما يخليها تنام وقعدو مع بعض وهي في حضنه قالت ليهو الليله انت ما طبيعي في حاجه حاصله معاكانا لالا مافي شي والله. خلينا هسي في الجو بتاعنا وطفئ النور

وصحت من النوم وهي ما عارفه نامت قدر شنو المهم لمن قامت ما لقت جنبها حسام عاينت لساعه لقتها اتناشر بعد الضهر قامت دخلت الحمام ولبست وجات مارقه مافي كان زول في البيت غير الشغاله طلبت منها الفطور كانت ساره الانجليزي بتاعها ما علي قدر كدا يعني تعليم المدارس المهم الشغاله فهمتها وعملت ليها الفطور فطرت وبعدها شربت العصير وبلعت

الدواء ومشت تحت تلفونها في الشاحن لانه من أمس مقفول بعد ما بطاريتة خلصت وهي بتلعب فيهو وكانت عاوزة تتصل علي ناس امها ومن كتر استعجالها اتصلت عليهم والتلفون علي الشاحن وجرس ووين حتي ردت امها اااااا ازيك وحشتيني والله... هيببيبي ساره ازيك وكيفك وكيف أحوالك... انا كويسه الحمدلله يا امي بس فداكم والله... ونحنا كمان والله البيت مسيخ بدونك... وتسمع صوت حبوبتها بتقابض في التلفون... امي دي حبوبه صاح... اي يا ساره وعاوزة تقلع مني التلفون قلع نفسها تسمع صوتك... يا حليلها اديني اسلم عليها... هاكي الوووووو سرويه حبيبي ازيك... حبوبه كيف والله ما تشوفي قدر شنو مشتاقه ليك ولي الشكل معاك هههههه... واتي كمان يا سرويه يا حليلك وحليل ونسلك وهزارك... اه يا حبوبه اديني الشمارات... حبوبه والشمار طبعا اكثر زول ممكن يحكي ليها الحاصل بالتفصيل الممل واه عاوزة تعرفي شنو يا ست الكل بس قبل ما اوريك عاوزة اعرف شمارك انتي شنو... اه عاوزة تعرفي شنو... عاوزة اعرف كل شي اه ما بقيتو ثلاثه... هههههه متين اصلو يا حبوبه لسه بدري... كيفن بدري مافي حاجه اسمها بدري يلا احملي وجبيي لينا ساره صغيره... ان شاءالله يا حبوبه ان شاءالله دعواتك بس... داعيه ليك من جوا قلبي ربي يسعدك وينور طريقك ويكمل شفاعك علي خير يارب وترجعي مجبوره خاطر... ياااااا الله علي الدعوه دي بالجد محتاجه ليها... اه نسيبتك كيف ما تكون معزباك... لا والله دي شيلاني من الارض شيل... اه وحسام الهناء كويس... الحمدلله يا حبوبه كويسين اه انتو الاخبار عندكم شنو... اسكتي اسكتي الاخبار كثيره يختي نديك اول قنبله... خير في شنو قنبلتي... لالا لالا ما تقلقي واتعدلت الحبوبه في قعدتها وقالت ليها ما شفتي لوي السجمان الرمضان عمل شنو... مالو عمل شنو... عرس ليهو وحده جنوبيه وجاء بيها لي امه وقال شنو خالتك جايه ماده شلايفها وفرحانه وقال شنو عاوزة تعرفنا بيها... وب علي لكن لوي بالغ عدل كدا... اه وعملتي شنو انت... عملت شنو طردتهم طبعا الاتنين... وما شفتي رشا ما حامل... بالجد مبروووك والله يا حليلهو خالد كان نفسه في حته عيل... اي يختي وشايلها شيل كأنها اول زول يحمل في الدنيا... ما فرحان يا حبوبه خليلهو يفرح عليك الله... وفي زول منع الفرع منه يفرح بس ما لدرجه يخدمها... امي اديني اكلم البت شويه قبل ما الخط يقطع... اسنتي يا محاسن كدا دقيقه خلينا نتم ليها باقي الشمارات وأخذت ليها تكيه في السرير وبقت تقول ليها وما شفتي تهاني ما راجلها عرس فيها واداهها بمبه... لا ما تقولي انا سافرت من هنا وحصلت بلاوي من هنا... واسكتي والعريس بتاع لندن العاوز يعرس بت سعاد قريبه تهاني اقصد العرسها... اه ماله دا كمان مش هي سافرت ليهو... اي سافرت ويا خساره شهر ورجعت من هناك وهي مطلقه... اعوز بالله لشنو... اسكتي ما اتضح انه عريس الهناء متزوج وحده خواجه حسنت ساره بنقده في قلبها ما عارفه ليه لمن سمعت الكلام دا قلبها وجعها المهم اتونست مع الحبوبه وكلمت امها وجات سماح من الشغل ولحقتها واتكلمت معاها وبعدما قفلت منهم قامت وفتحت التلفزيون وقعدت تقلب فيهو وووووين لمن جات حماتها وهي معاها التزاكر حقت تركيا وقعدو يتونسو مع بعض وعلي الساعه خمسه جاء حسام وباس ساره علي خدها وقعد معاها وهنا الام طلبت من الشغاله تخت الغداء واتغدو وأكلت ساره علي خفيف لانها كانت مأكله اصلا متاخر وبعد الغدا الام طلعت فوق وشويه ولحقها حسام واول ما دخلو اتلفت الام عليه وقالت اه اتصرفت معاها كيف... والله يا امي ما عارفه اعمل شنو معاها البت دي لصقه... وهنا ساره كانت عاوزة تلفون حسام عشان

تشيل منه رقم خالد لانه لمن حسام غير ليها تلفونها كل الأرقام طشت وهي ما حافظه الا
تلفون امها وهي عاوزه تبارك لخالد وما معقوله تتصل علي امها عشان تكلم خالد واكيد خالد
حيكون مافي المهم طلعت السلم وبقت تطلع سلمه سلمه وهناك المناقشه شغاله بين الام
وحسام وهنا قالت ليهو الام بس يا حسام البت دي لازم تنهي معاها كل شي وتفهمها انك
عرست عشان تقنتع وتمشي في ستين داهيه وهنا قربت تصل الباب وهنا حسام بقب يقول لي
امه انا فهمتها قلت ليها انه نحنا ما ينفع نكمل مع بعض ولازم نطلق ودا كان قبل ما اسافر
السودان بس هي قالت بتفكر وهسي لمن مشيت ليها قالت انها ما عاوزه تتطلق أعمل شنو
.... دي مصيبه وخاصه لو عرفت انك متزوج دي ممكن تحبسك لانه القانون هنا ما بسمح الا
بزوجه واحده

ووقفت ساره وهي بترجف بعد ما سمعت الكلام بي اضانها مافي زول قالو ليها كانت نفسها تصرخ وتدخل عليه وتمسك فيهو وتقطعه بسنونها بس اتزكرت وصيه امها ليها اي شي لازم تفكر فيهو قبل ما تقرر. عشان الحياه الزوجيه ما لعبه و رجعت ونزلت علي السلم والدموع ماليه وشها وقلبها كأنه سكينه مغروزه فيهو وصلت غرفتها وقعدت وختت يدها علي وشها وبكت وبكت لمن حسنت انها ارتاحت نوعا ما بس وشها بقي محمر وعيونها زي كاسات الدم جاء داخل حسام عليها وهو بقول ليها سرو امي جابت التزاكر شفيتها ... ردت عليه وهي رأسها في الارض وقالت ليهو ايوه شفيتها ... انتبه انه في صوتها نبره غريبه مشي قعد جنبها وقال ليها مالك فيك شنو يا عمري ... وبقت تقول في نفسها بتقول يا عمري يا كداب يا غشاش يا منافق بس كانت نفسها تسأله ليه عملت فيني كدا يا حسام انا بالجد حبيتك ... ساره مالك فيك شنو ما بتردي ليه ومسك يدها لقاها زي الثلج وقف مخلوع وهو بقول ليها انتي تعبانه حاسه بشي نمشي الدكتور ... زحت يدها منه براحه وقالت ليهو كلمه واحده بس لا نزل قعد ليها في الارض ورفع رأسها لقاها بتبكي ... قلبو وقع من الخوف عليها كان بحبها من جوا قلبه مالك يا عمري لشنو بتبكي انا زعلتك امي زعلتك فيك شنو ... لالالا ابا بس اشتقت لناس امي وهنا بقت تبكي زياده ... قام قعد جنبها وحضنها وقال ليها انا مَش كل اهلك انا وعدتك عمري ما بحسسك بالوحده وما ح احسسك انك بعدتي عن اهلك لاني ح أكون ليك اب وأخ وام واخت وحبوبه كمان اتلفتت عليه وقالت ليهو بالجد ممكن تبقي لي كل اهلي ولا دا كلام ساي ... لا يا عمري انا ما بقول كلام ساي عمري كدبت عليك في شي كان نفسها تقول ليهو انت اكبر كداب وممثل كمان بس سكتت كانت عندها امل يحكي ليها عن كل شي براه يمكن تقدر تسامحه ... بس للأسف هو ما اتكلم بس كان يحاول انه يطلعها من المود الأهي فيهو ... وقعد يهدي فيها ويهدي وطلع تلفونه واتصل علي خالد وأتكلم معاه وأدها التلفون مسكت التلفون واتكلمت معاه وباركت ليهو وأدها رشا بَارَكْت ليها وقعدت تتونس معاهم وسالت عن حبوبتها وامها خالد قال ليها انه خالتك رقدوها المستشفى ومشو ليها ... فيها شنو خالتي مالها ... والله يا ساره انا جيت هسي منهم قالو عندها شريان مقفول ولازم يعملو ليها العمليه وانا جيت ارجع رشا لانها تعبت شويه والدكتور كان قال ليها ما تتحرك كتير لانه حملها ضعيف .. لا الف سلامه عليها وان شاءالله ربنا يتم حملها علي خير خلاص أن بتصل علي تلفون امي هسي اشوف دخلوها العمليه ولا ... علي العموم انا راجع ليهم هسي لو ما ردت عليك انا اول ما اصل هناك بتصل عليك تكلمهم ... لالالا ما تتصل انت اعمل رنه بس وانا بارجع ليك طيب علي خير حبيبتي بس عاوزه اسالك انتي مالك صوتك متغير كدا ... انا لا ابا بس عشان يا دوب صحيت من النوم انت ولا يهمك ... طيب حبيبتي يلا سلام .. سلام يا اخوي في شنو خالتك مالها ... وقعدت تبكي ما صدقت انه تلقى سبب لبيكانها ... خالتي تعبانه ودخلت تعمل عمليه في القلب ... لا الف سلامه عليها ان شاءالله تبقي بخير انتي بس ما تبكي وادعي ليها ومشى كلم امه بموضوع خاله ساره وجاءت عليها وحضنتها وبقت تهدي فيها وتقول ليها ربنا يطمنك عليها يارب ... ان شاءالله

وظلعت تلفونها من جيبها واتصلت علي امها وما كانت بتتردد اتصلت علي سماحالو سموحه ...ساره كيفك يابت مالو صوتك كدا ...خالد كلمني علي خالتو ومن ساعاتها انا ما قادره ابطل بكاء هي كيفها هسي ...يا حليلك يا ساره طول عمرك حنينه والله هسي دخلوها العمليه واه نحن منتظرين ادعي ليها يا ساره قالو العمليه خطرته ...الله كريم ربنا يرفعها وتقوم بالسلامه امي وين اديني ليها ...طيب دقيقه انا تحت خليك معاي اه انا طالعه عليهم وصلت لي امها هاك يا اميمنو ...دي سارهما تكونو كلمتوها دي في غربه وهي لنفسها عيانه ...والله انا ما كلمتها كلمها خالد ...لا حولا ولا قوة الا بالله ليه يا خالد اختك الفيه مكفيها ومسكت التلفون واول ما قالت الو ساره بقت تبكي وتبكي وتبكي وتبكي والام تهدي فيها وتطمئنها علي خالتها ووين لمن هدت وعرفت انه العمليه ح تعملها كريستينا مره لوي واطمنت لمن عرفت انها قاريه الطب في أمريكا وادتها الحويه الكانت منهاره اكثر من اي زول حبويه ما تعلمي كدا بتعزبيني والله بي بكاك دا انا براي ما مستحمله كفايه بعيده عنكم ...واي يا ساره بتي سلمي تعبانته وانا مزعلاها ومبهدلاها كر علي يا ساره ادعي لخالتك يا بتي ادعي ليها ربنا ياخذ بيدها وحسام قاعد جنبها والام كمان وهنا ساره من غير ما تشعر قالت ليها لوي جنبك ... وهنا حسام وشه اتغير ومن حركه يده وفركه فيها عرفته انه ما راضي بكلامها مع لوي وهي لعبت علي الوتر كانت عاوزه تشربه من نفس الكأس وتوريهو انه مجرد كلامها مع ولد خالتها وقدامه وجعه وامال خيانتة ليها هي تعمل شنو فيها ردت عليها الحويه وقالت ليها آي أهواقف جنبي هاك يا لوي دي ساره عاوزه تكفر ليك لي امك ...رغم زعلو منها بس هي كانت روحه وحبيبه قلبو مسك التلفون وقال ليها اهلاً يا ساره والله زعلت عليها يا لوي بس ان شاءالله تبقي كويسه انت ما تزعل نفسك والله انا ما بستحمل زعلك هنا حسام وقف طوالي علي حيله وهي لسه مواصله في مغررتها رغم انه دا ما الموقف الممكن تاخذ حقها منه بس هي جات كدا والذاد الطين بله لمن قالت ليهو واي يا لوي انت ما تعرف محبه خالتو ومحبتك في قلبي قدر شنو والله نفسي اكون معاك اقصد معاكم هنا حسام فتح الباب وبقوه قفله وراه ومرق الام لاحظت تصرف ولدها وظلعت وراه وكانت ساره لسه بتتكلم بالتلفون مع لوي الكان مستغرب من كلامها معاه وكيف كان حلو لدرجة انه نسي وجعه علي امه وبعدها ناول التلفون لسماح وبقت تتكلم مع ساره ... سماح امشي بعيد من ناس امي عاوزه احكي ليك موضوع ... طيب دقيقه امي انا ح انزل تحت اشترى مويه ...طيب يا بتي ونزلت اه زحيت منهم في شنو قلقتيني يا بت اسكتي اسكتي يا سماح وقامت ساره علي حيلها وقلقت الباب عليها وقالت ليها البحكي ليك ما تتكلمي بيهو حتي مع نفسك ...بري ما بتكلم ... شفتي حسام طلع شنو ...شنو ما تقولي ياخ ما توجعي قلبي ... طلع معرسوب علي شنو معرس منو ومن متين معرس وبقت تحكي ليها عن السمعتو كله ما زادت حرف ولا نقصت حرف اه شوري علي يا اختي اعمل شنو سكتت سماح لحد الان الكلام باقي ليها كذب كذب لكن ساره كانت جاده يعني الكلام صاح اسمعي يا ساره الكلام دا حصل قبل نحنا ما نعرفه وهو ما غلط يعني معرسها بالحلال ما ماشي معاه مَش كدا ولا انا فاهمه غلط ...لا كلامك صاح كان معرسها وهي لسه في زمته ...بس هو غلط لمن ما حكي ليك وصاركك بالكلام دا من البدايه وعشان كدا او عك تجببي ليهو سيره وشوفي اذا كلمك يبقي خلاص تتصرفي بعقل وفي النهايه دي خواجيه يعني ما من توبه وعلي حسب كلامك انه طلب منها انه يطلقو قبل ما يجي ويشوفك يعني أباهها براه مافي

زول غصبه يسيبها و عشان كدا تمسكي نفسك وامسكي راجلك عليك كويس شديد واوعك تخليهو للخواجيه بت الكلب دي ... يعني ما اجيب ليهو سيره انا كنت عاوزه اطلب منه يطلقني ... طبعا يا بت انتي عاوزه تخربي علي نفسك وانا والله لو كنت متأكده انه حسام ما بحبك كنت اول وحده أشجعك علي الطلاق بس الشئى البعرفو وواتقه فيهو انه بحبك وبموت في التراب البتمشي عليهو بس هو اختارك براه ومافي زول ضغط عليهو عشان يعرسك وانتي عارفه كدا بس اوعك تاني تجيبي سيره الطلاق علي لساتك والله ما تشوفي قدر شنو بكلامك دا ريحتيني كيف كدا قومي صلي ليك ركعتين وأقري قرآن وربنا بقیف معاك ياريت بس جاتني البيريود العصر مافي مشكله الله بقیف معاك عشان انتي طيبه وتستأهلي كل خير قفلت من اختها ومشت رقدت وبقت تفكر وحست انه كلام اختها ريحها شديد وغير كدا كلامها منطقي بس الشيطان لعب دوره وكان وسوسه الشيطان اكبر من كلام اختها و خلاص هي قرررت وقامت نزلت شنطتها ولمت هدمها في الشنطه واصلا حسام من سمع كلام ساره مع ذفت الطين لؤي لافي في الشوارع وهو بحرق في السجاير ومرت عليهو ساعات وهو علي حاله وما جاء الا بالليل ودخل غرفه تانيه ورقد وخت يدينو فوق رأسه وعيونه علي السقف وكان بتزكر كل كلمه سمعها من لسان ساره والشيطان يوسوس ليهو واتزكر يوم ما كان لؤي خاتي يده في يدها في فندق السلام روتانا ولمن ركبت معاه في عرس خالد وحاجات كتيره شافها قبل ما يعرسها وطبعا طول الوقت دا جينا بتتصل عليهو وهو ما برد عليها وجينا كانت في البار بتشرب وبالها في حسام وفضلت قاعده تشرب وتشرب وتشرب وتشرب وشويه و جاء داخل البار صاحب حسام كان مصري واسمه وليد وسلم عليها وقعد يشرب معاها وهو كان رأسه خفيف بسكر سريع وهو بتكلم معاها فلت بي لسانه وقال ليها انه حسام عرس بت عمه وجابها معاه وقامت جينا وقعدت وبقت تكسر في الكاسات وصاحبه رأسه لافي وبقي يهدي فيها وهي بتشتم وتتوعد لحسام وشالت شنطتها وطلعت (بس ياربي ح تمشي وين دا ال ح نعرفه في الحلقة القادمة 🙌)

قعدت ساره جنب شنطتها الكانت مختوته في السرير وفيها كل حاجاتها فيها بعد ما رسلت في الواتس لهناء صحبتها وشرحت ليها الحاصل وسألته عن ولد خالتها الكان عايش هنا ومعاه اخته بتقرا عشان هي عاوزة تطلع لانها لو قعدت اكر من كدا ح تموت والحمدلله انها اتعرفت علي شرين لمن كانت في السودان وهناء طوالي رسلت ليها رقم بت خالتها بعد ما أدت بت خالتها فكره علي ساره وظروفها ولحسن الحظ كانوا ساكنين قريب منهم واتصلت عليها بت خاله هناء وقالت ليها انه اخوها في المستشفى عنده نبطشيه اول ما يرجع ح تجي معاه عشان يسوقوها معاهم وكانت المشكله انه ساره ما عرفت توصف ليها البيت وبعد ما قفلت منها فكرت منو الممكن يوصف ليهم البيت وبس مافي غيرها الشغاله ايوه الشغاله و مشت لشغاله سألتها من العنوان بس قالت في بالها احسن انها تتصل لشرين وتخلي الشغاله توصف ليها واتصلت علي شرين بت خاله هناء وقالت ليها انا ح أديك الشغاله توصف ليك لاني ما بعرف بس شرين ترد وتقول ليها دقيقه ادخل اخوي معانا في المكالمه عشان يعرف الوصف من شغالتكم لاني لحد هسي ما بعرف شديد الشوارع وفعلا دخلت وسام وهي اصلا ورته قبلها انها ح تمشي معاه عشان يجيبو صحبه هناء واول ما دخل اخوها الخط قالت لي ساره يلا اخوي في الخط ح يتكلم مع الشغاله وادت التلفون للشغاله الوصفت لي وسام البيت اطمنت ساره انو عرفو وصف البيت ومشت دخلت غرفتها وحسام غفي من كتر التفكير وفجاءه تسمع ساره جرس الباب بضرب بطريقه جنونيه خافت انها تمشي تفتح وما فكرت انها تكون شرين لانها قالت ليها قبل ما اصل بتصل عليك عشان تطلعي ولسه الجرس بضرب وفجاءه البيت كله يصحي وتجري ام حسام تفتح الباب وتلقي جينا في وشها وكانت جينا بتكلم عربي كويس لانها اصلا كانت في الجيش البريطاني عند غزو العراق وقعدت سنين هناك بس كان كلامها بالعربيه الفصحى دفرت جينا الباب بكل قوه فيها ودخلت زي المجنونه وهي بتكورك حسام اين حسام وجاء حسام جاري بعد ما سمع صوتها وساره وقفت وراء الباب تتصنت واول ما شافها حسام صرخ فيها انتي شنو الجايبك في الوقت دا انتي جنيتي تقعدتي تشربي وتشربي وتجي تعملي لي درامات هنا اطلعي اطلعي نكمل كلامنا برا ...وبقت تكورك جينا وهي بتقول انا اتي في اي وقت انت زوجي وهذا بيتي ولان اخرج من هنا حتي تقول لي الحقيقه ... وهنا قفل ليها خشمها وبقي يقول ليها اسكتي اسكتي اسكتي وهنا ادته ضربه برجلها لمن صرخت امه خايفه عليهو وهنا حسام باغتها بي بوكس في وشها لمن اترمت وهي بتكورك وتقول ليهو انت تضربني و تتزوج مره ثانيه والمسيح سوف. انتقم منك اصبر سأصل بالشرطه آلان وسوف نري من فينا سيكسب يا حسام يا حقير وبقت الام ترفع فيها وتهديها عشان ما تودي ولدها في ستين داهيه وحسام بقي يقول ليها انتي الغلظه الوحيده في حياتي ولازم الغلظه دي تنتهي لازم نطلق .. بقت تكورك جينا وتكسر القدامها وهي بتشتمه بشتيمه فظيعه وهي بتقول ليهو تزوجت علي لا تنكر اخبرني انك تزوجت و اين هي اين هي وبقت تفتح الغرف وهنا طلعت ليها ساره وجات وقفت قصادها وحسام بقي زي المجنون ساره خلاص عرفت وساره ح تروح من يدي ودا المستحيل بقدر استحمله دا انا

ممکن اموت لو دا حصل دي حب حياتي والام بقت واقفه في النص خلاص كل شي ح يتعرف
والمصيبه ان جينا كانت بتتكلم بالعربي وساره عرفت كل شي وجينا بقت تعاین لي ساره بي
اشمنزاز وقالت انتي انتي زوجته صحيح. ردت ساره بكل وجع وقالت ليها لا أنا ابنه عمه
بس وجيت هنا عشان أتعالج من السرطان ردها كان ضربه موجهه لحسام الكان بعاین ليها
ودمعه في عيونه كان اخير ليهو يموت ولا يسمعها انها بتنكر زواجها منه بس الام اتكيفت
شديد لانه ساره لو ما قالت كدا كانت جينا دخلت ولدها السجن ومشت عليها الام وقالت ليها
كلامها صاح يا جينا ساره بت عمه و جات عشان تتعالج وعشان تتأكدي ممكن تمشي
المستشفى العام وتساألني بنفسك والقال ليك الكلام دا بضحك عليك ... هزت راسها وقالت ليها
ماذا تقولين انتي الست زوجته التي أتى بها من السودان بقت تضحك الام وما خلت ساره
ترد وردت هي ما قلت ليك انها بت عمه بس وهي لو كانت مرته كانت ح ترضي تقول ليك كدا
ولا اصلا كانت خلته ليك كلام الام منطقي مافي مره بتنكر راجلها عشان وحده تاتيه مهما كان
مستحيل تعمل كدا اقتنعت جينا نوعا ما بالقصه واتغيرت جينا وكأنه مافي حاجه حصلت
ومشت علي حسام وختت يدها علي صدره وبقتت تتمسح فيهو وحسام عيونه بس علي ساره
وساره بكل قوه ماسكه دموعها وفجاءه تحصل حاجه خلته ما تستحمل تشوف جينا وهي
بتقبل حسام بكل جراه اي هو بعدها منه بس بعد شنو بعد ما ساره شافت وطوالي ساره ادتهم
ضهرها و رجعت غرقتها واول ما وصلت وقفلت بابها عليها انهارات شديد وجينا بتعتز
لحسام عشان الحصل والام قالت احسن اطع فوق وكانت نفسها تدخل علي ساره عشان
تواسيها وتفهمها الحقيقه وأنها أطرت أكدت كلامها قدام جينا عشان قانون البلد دي بس جينا
كانت واقفه وخافت اذا مشت لساره جينا تسمع كلامها مع ساره وخاصة انها ما عارفه رده
فعل ساره ح تكون شنو وهنا وقبل ما تطلع لفوق جينا تتحرك عشان تدخل الحمام شكلها
عاوزه تغسل يدها النجرحت وهي بتكسر في الحاجات قبيل وطوالي مشت علي ولدها وقالت
ليهو اسمع هنا خليك معاها البت دي مجنونه خلي الليله دي تعدي عشان ما توديك في ستين
داهيه ..وساره يا امي ساره ...ساره الله يكملها بعقلها تلقاها عارفه بقوانين البلد دي وخافت
عليك وبعدين بتفهما وبترضيها ..ساره يا امي ونزلت دمعه بس قبل ما ترد الام جينا طلعت
من الحمام طوالي الام غمزت ليهو عشان ما يعمل شي ويودي نفسه في ستين داهيه ومشت
وسابته لمصيره المظلم جات عليهو جينا واتعلقت فيهو بوراء ومسكت يده وجرتة عاوزه
تدخل لغرفته اتزكرت ان بنت عمه فيها قالت ليهو ما مشكله ساترك لها غرقتنا لكي تجلس
فيها انها مريضه ونحن ندخل هناك وحسام ماشي معاها زي المدبوح ما كان قادر يرد ولا
حتي يعترض بس تفكيره كله في غلطه الوقع نفسها فيها واللاسف في شباب لسه بتغلظ نفس
غلطتي و كل الشباب البجو برا عشان يتعلمو او عشان يشتغلو بقصرو المسافه بالزواج
بخواجه وبعدهما يعرسو وتروح المشاعر الحلوه الكانو بحسو بيها قبل العرس يكتشفو انهم ما
حاسين برجولتهم مع حريمهم لا العادات ولا التقاليد ولا حياء ولا اي شي بس دي غلطه
وبدفع تمنها هسي وأخ من التمن التمن كان غالي شديد خسارتي لي ساره

ودخل معاها جو بس هو حلف ما يعمل حاجه الامع ساره وقدر ما حاولت جينا بس هو ما
أداها وش رغم حنيتها العارفاها جينا بس هو لمن يقفل من زول ما يرجع ليهو تاني وموجوع
عشان هو حاسي انها ماسكهو من يده البتوجعو

وبهناك يرن تلفون ساره مسكت السماعه وهي بترجف وردت و عرفت انها شرين قالت ليها
انها واقفه برا هي وأخوها قفلت منها وطوالي لبست البالطو ولفت طرحتها ومشيت علي
الطاولة كانت فيها اجنده بكتب فيها حسام مواعيد الدكتور حقها ومواعيد الادويه شالت ورقه
وكتبت فيها

حسام 🇩🇲 🇩🇲 🇩🇲

عندما تقرا رسالتي دي أكون قد رحلت الي مكان مجهول ولن تعرفه ابدا بس حابه أقول ليك
انا بقدر الحب الحبيبتو ليك وبقدر ما انا موجوده منك الان بكتب ليك وانا ندمانة أشد الندم
علي كل دقيقه حبيبتك فيها وزلي ما دخلت حياتك في يوم بطلب منك ان تطلعني من حياتك اليوم
واتمنيت انك تخبرني من البدايه ولكنك لم تخبرني وكذبت علي يمكن لو تكلمت لكان الوضع
اختلف الان وكلمه وحده اتمني انا اسمعها منك وهي انتي طالق

وداعا يا حلم خداع

ساره

وختت الورقه وشالت شنطتها وفتحت الباب براحه عاينت لقت مافي زول سحبت شنطتها
وظلعت ومشيت علي الباب ووقفت تعالين للبيت الشهد احلي ايام في حياتها وهنا نزلت دمعه
حاره علي جبينها مسحت دمعتها بيدها الهزيله وفتحت الباب وظلعت وخلت أحلامها وآمالها
وحب حياتها وراعها واول ما شافها أخو شرين دكتور وسام طوالي نزل ومشى عليها عرفها
بنفسه سلمت عليه وشال منها الشنطه وختاها في العرييه ونزلت شرين حضنتها وسلمت
عليها وطوالي ركبو العرييه ومشو واتلفتت ساره وراها والعرييه بتبعد من بيت شهد أفراحها
واوجاعها وبعدت العرييه عن نظرها اتلفتت لقدام ودمعتها في خدها صلح وسام الوسيم كان
لا يقل وسامه من حسام نفس السكسوكه نفس الاستايل نفس الفنله البيضا الضيقه البتظهر
عضلاته المقتوله والجاكيت الجينز وبقي يعالين ليها ساي ما انتبهت ليهو هي ابدا لانها في
وضع ما بسمح انها تفكر ولا تشوف حاجه وهنا شرين اتلفتت عليها من قدام وقالت ليها
نورتي عاصمه الضباب يا ساره ابتسمت ساره برغم حزنها وقالت ليها منوره بوجودكم فيها

وسكنت وتاني ردت وقالت ليهم سامحوني يا جماعه علي أزعاجكموقبل ما تجاوب شرين
رد وسام وقال ليها مافي ازعاج ولا شي نحن تحت الخدمه ويكفي انك من ريحه البلد ود
بالدنيا شكراً ليكم يا جماعه بالجد ما عارفه أقول ليكم شنو مافي داعي للشكر
وياريت تشيلي التكلفة وتعاملينا عادي ان شاءالله ان شاءالله

وجينا قدر ما حاولت معاه وأغرته ما كان هو شايف الا ساره قدّامه ولمن جينا تعبت
وعرفت انه حسام ما ح يسامحها علي ضربها ليهو وعلي العملتو في البيت ولأنه رجل شرقي
عنيد وهي عارفه كدا طوالي أخذتها من قاصرها وقامت لبست ومشت وهو ما صدق انها
تمشي واول ما سمع صوت الباب اتقفل بقوه طلع طوالي ومشى علي غرفه ساره ووقف
قصادها لا قادر يدخل عليها ولا حتي قادر يمشي ويسيبها وقف وخت يده فوق رأسه وبقي ما
عارف يعمل شنو نزلت الام بعد ما سمعت صوت الباب نزلت تشوف حصل شنو مع ولدها
واول ما نزلت اتلفتت علي يمينها كانت هناك غرفه ساره وحسام ولقت ولدها واقف مشت
عليه وختت يدها علي كتفه وقالت ليهو دخلت عليها ولا لسه ... لا يا امي ما قادر ادخل وإذا
دخلت ح أقول شنو ولا الاعتزاز ولا لو بست ليها رجلها ما ح ترضي علي ... هدي نفسك
وخليها هسي تهذا وبعدين يحلها رب العالمين ... بس يا امي انا عارف ساره رأسها ناشف ما
ح ترضي اي نحنا ما مرينا بموقف زعل قبل كدا بس شخصيتها البعرفها انا بتقول نهاي ما
ممکن تسامحيا ولدي هون علي نفسك خلاص الحصل حصل والحمدلله ان جينا ما عرفت
شي كان بهدلتك دي مجنونه ياما حزرتك بس انت راسك ناشف زي ابوك ما بتسمع الكلمه
دورت الخواجيه وسبت بنات بلدك دي مهما كان ما بتبقي زي بناتنا المؤدبات الواعيات
....امي لو سمحتي انا ما ناقص عشان تزكريني بغلطتي البدفع تمنها من روعي وقلبي
طيب ما ح اجيب سيرتها خلاص يلا امشي أرقد وخليها لبعدين لمن تصحي وتتكلم معاه
بهدوء وساره والله عاقله غايتو انا عجبتي بتصرفها التصرفتو قبيل لو ما هي قالت كدا كانت
جينا جابت البوليس ليك ونحن ما ناقصين مشاكل طيب طيب طيب ومشى دخل الغرفه
التانيه وقدر ما حاول ينام ما جاه نوم نهاي وبقي صاحي ووووين لحد ما اخذ حبه عشان
تنومه ونام فعلا وبعدها بوقت صحي علي كابوس عاين لساعه لفاها وحده ظهر طوالي طلع
لبرا لقي الام بتشرب في قهوه صبح عليها وسألها عن ساره قالت ليهو انها مشت دقت عليها
الباب بس ما ردت علي يمكن تكون لسه نايمه انت امشي اخذ حمام عشان تفوق وبعدين
امشي عليها ودخل حسام الحمام وطلع ومشى علي الغرفه ودق عليها مافي زول برد بس
يقرر يفتح الباب ويدخل وهو بقول ساره ومافي زول برد وفجاءه يلقي الغرفه فاضيه يمشي
علي الحمام يدق عليه مافي رد ويدق علي الباب وهو بقول ساره اسمعيني حبيبي والله انا
كنت عاوز اكلّمك بس خفت انه أفقدك اي قولي اني اناني قولي اي شي وانا فعلا اناني في
حبي ليك اعزريني يا عمري انتي انتي ألقى القلب انتي بس جينا كانت حب زول مراهق ما
كنت فاهم شي ولا عارف معني الزواج ولا مسؤولياته وانا كنت عاوز أطلقها بس هي رفضت
وانا ما عرفت اعمل شنو وبعد موت ابوي لقيت وصيته اني امشي السودان واعرس من بنات
عمي وكانت وصيته إنفاذ لحالتي مع جينا فسافرت علي طول وشفتك اخ يا ساره شفتك وما
شفنت غيرك ساره انتي ما بتردي علي ليه ساره قلق عليها وخاف تكون مغمي عليها ولا فيها

شي ويفتح الباب ويلقي الحمام فاضي طلع يجري لي امه وهو بكورك امي امي امي الام
خلاص قربت تعملها علي روحها من الهجمه خافت انه حسام يقول ليها ساره ماتت بس
تتمالك نفسها وهي بتسأله في شنو يا ولد ساره مالها جاها حسام وهو بقول ساره مافي جوا
ساره وين وبقي يصرخ وينادي الشغاله ويسال فيها وردت انها ما شافتها من امس وبقو
يفتشو غرفه غرفه فوق وتحت وهنا يجري ويدخل الغرفه ويفتح الدولااب ما يلقي هدومها ما
لقي الا هدومها الكانت لابساها وقلعتها ومسكها عليه وبرك على الارض وهو ببكي
باعلي صوت عنده جات جاريه امه عليهو وتشوف الدولااب الفاضي وحسام القاعد في الارض
وببكي قعدت جنبه وبقت تهدي فيهو وهو بقول انا قلت ليك أنه ساره ما ح تعديها لي ما ح
تغفر لي غلطتي ...يا ولدي خلاص ما تعمل كدا قوم شوف البت مشت وين البت غريبه في
البلد دي لا عندها صاحبه ولا زول غيرنا قوم وبطل البكاء دا ...يعني امشي وين يا امي أفتش
عليها وين قوم أرح نطلع يمكن تكون مشت المستشفى هي عندها كرت المستشفى يمكن
تكون ركبت تاكسي ووداهاتفتكري يا امي ح نلقاها هناك قوم انت في الاول وبعدين
قول نلقاها ولا ما تنسي انها عيانه وما قدر الف في الشوارع أرح ومسكته ترفع فيهو وهو ما
قادر وفي النهايه وقف وفي يده بلوزه ساره ومسكها في يده وطلع مع امه الي لبست البالطو
المعلق جنب الباب وطلعت معاه ركبو العربيه وبقي سايق زي المجنون لحد ما وصلو ونزل
بسرعه قبل امه وجري وأمه نزلت وبقت ماشه وراه تلحقه لحد ما وصل عياده الدكتور
المتابع لحالتها وسال الممرضه ودخلته وبعد شويه جاء مارق وخيبه أمله وراه وهو حاسي
ان الدنيا اتسودت قدام عيونه وقال لي امه مافي ما جات هنا وطلع وبقي ماشي في الشارع
وما عارفين يعملو شنو ونسو تماما انه يتصلو عليها وفجاءه الام صرخت وقالت ليهو نحنا
نسينا ما نتصل عليها واول ما سمع كلمه اتصال طوالي شال تلفونه وكله امل انها ترد بس
الما كان متوقعه انه يلقي تلفونها مقفول وهنا مسك التلفون وطقشوا في فزاز العربيه وهو
بقول باعلي صوت مقفول مقفول وبقي يسب ويلعن حظه ومشى علي البيت كان عنده امل
انها ترجع تاني ليهو ولمن وصل وما يلقاها وبقي يكورك شي بالإنجليزي وشي بالعربي وهنا
جات الشغاله وقالت مستر حسام مدام ساره أعطتني التلفون امس لكي أوصف لرجل المنزل
وانا لم أكن اعلم أنها ستهرب معه ...شنو راجل ودي عرفته متين وانتي ما شفتي رقمه ...
خافت الشغاله وبقتت تتمم وهي بتقول لا لا اعرف الرقم وبقي يكورك وأمه برضو ما
قادره تصدق ساره بتعرف راجل غير راجلها مستحيل مستحيل وهنا يقطع تفكيرها صوت
حسام وهو بتوعد انه يقتلها ويقتل الراجل ويقتل نفسه تسيبني انا وتمشي مع راجل غيري
والله أقتلك يا ساره ح أقتلك

يا ولد اهدا قتل انت عاوز تودي نفسك في داهيه وتاني شي يمكن الشغاله دي فاهمه غلط
 راجل منو البتعرفو ساره هنا من جات لا تلفونها ضرب ولا اتصلت هي علي زول غير أهلها
 كدا يمكن تكون مره والحماره دي اتهيئ ليها راجل كدا اقعد خلينا نفكر نعمل شنو...امي انتي
 بتقولي شنو الشغاله ما ح تقدر تفرز بين صوت الراجل ولا بين صوت المره ما بعرف
 بس ما أظن يعني ساره بتعرف ليها ناس هنا علي الاقل كان قالت لينا عنهم ولا حتي مشت
 زارتهم ولا هم جو يزوروا

👁️👁️👁️👁️👁️👁️ بيت شرين

ساره اخدي راحتك البيت بيتك واطمني وسام اغلب الوقت مافي يعني ح نكون علي راحتنا
 وخاصه اني في اجازه...بالله انتي في جازه والله دا من حسن حظي اي يا ستي عندي
 عشره ايام اجازه وقلت انزل السودان بس تاني فكرت الاجازه بسيطه ما ح تكفي اني استمتع
 وعشان كمان عندي اختبارات بعد الاجازه لازم اقعد واذاكر الله يوفقك حبيبتي اه ان
 شاءالله نمتي كويس...اي الحمدلله الحمدلله ونزلت راسها لتحت لانها عارفه نفسها كدابه هي
 ما شافت النوم بعينها من الزعل...اسمعي يا ساره اي انا شفتك مره واحده بس والله كاتي
 بعرفك لي سنه ومعزتك من معزه هناء والله وانا حاسه انك في ضيقه بس ما عاوزه اضغط
 عليك عشان تحكي لي الحصل بصراحه هناء قالت انك عندك مشاكل مع زوجك بس فأنتي لو
 عاملاني زي اختك وحابه تحكي لي انا بسمع ليك وسرك ح يكون في بير بس لو ما عاوزه
 تحكي انا برضو بحترم قرارك وبخليك علي راحتك بس صدقيني اذا حكيتي بترتاحي لا يا
 شرين ما تقولي كدا والله بوقفتكم دي بقيتو زي الأهل ويمكن اكثر وانا اتشرف انك تكوني
 اختي بس انا ما عاوزه اشغلك عن قرابتك بمشاكلي...يا بت قرابه شنو انا قبل ما أجيك كنت
 بقرا يعني انتي لا شغلتييني ولا ح تشغليني سكتت ساره ونزلت دمعتها علي خدها زي
 الجمر مسكت شرين يدها وقالت ليها واي يا ساره قدر كدا المشكله كبيره احكي حبيبتي يمكن
 اقدر اوجهك والنشي الما بتعرفيهو عني اني متزوجه قبل كدا ومنفصلة مسحت ساره
 دمعتها وقالت ليها. معقوله انتي كنتي متزوجه اي يا ستي والحمدلله علي كل شي
 الطلاق كان الأفضل لي وليهو بعد ما استحالت العيشه بيناتنا بسبب أخواته ... الله يخلف عليك
 بالأحسن منه ان شاءالله يلا احكي لي حبيبتي والله يا شرين مهما حكيت ليك عن
 الحصل لي ح تقولي اني بحكي عن قصه خياليه من القصص البتكتبها نهى في الفيس
 نهى حقت حكاياتنا ما غيرها...ياها زاتها ... انا مشتركه في قروبيها و دايمًا بقرا ليها و
 قصصها واقعيه شديد واهو بتهون علينا في الغربه بنفرح ونحزن ونبكي في قصصها يعني يا
 ساره انتي ظلمتها بوصفك ليها بالخياليه ما علينا يا ستي يلا احكي

اول مره اشوفه لمن جاء بيتنا من الصباح وقال انه ولدي عمي وعمي دا ما شفناه الا ونحن صغار المهم دخل بيتنا وعاش وسطنا وانا في البدايه كنت بتعامل معاه زي خالد اخوي بس شويه شويه اتعلقت فيهو وحببتو واول ما اتأكدت من نفسي اني بحبه لقيت رساله منه وهو بصارحني بحبه لي وعشنا اجمل ايام وما قلنا لزول من اهلنا انو نحنا بنحب بعض و جاء يوم واكتشفنا اني عيانه بالمرض اللعين وما أقول ليك كيف وقف جنبي ودعمني واصر انه نتزوج وأسافر معاه لندن عشان امه حجزت لينا عند احسن دكتور وفعلا جيت معاه واتعالجت ولسه بتعالج والدكتور طمنا خاصه انه المرض في بدايته ...سلامتك حبيبتي ومسكت شرين يدها بقوه كأنها بتحسسها بالامان وأنها جنبها اه كملي اه يا ستي وعشت معاه هو وأمه لانه امه اصلا ما رجعت السودان بعد موت عمي وفضلت انها تكمل اشغالها هنا ومهما احكي ليك عن حنيته وحببه ح تقولي انه دا ما يحصل الا في الروايات بس لكن والله كان حقيقه كل شي عشته كان حقيقه ما خيال ...طيب في شنو الخلا حياتكم تبقي كدا وأنتك تطلعي وتسيبي البيت بالطريقه دي شالت نفس وختته وقالت ليها كنت حاسه انه السعاده إلانا فيها دي ما ح تدوم ما عارفه ليه يا ستي طلع طلع متزوج من وحده بيرطانيه ...شنو متزوج لا حولا ولا قوة الا بالله كيف ومن متين ...من قبل ما يجي السودان واشوفه طيب يعني ما حكي ليك بقصه زواجه هو قبل العرس ما دا المزعلني انه ما كان واضح معاي من الاول يعني لو حكي لي ما كنت ح ازعل لانه دا ماضي وانا ما كنت معاه في الوقت داك ...بس يمكن يكون خاف انه اذا كلمك ما توافقي تتزوجيهو ويخسرک ... لا ما كان ح يخسرني لاني حبيبته وما كنت ح أفكر اني اسيبه ...طيب يا ساره هو عرسها قبلك وانتهى الموضوع وجاء اتزوجك يعني سابها ...لا ما سابها لانهم ما أطلقو ...شنو شنو وهو ما مطلقها واتزوجك وخاطر بحياته وجاء وهو عارف اذا اتكشف ح يدخل السجن بصراخه راجلك دا مابي نفسه ولا شنو القاتون هنا ما بسمح الا بزوجه واحده بس والا ممكن يتسجن ...ما دا الخلاني نكرت زواجي منه قدام مرته ...يعني انتي قابليتها ...للأسف ايوه جات البيت امس بعد ما وصل كلام من صاحبه وقال ليها انه حسام عرس وجات تخبط وتكسر وانا اطريت اني اكذب وأقول ليها انا ابقي بت عمه بس وجيت عشان أتعالج هناواي يا ساره واستحملتي كيف انك تسيبي ليها راجلك ... ما انا نسيت ما أقول ليك انه امس العصر انا عرفت بزواجه لمن كان بحكي مع امه وعرفت من امه انه اذا أتعرف موضوع زواجنا ممكن حسام يتسجن وعشان كدا انا نفيت زواجي منهمعناها أنتي لِسَّه بتحبيبهو والا ما كنتي خفتي عليهو من السجن ما حب بس لكن عرفان بالجميل حسام ما قصر مع اخوي ووقف معاه في زواجه وما بخل عليهو ولا علينا بشي وما نسيت دعمه لي في مرضي واصراره عشان اتزوجه رغم اني عيانه دا كله وقف قدام عيوني والاهم من دا كله انه ولد عمي قبل ما يكون راجلي وما انا الممكن تتسبب في حبس راجلها وولد عمها بس اذا علي الحب فما عارفه أقول ليك شنو ... ما تقولي حاجه انتي انسانه عظيمه وبالجد مثال للزوجه المخلصة الفاهمه بس بالجد الله يكملك بعقلك ...



حسام اه عملت شنو ... رجعت المستشفى تاني وللأسف ما جات وتلفونها موقوف لحد هسي طيب يا امي نبلغ الشرطة ولا كيف ... يا ولدي شرطه شنو دي ح تبقي فيها سين وجيم كدا نصبر ونشوف يمكن تفتح تلفونها بس تعال انت مواعيدها مع الدكتور متين ... ما عارف والله بس يتزكر ويقول ابوه الاجنده انا كاتب فيها المواعيد ودخل الغرفة وهو بجري واول ما شاف الاجنده ينتبه للورقه الكانت محتوته فوقها فتحتها واول ما شاف الفيهما بقي يبكي زي الطفل وبقي يقول واللح بحبك والله بحبك وعمري ما حبيت غيرك ولا ح احب غيرك انتي يا عمري انتي مشيتي وين وسبتيني انا من غيرك ح اضيع وح اموت ارجعي لي يا ساره انا عمري ما كنت حلم خداع بالعكس انتي حلم حياتي وقعد في الارض وماسك الورقه بيده ودموعه نازله كانت الكلمات ألفي الرساله كلمات بتوجع القلب وخاصه قلب زول بحب وبحب بجد وفضل قاعد في مكانه ومر عليه وقت ولمن الام شافت ولدها أتأخر دخلت عليه واول ما شافته قالت ليهو ليه بتعمل في نفسك كدا انت ح تموت نفسك انت من امس لا اكل ولا شراب وهسي قاعد لي في الارض وبتبكي انت عاوز تقتلني بالحسره عليك ... مد الورقه ليهما وقال ليهما مش قلت ليك انها عمرها ما ح تسامحني شالت الورقه وقرتها وبعدها قعدت في الكرسي الكان جنبه وقالت ليهو هي زعلانه ودا رد فعل طبيعي للسمعتو وشافته كدا خليني اشوف مواعيدها حقت الدكتور ... وشالت الاجنده وفتحتها لقت المواعيد لسه فاضل ليهما شهر خنت الاجنده وقالت للأسف المواعيد لسه قدامها شهر ياربي دي شنو الحيره دي وهنا يسمعو صوت جينا ... وب علي دي جينا ياها زاتها قوم قوم امشي غسل وشك عشان ما تشك في حاجه وجرته جر لحد ما قام ودخل الحمام ولمن جاء طالع يلقي جينا في الغرفة واقفه والرساله حقت ساره في يد امه الطوالي كرفستها عشان جينا ولا طينا ما تشوفها حسام حبيبي انت بخير ... هز رأسه من غير ما ينطق وهنا قالت ليهم الام يلا نعد برا عشان نتعدا ... اوكي اوكي وطلعو وقعدو وهنا كان التشيرت الابيض الكان لابسه حسام مبلول بالمويه هنا جينا ولا طينا علي قوله الام قالت أوه حسام انت ستأخذ برد لأنم تبدل التشيرت دقيقه سأتي لك بواحد جافه وقامت مشت الغرفه وفتحت الدولااب وطلعت التشيرت وهنا تلقي شنطه سودا كانت اول مره تشوفها عنده فضولها خلاها تفتحها عشان تشوف الفيهما واول ما فتحتها تلقي أوراق المستشفى بتاعه ساره وفجاءه تلقي ورقه شكلها غريب تنظر لها بي اهتمام وتكتشف انها قسيمه زواجه من ساره

مسكت جينا الورقه كويس وقرتها مره ثانيه وكانها كانت عاوزه تتأكد وفعلًا لمن قررتها لقتها عقد زواج حسام وساره بلعت ريقها بصعوبة ونفسها بقي يطلع وينزل هي كانت بتحب حسام حب جنوني حب امتلاك وحبها ليهو ما كان طبيعي هي عاشت كثير في العراق وشافت احوال الحرب ولمن رجعت عانت كثير بسبب الشافتو وكانت ببتعالج نفسيًا عند دكتوراه أمراض نفسيه وعصبيه وعائشه علي المهدئات ودا كله ما كان بعرف بيهو حسام اي هو كان عارف بشغلها في العراق بس عن مرضها ما كان بيعرف شي ولا كان بيعرف أنها مرت بقصه حب فاشله قبله عانت بسبب خائنه حبيبها العربي الكثير شالت العقد وختته في جيبها وطلعت ليهو وحلوت تسيطر علي نفسها وكان ما حصل شي وقالت في بالها كل شي في وقته حلو يا حسام وقضت اليوم معاهم وهم قاعدين مع بعض وقامت علي حيلها واستأذنت منهم عشان تمشي تنام ليها شويه وفعلًا دخلت جوا بس ما عشان تنوم كانت عشان تفكر ح تتصرف مع الخاين حسام كيف وقعدت تفكر وتفكر وتفكر وبس ما وصلت لحل ومر لانها في وضع ما يسمح انها تفكر بطريقه سليمه ومر علي دخولها الاوضه وقت وفجاءه قررت انها تطلع تشوفهم بعملو شنو وطلعت لقتهم مافي في الصاله مشت علي الشغاله الكانت شغاله في المطبخ وسألته عنهم ما ردت عليها بس اشرت ليها أنهم فوق وهي صاره خلقتها وأشرت ليها بدون نفس لانها ما كانت بتحبها وهنا طلعت السلم ومشت علي غرفه الام ما لقتهم استغربت وختت في بالها ان الشغاله كدبت عليها وعاوزه تنزل لتحت وبس تسمع صوت ام حسام جاي من الغرفه الثانيه مشت تتسحب عشان تسمعهم بقولو شنو واتسحبت براحه من غير ما تعمل صوت ولمن وصلت وبقت جنب الباب لصقت اضانها علي الباب وبقت تسمع



يا امي مافي حل الا نبلغ الشرطه والشرطه تفتشها واكيد ح تلقاها...قلت ليك انسي الموضوع دا ح تعمل ليينا شوشره ساي انتظر يومين يادوب مر يوم ونشوف ح نعمل شنو انت المهم اتصل علي أهلها واعمل نفسك عاوز تظمن علي خالتها وتشوف يمكن تكون كلمتهم... والله فكره بس انا جاتني فكره ثانيه ليه ما نشوف محقق خاص يشوفها ليينا يعني هنا بعملو كذا عادي...اي كذا ممكن.... بس يا امي علي قدر ما نفسي ألقى ساره قدر ما انا خايف من شوفتها.... يا ولدي ساره مرتك وبتحبك يعني استحاله شوفتها تخوف وغير كذا هي بتعرف أنك بتحبها شديد...بحبها بس دا انا عمري ما حسيت بالحب الا معاها ورغم اني عرست جينا قبلها بس عمري ما حسيت بالإحساس الحسيتو مع ساره



سمعت جينا كل شي وحست انها بتتخان وللمره التانيه وبنفس الطريقه اي زمان كانت صغيره وما بتعرف تتصرف وتاخذ حقها بعد ما عرفت حبيبها انه بضحك عليها وبحب بت عمته العربيه الزيهو وعاوز يعرسها بس المره دي مستحيل تسبب حقها ولازم؟؟؟

عدلت شعرها ومسحت دمعها ودقت الباب وبي هناك اتخلع حسام لمن الباب دق وهنا الام خافت من الجاي ردت بخوف اتفضل وفتحت الباب ودخلت جينا الام نططت عيونها خافت جينا تكون سمعتهم وعرفت انه ساره مره حسام بس لمن لقت جينا عاديه حمدت ربها انها ما سمعت لانها كانت بتعرفها كويس اذا عرفت مستحيل تسكت هي ما نست العملتو قبل دا لمجرد انها سمعت من صاحبه بقصه عرسه وجينا اتعاملت عادي وقعدت تتونس وفي نص الونسه سألتهم عن ساره الام اتكربت ما عرفت ترد بس حسام طوالي قال ليها ساره مع صحبتها مشت تقضي معاها كم يوم عشان تخلينا انا وانتي ناخذ راحتنا ابتمت جينا بخبث وقالت جيد ...

ومر يومين وحسام أعصابه بايظه وخاصه بعد ما اتصل بي أهلها وكأنو عاديين شديد معاه حتي سالهو عن ساره وهو اتحجج بأنها نايمه بس الوحيدده سماح الكانت كلامها معاه بارد شديد لدرجه انه شكى انها عرفت بالقصه بس ما كان عنده الجراه انه يسألها وكمان المحقق لسه ما جاب ليهو خبر يطمنو وفي يوم اتصلت جينا عليه وقالت ليهو انها خلاص وافقت علي الطلاق لانها تعبت وزهجت من هجرانه ليها وهي ما بتتحمل الوضع دا بس طلبت منه اخر طلب عشان يطلقو هو انهم يمشو مع بعض علي ألجزيره الشهدت اول لقاء بيناتهم وهناك ح تنفق معاه علي إجراءات الطلاق قفل منها وهو عاوز يطير من الفرحة وكأنه حمل ثقيل كان علي صدره وانزاح وجرا ركب العربيه ومشى علي امه في محل شغلها ودخل عليها وكانت هي شغاله علي اللابتوب واول ما لفته فرحان كدا ختت في بالها انه لقي سارهخير يا ولدي اه لقيتهاقعد حسام وقال ليها لا يا امي لسهغريبه ومالك فرحان كدافرحان يا امي فرح لا يوصف واخيرا جينا وافقت علي الطلاقشنو وقامت من كرسي المكتب ولفت وجات قعدت في الكرسي القصادو وقالت ليهو معقوله الكلام دا ... اي يا امي اتصلت براها وقالت لي انها ما قادره علي العيشه معاي بالوضع دا وحاجات كتيره يعني خلاص اخيرا ح ابقني حر ...وعقدت حاجبها وقالت ليهو مبروكعين ليها وقال حاسي بيك ما فرحانه انا قلت اول ما احكي ليك ح تزغردني ليوالله يا حسام انا خايفه من قرارها المفاجئ دا وخاصه بعد العملتو فيك اليوم داك يعني وحده زيها ما بتجي بين يوم وليله تغير رائها ولا كمان تكتشف فجاءه انها بقت ما بتحبك وتطلب هي الطلاق بنفسها بصراحه القصه دي ما داخله لي في راسي شنو يا امي الما داخل ليك في راسك وحده وجات براها عشان نطلق انتي غايتو يا امي موسوسه وانا قايم من جنبك عشان ما تعادينني بالوسواس ألفي راسك ومشى عليها وبأسها فوق راسها وطلع والام قعدت وختت يدها علي خدها وبقت تفكر ما عارفه ليه قلبها اتقبض كدا من الموضوع دا ... حاولت تشغل نفسها في مقابلتها مع

صحبتُها الجات تعزمها علي حفل عشاء يوم الخميس وكان اليوم يوم الاثنين



الو جينا كيفك ... انا بخير يا حسام ... اه متي ح نساافر هل يناسبك يوم الخميس ... حسي انه يوم الخميس بعيد جدا بس يعمل شنو ما لازم يعاندها وافق علي مضض ... قفل منها ومشى علي المحقق الخاص يشوف عمل شنو وبعد ما وصل ليهو قابلو بس لحد الان مافي نتيجة مرضيه وهنا يطلب منه المحقق انه يعطيهو مهله وطلب منه كمان زياده معلومات وهو قبل كدا ادا هو كل شي حتي الصورة اداها ليهو في اول مره جاه فيها وتاتي اداه معلومات اضافيه وهنا المحقق حلول يطمنه بالخطوة العملها وقال ليهو انه عمل متابعه لجوالها ومجرد ما تفتحه ح يقدر من اعوانه في شبكه الاتصال تحديد مكانها بسهولة .. وطلع منه وخيبه الأمل تلاحقه بس قصه تتبع التلفون دا ريحته لانه هنا التقنيات غاليه جدا و مشي لف في الشوارع لحد ما فكر انه يمشي علي أصحابه اصلا هو من جاء من السودان ما قابلهم لانه انشغل مع ساره بمرضها واول ما شافوه فرحو بيهو شديد وهم كانوا عندهم مكان بجمعو فيهو ولحسن حظه لقاهم كلهم قاعدين لانهم عاملين عصيده ومحتفلين بيها يااااا علي الشباب السوداني يحبو ويعملو المستحيل عشان ينغربو وبسيبو البلد واول ما يسيبوها يشناقو لي حاجه تزكرهم بيها وبي ريحتها وقعدو حولينو وهم مبسوطين بيهو وخاصة انه ح يشاركهم العصيده بملاح الروب وحسن هو الشيف طبعا كالعاده وبعد ما اكلو بقو يسالو عن اخباره وحكي ليهم بكل شي لانه كان نفسه انه يفضفض وما صدق انه يتكلم وكلهم زعلو عشانه وخاصة هم عارفين بجينا ومشاكلها معاه وعارفين انه هو لقي فرصه وصيه ابوه إنقاذ ليهو من الوضع الكان فيهو وبعد الاكل مسك صاحبه كمال الحله وبقي يدق ويعني كانوا عاوزين يطلعو رفيق دربهم من المود ألهو فيهو ...

مرت الأيام وجاء يوم الخميس أبس حسام بنطلون الجينز وتشيرت اسود ضيق مبين عضلاته وشال الجاكيت في يده وطلع ركب عربيته وبس قبل ما يدورها طلع التلفون وعمل اتصال مع جينا وقال ليها انه ح يمر عليها وطلب منها ان تنتظره تحت العماره وافقت جينا وبعد ما قفل منها اتصل علي امه الكانت في السوق بتشتري طقم عشان حفله صحبتها واول ما عرفت بقصه سفره وانه دا طلب جينا خربت الدنيا وكيف تمشي معاه انت مرتك مختفيه وانت عاوز تمشي معاها تتصرمح ...امي صرمحه شنو انا لو طلبت مني اني امشي معاها اخر الدنيا ح امشي بس عشان أتخلص منها وافرح مرتي بطلاقي منها وعشان اثبت ليها انه مافي في القلب الا هي ... الام نقنقت وما رضت نهاي بس تعمل شنو عارفه ولدها كويس عنيد ورأسه ناشف زي ابوه قفلت منه وحتى ما قدرت تشتري الهي جات عشانه ركبت عربيتها وهي مقررر انها ما ح تمشي الحفله ووصلت البيت وتلفونها بقي يرن من صحبتها سوزانا عشان تتأكد من انها جايه ولمن عرفت انها ما ح تقدر تجي اصرت عليها شديد عشان تجي وفي النهايه وافقت وطلعت فوق تشوف ليها اي طقم من العندها تلبسو وتمشي وفعلا اخدت حمام ولبست واتمكجت وجات مارقه ركبت عربيتها ومشت الحفله كانت الساعه سبعة وبهناك

مشي حسام ملا عربيته بنزين وسحب من الصرافه قروش ودور وطلع علي جينا واول ما وصل لقاها راكبه عربيتها ومنتظره نزل هو ومشى عليها وقال ليها هاي جينا...هاي حسام...يلا عشان نصل بدري... نظرت ليهو طويلا وقالت له لا لن انزل بل انت من سوف تصعد بجواري... ولكن سيارتي كبيره وبستحمل المشوار...اصرت جينا علي رانها انهم يمشو بعربيتها ما كان من حسام الا يوافق بس عشان المشوار الليله يعدي ويخلص.... اوكي اوكي تلفونه وجزلانه وجاء ركب معاها ومشو

.....

ساره ارتاحت نوعا ما وهدت بدعم شرين ليها واهتمامها بعلاجها وادويتها والله الأخت ما بتعمل كدا غايته الحمدلله الحمدلله ربنا عوضني بناس طيبين وقامت مشت علي شنطتها كانت ليها اسبوع ما كلمت أهلها ولا إطمنت علي خالتها وقالت في بالها مدام انا براي وشرين ووسام مافي أقوم اخت التلفون في الشاحن يشحن عشان اتصل علي ناس امي وختت تلفونها في الشاحن ومرقت دخلت المطبخ تعمل طبخه للعشاء وخاصه انه شرين صفر في الطبخ والايام الفاتت كله اكل من برا دخلت تشوف في شنو عشان يطبخ وفتحت التلاجه لقت دجاج طلعتو وختته في مويه عشان يفك وبعدها بقت تفتش وتشوف في شنو في المطبخ ومر وقت وهي في المطبخ عملت شوربه دجاج ورز بالشعيريه وطلعت كيس البطاطس عشان تحمره وبعد ما كل شي جهز دخلت الحمام وأخذت دش دافئ وجات مارقه لبست ومشت علي تلفونها وفتحتو وطوالي اتصلت علي أهلها

الو الو احمد تعال علي البيت انا عاوزه اطلع علي الجزيره البروحها حسام ولدي دائما سريع عليك الله انا ما بقدر امشي براي... وقلت التلفون وركبت العربيه عشان تمشي علي البيت عشان احمد ح يجيها هناك ويطلعو علي الجزيره

الطريق كله ساكتين حسام وجينا ولسه الطريق طويل وبهناك ام حسام في الحفله قاعده وسوزانا نادتها تعرفها بالدكتوره ليليان وسلمت عليها وقعدو يتونسو مع بعض وسوزانا بتمشي وتجي عليهم وفي اخر شي قعدت معاهم وقالت سوزانا لي ام حسام كيف جينا مع حسام ان وافقت علي الطلاق...والله اليوم ان شاءالله بخلص كل شي...واخيرا ح يرتاح والله يا ليليان حسام دا شاب في قمه الرقي لكن بس اتلمت عليهو جينا ويليم عزبته عزاب شديد.... لحظه لحظه جينا ويليم كاني بعرف الاسم دا.... اتلفتت عليها ام حسام وقالت ليها ما

عشان توقف العربيه بس بقت تضحك ضحك هيسثيري وتقول ليهو قد قطعت فرامل السياره
اخبرني باي طريقه تحب ان تموت طالما انت لن تكون لي فلن تكون لغيري هل تفهم ذلك
والان اخبرني هل تريد ان نموت باي طريقه هل تريد ان اقفز من علي هذا الجسر الذي نبعد
عنه بعض أمتار ام نصطدم بالشاحنة التي أمامنا ام نقفز من هنا علي هذا الوادي الذي
بجوارنا أ... هو مخلوع من تصرفها وخاصة انها كانت جاده جدا في كلامها بقي يمسك يدها
والعربيه تمشي شمال ومره يمين وهي بتصرخ وتقول كل العرب خاينين ساقطك واقتل نفسي
معاك لاني لا أتحمل الخيانه وهو يكورك ويحاول يثبت العربيه وهي بتقاومه وخلص بقت
ماسكه فيهو بضاربو والعربيه ماشه لحالها وفجاءه تنجرف العربيه قبل ما تصل للجسر
وتتخبط في الدرابزين بقوه هايله وتتدحرج السياره وتقع في وادي قبل الجسر وهنا الصرخات
تتعالى



ساره فجاءه جاتها طعنه في قلبها شديده خلتها تستأذن من سماح وتفقل منها وهي لسه
حاسه بالطعنه مع ضيق في النفس لدرجه انها بقت تبكي من غير ما تشعر

قبل وقوع العريبه بدقيقتين للوادي

واول ما اتصدمت السياره بالدربرزين اتخطبو حسام وجينا شديد بي مقدمه السياره رغم الضربه القويه ال تعرضو ليها غاب حسام عن الوعي لمدته اربع ثواني واول ما فتح عيونه كان الدخان طالع من كبوت العريبه بشده ودخل علي جوا اتلفت وعابن لجينا كان راسها علي الديركسون و نازل منها دم حاول يساعدها بس اول ما أتحرك حس انه العريبه بقت تتدحرج وتاتي وقفت عابن للمكان الفيهو العريبه لقاها العريبه لمن ضربت الدربرزين ومن شده الضرب اتكسر الدربرزين وكفر العريبه ال علي اتجاه جينا علي الهاويه وكان في اللحظة دي لا بد من اتخاذ قرار سريع يا يفتح الباب وينفذ نفسه يا يحاول ينفذ جينا الكانت فاقدته الوعي وفي حاله ما قدر يساعدها تقع العريبه و ح يموت معاها بس في لحظه جاتو ساره في وشه واتزكر كل احلامه معاها والعريبه لسه بتتهتز وفي لحظه فتح الباب براحه علي أساس ينزل ويسحب جينا وفعلا بقي بتسحب براحه والعرق نازل منه بغزاره والعريبه بدت النار تشعل فيها بقدام وهو كاتم نفسه من انه اقل حركه شديده العريبه ح تقع وفتح الباب براحه ونزل رجله براحه بس الرجل نزلت علي طرف بدايه الوادي غرز رجله عشان ما يجي مدحرج ويقع واول ما ثبتها ونزل رجله التانيه ولقي نفسه برا مد يدينو وبدا يسحب جينا وخلص بدت تتسحب وفجاءه رجله تتزحلق ويحاول يمسك في العريبه بس العريبه تتحرك ويده اتفلت وقع وبقي مدحرج علي اتجاه الوادي لحد ما أتصدم بحجر كبير و اتضربت رأسه بيهو وبعدها فقد الوعي والعريبه وقعت لتحت بصوره شديده وعلي طول فرقت وبقت النيران شديده

وعن احمد هو كان صاحب ابو حسام وقويت علاقته اكثر مع ام حسام بعد موت راجلها وحسام ما كان نقاش العلاقة البين عمو احمد وأمه غير رابط الصداقه مع والده الله يرحمه وهو كان سوداني أرمل عابش هنا من زمان مع بناته الاتنين الكانو بعانو من اعاقه ذهنيه ودا كان نتيجة زواجه

من بنت عمه المهم انه هم حاليا في الطريق اتلفتت عليه هدي وقالت ليهو اه يا احمد ما قربنا بِسْمِ اللَّهِ الرَّحْمَنِ الرَّحِيمِ وين قربنا نحنا لسه ما وصلنا ربع الطريق شيلي الصبر ... واي يا احمد انا قلبي واجعني علي ولدي دا الحيله الطلعت بيهو من الدنيا خايفه المجنونه دي

تعمل فيهو شي ... هدي الله يرضي عليك بطلي الوسوس دي وخلي املك في الله كبير انتي
بس ارتاحي وربنا كريم بحفظه ليك ان شاءالله ... امين يارب العالمين



دخل وسام وأخته بعد يوم متعب هو في العياده وهي بين الجامعه والمكتبة وواول ما دخلو
الشقه كانت ريحه الأكل فايحه وماليه البيت ملي

وسام اتلفت علي اخته وقال ليها انتي شامه إانا شامو هزت راسها وقالت ليهو اي بس
معقوله الريحه دي في بيتنا وهنا ظهرت عليهم ساره وهي لابسه عبايه الصلاة حقتها الكانت
بتلبسها لمن وسام يكون في ابنتهم ليهم وقالت اي الريحه دي في بيتكم انا كنت فاضيه
وقلت اطبخ طبخه ان شاءالله بس تعجبكم وسام طوالي خت شنطته في المدخل حق الشقه
وقال ليها يااااا سلام عليك يا ساره واخير بقي في بيتنا طبيخ وبقي يطلع منه ريحه اكل
...يا سلام يا اخوي علي أساس انا ما قاعده اطبخ ليك ... في ذمتك اخر ملاح طبختيهو متين
قولي قولي قولي قولي ...ومالك علقنت كدا ماعارفه بس قبل كم شهر كدا ...الحمدلله انك
اعترفتي ...طيب يا جماعه يلا اخدو حمام لحد ما احضر ليكم الصفره ...طبعا طبعا ما تقولي
اني ميت من الجوع ودخلو ياخذو حمامات وهي بدت تقطع السلطه وتجهز الاكل وتخت في
تربيزه الصفره ولمن طلعو وسام صفر صفاره طويله وقعد وبقي ياكل وأخته بتشاغل فيهو
وتقول طيب اصبر وانتظرنا نقعد ... واللقمه في خشمه قال ليها ما قادر ياخ رحيه الاكل تفتح
النفس ولا طعمه يا سلام عليهو حلو شديد وينك يا امي تجي تشوفي ولدك وهو بياكل اكل
بيتي وقعدو وهم بضككو وبقو ياكلو وشرين تحكي لي ساره عن الامتحان وصعبوبته ووسام
برضو بحكي ليها عن الشغل وألكم الهائل من المرضي ردت ساره وقالت ليهو الله يشفي
مرضانا ومرضي المسلمين ...وهو بمد يده عشان يشيل من البطاطس وقال ليها امين يا ساره
امين وتمو أكلهم وبعدها شرين ضايرت المكان وغسلت العده ومشت ساره عملت الشاي وجو
قعدو جنب التلفزيون وقعدو يتونسو ... كانت الساعه ماشه لحداشر وهنا وسام قال انا بكره
ما عندي دوام الصباح رأيكم شنو نمشي نتمشي برا ... اي اي والله فكره رايك شنو يا ساره
انتي من جيتي ما مرقتي خافت ساره انها تطلع ويشوفها حسام فهمتها شرين بس طمنتها
وقالت ليها انتي قائله هنا زي السودان لندن دي كبيره شديد مافي زول بعرف الثاني هنا
ووسام ما حبي يتدخل عشان ما يجرجها هو عرف بأنها عندها مشكله مع اهل زوجها وقدرت
تقتعها شيرين وقامو يلبسو عشان يطلعو ووسام لبس وطلع ينتظرهم برا ودفانق وحصلو
وركبو معاه وهنا كان في واحد من المعاوين لي المحقق المتابع قصه اختفائها واول ما
شافها وشاف الصوره واتاكد من شخصيتها المطابقه للصوره طوالي اخذ رقم العريبيه واتصل
بي المحقق واداهو التفاصيل ممتاز عندنا العنوان ورقم اللوحه طلب المحقق منه الاستعلام
عن صاحب العريبيه واسمه وكل معلوماته الشخصيه



دا شنو الزحمة دي ...يا لطيف شكله حادث لانهم قافلين الشارع ...يا الله الله يلفظ بيهم
وهنا نزلت هدي عاوزة تعرف عن الحادث الحاصل ولان الطريق اتقفل والعربات واقفه وكمان
مافي طريق غيره بودي للجسر عشان يصلو لي أجزيره وبقت ماشه ولحقها احمد وهو بقول
ليها ماشه وين انتي قيفي ولحقها ومسكها من يدها في شنو انتي ماشه وين ... اتلفتت عليه
وقالت ليهو ماعارفه يا احمد حاسه اني ما قادره اخذ نفسي حاسه انه حسام وما تمت كلامها
وجاء شرطي ماري جنبها وبدون ما تشعر سألته ماذا حدث ... للأسف حادث فظيع انقلبت
السياره علي الوادي وانفجرت ...بلعت ريقها بصعوبه وقالت ليهو هل كان يوجد في أشخاص
عندما انفجرت ... هز براسه وقال لها سيده وسيد ... وقبل ما تسال تاني احمد قال ليهو وهل
ماتو ...السيدة نعم ولكن الشاب نُقل الي المستشفى ومشي وسأبهم عاينت لي احمد وقالت
ليهو حسام ولدي يا احمد حسام ... حسام شنو ما تقولي كدا ياخ ان شاءالله ما يكون هو
دقيقه خليني اتصل بيهو وطلع تلفونه من جيبه بس تلفونه مقفول عاد تاني الاتصال وبرضو
مقفول ... اه ما برد ...للأسف مقفول انتي عندك رقم جينا ايوه ايوه وجزت علي العربية
شالت تلفونها واتصلت عليها وتلفونها برضو مقفول دب القلق في قلبها واصرت علي احمد
يمشي يسال واحد من ناس الشرطه عن المستشفى النقلو فيها الشاب وخاصة انه الشرطي
قال انهم ما لقو اي هويات لانها اتحرقت ومشي احمد يسال ويعرف اسم المستشفى الكانت
اقرب للحادث وهي كانت في الجزيره ورجع كلمها واصرت أنها تمشي المستشفى عشان
تتظمن بس الطريق مقفول وفعلا نص ساعه من الانتظار والتوتر أفتح الطريق وبقو ماشين
وهدي متوتره شديد ولحد ما وصلو ونزلو ووصلو الإستعلامات كانت اعصاب هدي بايظه
وبتفرك في يدها وبتقول يارب ما يطلع هو يارب ما يطلع هو وسال احمد وهنا الموظف قال
ليهو جانا شاب هنا قبل ساعه وهو في غرفه العمليات بس للأسف ما كان عنده هويه يعني لا
نعلم عنه شيئا رد احمد عليه وقال يعني هو في حاله خطره ...لا اعلم شيئا هذا تسأل عن
الطبيب المعالج وسمعت كلامه هدي واصرت انها تنتظر العمليه عشان تشوفه هو ولا ما هو
كانت مستحيل تقدر تمشي وهي ما مطمئه وكل شويه ترجع تتصل علي ولدها علي امل انه
يفتح تلفونه بس للأسف كل مره تتصل تلقاه مقفول مرت زي عشره دقائق علي وصولهم
وهنا الدكتور طلع من غرفه العمليات الكان فيها من اول ما جاته الحاله بس هنا احمد ينتهز
الفرصة انه الباب مفتوح يدخل علي طول كان الممرضين مطلعين السرير علي الإفاقة وبعين
احمد للسرير ويشوفه هو حسام هو بنفسه ايوه دا حسام انتبه ليهو الممرض طوالي مشي
عليه وقال ليهو ممنوع الدخول هنا لو سمحت اخرج وبعدين ممكن تتظمن عليه في الغرفه
طلع احمد وهو ما عارف ح يقول لي امه شنو وهو عارف انها روحها فيهو واول ما شافتو
هدي طالع جرت عليه وقالت ليهو اه ما طلع هو صح ما طلع هو صح ما طلع هو صح ما
طلع هو صح وهي بتسأله بتهز فيها بيديها الاتنين كانت بتكرر الكلام زي المجنونه ما
خلاص ما بقي فيها عقل عشان تنتظره يتكلم

.... نزل احمد رأسه للأرض بس هي رفعت ليهو راسها بيده واول ما شافت دموعه مرفرقه في عيونو عرفت الجواب وبقت تصرخ وتبكي بكاء يقطع القلب حضنها عليه وقال ليها هو كويس قولي الحمد لله وهي في حضنه تلقي نفس الدكتور الطلع قبل شويه رجع وعاوز يدخل غرفه الإفافة زحت من حضن احمد وجرت للدكتور تلحقه قبل ما يدخل غرفه الإفافة دكتور دكتور دكتور اتلفت الدكتور لي صوتها ورغم قرب المسافه الكانت بينها وبين الدكتور بس هي كانت بتنادي عليه بالاحاح وقف الدكتور وهي طوالي بقت تسال فيهو عن حاله ولدها... رد الدكتور الياباني وقال ليها به جرح في الراس وكان كبير ولكني تمكنت من انقاذه وللأسف حدث له بعض الارتجاج البسيط و يوجد ايضا كسر في يده اليمني وبعض الكدمات في باقي الجسم ولكنه نجا من حادث مروع لان السيده التي معه تفحمت جثتها ولكننا سنظمنن اكثر عندما يفيق واستأذن الدكتور ودخل غرفه الإفافة

وهنا بقت تبكي هدي واحمد يهدي فيها لحد ما استوعبت الحصل وانه بالجد مفروض تشكر ربها عشان ولدها ما اتحرق وبعدها نزلو عشان يعطو افادتهم للشرطه وعن الصله التي بين السيده جينا وحسام ويقو متزمتين جدا مع هدي بعد ما عرفو انها عربيه ومسلمه وجينا ببرطانيه وهدي أكدت ليهم انها زوجه ابنها وأنهم زهبو لجزيره لتقضيه بعض الوقت ونهاي ما جابت سيره الخلافات البينهم وأنهم كانوا علي وشك الانفصال من بعض ويقو يحققو معهم لحد ما تاكدو ان جينا هي زوجه حسام وقدرت تتخارج منهم ولكن بعد ما طلبو منها عدم مغادره الجزيره الا بعد رفع التقرير والكشف عن سبب الحادث وفحص السياره وهي كانت تعبانه واكدت ليهم انها ستكون بجوار ابنها ولن تتحرك الي مكان

وخلص الصباح قرب يصبح ومع التعب والسهر ما قادره تقيف علي حيلها اقترح احمد انهم يمشو ينامو في فندق وبعدين يرجعو يكون حسام فاق زي ما قال الدكتور وافقت هدي ومشيت معاه لانه الدكتور ظمنهم وهي كمان مع التحقيق ومع الخلعه خلاص ما قادره تقيف ومشو وحجز ليها احمد غرفه ولنفسه غرفه وما صدقو هم الاتنين يختو جسمهم علي السرير وراحو في سابع نومه

صحت ساره من النوم تعبانه قلبها مقبوض وحاسه انه في حاجه ح تحصل ليها استعاذت من الشيطان الرجيم وقامت علي حيلها رتبت محل نومها و مشت دخلت الحمام ولبست وجات مارقه لبرا وبعدها مشت المطبخ كان وسام داخل من برا وشايل معاه سندوتشات وجراندا اول

نفسه لان الحادث حصل هنا وفعلا يعاينون لي الدرايزين الكان مكسر وبقت تبكي ساره وهي بتسأل نفسها يا تري يا حسام كنت جاي مع جينا لي هنا عشان شنو ما صدقت يعني اني امشي عشان ترجع ليها وتجيبيها علي المكان القضينا فيهو شهر عسلنا بس يا خساره علي حبنا وانا الكنت عاوزه اموت لمن سمعت بخبر الحادث بس مافي مشكله انا بمشي وبقيف معاك زي ما وقفت معاي في مرضي وعشان انت ولد عمي وبس لكن بعد تبقي كويس ح يكون الطلاق هو الفيصل بينا وارجع لبلدي واطوي الصفحه دي بحلوها ومرها من حياتي للأبد لاحظ وسام ليها من المرابه وهي صاره وشها وهنا قال ليها معلش يا ساره لو بتهمك لسه مصلحه راجلك ما تقولي انك مرته لانه بكدا ح يلبس القضية هو انتبهت لكلامه وسألته قضيه قضيه شنو مش حصل دا حادث ولا في حاجه ثانيه انا ما بعرفها ... انتبه وسام انه فلت بي لسانه وهنا قال ليها لالالا انا قصدي ح يكون في تحقيق وإذا شافوك مهتمه بيهو شديد ح يتحرو عنك وهنا يعرفه انك مرته الثانيه وتبقي مصيبه وما بعيد يقولو انه هو المدير للحادث وخاصه انه نزل من العربيه قبل ما تقع وتنفجر بجينا وغير كدا في حاجه ثانيه هنا القانون لا يسمح الا بزوجه واحده يعني ح تبقي قضيتين دا اذا عاوزه تسمعي رأي لالالا يا وسام انا عارفه بقصه القانون وما ح اجيب سيره ابدأ غير اني بت عمه ... وانتي بالجد كدا اي حسام يبقي ولد عمها لي ساره طيب ممتاز دا يبقي مبرر لوجودك جنبه علي الاقل وصلو المستشفى وبعد ما دخلو وعرفو انه راقد في غرفه ١١٧ مشو عليهو واول ما تفتح الباب ساره تلقي حماتها في وشها ومن دون ما تشعر صرخت ساره ساره وحضنتها وقعدو يبكو شفتي الحصل علي حسام وحسام كان ممد في السرير ورأسه مربوط ويده مجبضه وتحت عيونه اسود وفي جرحه جنب خشمو مختوت عليها لصقه فكت حماتها ومشت عليهو كانت نفسها تجري عليهو وترمي نفسها علي صدره وتقول ليهو انها بتحبو بس وقفها شعورها بأنه هو خان حبه ليها وكانت نفسها تسأله انت جيت مع جينا هنا عشان شنو يا حسام عشان شنو رد علي ما توجع قلبي اكثر ما هو موجوع وجاتها الام لمن شافتها وقفت ومسكت يدها وقالت ليها مالك وفتي تعالي جنبه يمكن لمن يسمع صوتك يصحي وقربت عليهو قعدت بطرف السرير وحركت يدها برجفه وخوف ومسكت يده وهو ما حاسي بالدنيا بس فجاءه تحصل حاجه غريبه وانه كان متوقع انه يصحي من قبيل بس للأسف ما صحي وبس هنا تحصل المعجزه وهي ماسكه يدها وفجاه تحس بيده بتقبض علي يدها وهنا ترفع راسها وتعاين ليهو تلقي عيونه بتتحرك وهنا يفتح عيونه بصعوبه ويرجع يغمضها انتبهت الام لي ولدها وهنا بقت تقول احمد احمد حسام فتح عيونه وغمضها ... وكانت شرين واقفه جنب اخوها جوا الغرفه ومعاهم احمد واحمد اول ما سمع كلام هدي طوالها مشي عليهو عشان يتأكد بس يلقيه مغمض وهنا هدي قالت ليهو شفت يا احمد حسي بجيه ساره ومسكه يدها ما هو روحه فيها وهنا قربت ساره تقول ليها روحه في انا وطيب الكان جايبو معاها لهنأ شنو بس سكتت وما حبت تتكلم لانه دا ما وقته □□□□

يا بت طفلي النار علي الأكل ..يا حبوبه ما قبيل قلتي لي وانا طفيت تحتها ... البعرفني شنو انا ما قائله انك نسيتي غايئو يا سماح الوقت كله بقيتي ماسكه التلفون زي ناس شركه

الاتصال غايتو يا حليل ايام سماح لمن كانت مؤدبه وتسمع الكلام ...يا حبوبه انا زي ما انا
انتي البقيتي معاي متغيرة ودايما انا ما بعجبك شي اعمله بطلي فلسفه عامله نفسك
بتفهمي وانتي زي الطير في الباقير شيلي البطاطس دا وقشريهو شالت سماح البطاطس
وقعدت في السرير القصادها وهنا جات رشا داخله عليهم سلام ... اتلفتت عليها الحبوبه
وقالت ليها وانتي يا دوب جايه

و ليه ما جيتي من الصباح عشان تطبخي معنا ما عارفه الليله الكرامه حقت خاله راجلك
...بسم الله الرحمن الرحيم انتي يا حبوبه مش براك امس قلتي لي ما عملي حاجه عشان انا
حامل ... انا قلت كدا حصل الكلام دا متين يا كدابه ... ردت سماح السلام وقالت ليها اقدي يا
رشا حبوبه الأيام دي بقت تنسي كثير ما تهتمي كثير بالموضوع انسي ان شاءالله ينساني
الموت قولو امين ما تقولو الله يقلقلكم ... بقو يضحكو وقالو ليها يقلقلنا كيف يعني ... شفتي
البن لمن ينقلني في النار ان شاءالله انتو الاتنين تتقلقلو زيو يا سجمانات يا معولاقات
....ضحكو وسكتو ح يقولو شنو احسن ليهم يسكتو ما ح يخلصو منها اذا اتكلمو وهنا رشا
دنقرت براحه لسماح وقالت بصوت واطي عشان الحبوبه ما تسمعها وقالت ليها شفتي امس
حصل شنو .. وساره بتقشر في البطاطس وهنا خنت السكينه من يدها وقالت ليها مالك في
شنو ... انا وخالد اتشاكلنا والحبوبه شايله التلفون وراميه اضانها ليهم ... اتشاكلتو متين انا
ما امبارح لمن طلعت مع امي كنتو قاعدين في الحوش وانتي بتعملي البن وهو زي العجب
قاعد معاك ... اي صاح بس بعد ما انتو طلعتو جاء تلفون لخالد ... من منو من لبني
شنو لبني ما غيرها يابت وطي صوتك حبوبتك تسمعنا اي يا ستي لبني ما غيرها ... طيب
تعالى ندخل جوا وهنا اتلفتت عليهم الحبوبه وقالت ليهم كملو كملو كملو اه لبني قالت
ليهو شنو ... قعدو يعاينو لبعض مخلوعين وطوالي سماح وقفت ومسكت يد مره اخوها
وقالت ليها تعالي ياخي ندخل جوا وهنا شالت الحبوبه عكازها وأدت سماح ضربه في رجلها
لمن سماح صرخت وقالت حبوبه رجلي ...تقطع قولي امين اقعدو هنا ولا أقوم بعكازي دا
اكسر ليكم راسكم وانتي كمان كملتي لبني كانت عاوزه شنو من خالد والله قعدو لمن كتفو
يديهم اتقول الفه وواقفه قدامهم

يا جماعه امشو شوفو الوراكم مافي داعي للقعاد الدكتور طمنا خلاص و قال انه طالما فاق وتاني نام بكون من اثر المسكنات لان ضربه الراس كانت قويه ولو فضل صاحي واكيد ما ح يتحمل الالم عشان كدا بدو ادويه منومه ... طيب الحمد لله وان انشاء الله ربنا يطمنكم عليها وإذا احتجتني اي شي انا زي اخوك وانا باخد تلفونك من شرين وبتابعك ... مشت شرين عليها وقالت وانا والله لو ما كان عندي امتحان بكره كنت قعدت معاك يا ساره بس انتي عارفه الامتحانات ... عارفه والله وأنتو ذاتكم ما قصرتمو وكتر خيركم لحد كدا اه مع السلامة وربنا يرفعه ليكم امين يارب العالمين وودعتهم وهنا طلعت ام حسام من الغرفه ومشت عليهم وطبعا ساره حكمت ليها عنهم وعن ووقفتهم معاها طول الأيام الفاتت وشكرتهم علي ووقفتهم معاها وودعتهم انها تزورهم هي وساره اول ما يرجعو وودعتهم ونزلت معاهم ساره لحد ما ركبو عربيتهم ومشو وهم رافعين يدهم ليها وهي كمان كانت رافعه يدها ليهم وبعدت العربية لحد ما اختفت بين العربيات رجعت. ساره ومشت علي الاصابير وركبت ولمن وصلت لقت احمد عاوز ينزل واول ما شافها قال ليها الجماعه مشو خلاص ...ايوه الحمد لله ... طيب كويس انا الله يوصلهم بالسلامه امين يارب خلاص انا ح امشي اجيب ليها حاجة ناكلها عاوزه حاجة اجيبها ليك معاي لا شكرًا يسلمو ما عاوزه حاجة ... طيب يلا سلام وهي طلبعا من امس ما اكلت حاجة غير كدا كمان حبوبها ونستها والوقت أتأخر الساعه داخله علي تسعه مساء قعدت جنب ام حسام وعينها علي حسام نفسها انه يفوق عشان تظمن عليه وبعدها يبقي في كلام تاني وبعد فتره جاء احمد ووزع عليهم السندوتشات والمويه والعصير وقعدو ياكلو كان مافي واحد منهم مأكّل ليهو فتره ...

□□□ السودان □□□

في شنو يا لبني انتي مش اخترتي طريقك وعرستي ولد خالتك العندو قروش وهنا دموعها نزلت وهي بتقول ليهو يا ريبتني ما ما سبتك ولا عرسته دا طلع إنسان تافه من اول يوم وصلت ليهو هو ما خلي عزاب ما عزبه لي شوف شوف ورفعت البلوزه ورتة يدها الكان في اثر حرق شوف عمل فيني شنو ولسه باقي جسمي مليون وكل ما اتصل علي امي وأحكي ليها ما كانت بتصدقني وبتقولي عيشي ولمي القروش امي يا خالد ما بهمها الا القروش وقلت اصبر بس هو طلع زول حق حريم الكان بعرفهم وبتكلم معاهم ويجيبهم لحد البيت ولمن كنت ما ارضي كان بضربني وقدر ما حاولت استحمل ما قدرت لحد ما في يوم طلقني وطرمني بقميص نومي في الشارع ولو ما جارتني السودانيه دخلتني عندها وهي وراجلها ساعدوني لحد ما وصلت السودان ما كنت عارفه ممكن يحصل لي شنو وخالد قاعد قصاها بسمع فيها وهي بتحكي وتحكي وبعدها خلصت وقف علي حيلو وقال ليها للأسف دا اختيارك ولازم تتحملي نتيجة اختيارك بس انا ما عندي ليك شي وزي ما خليتيني زمان عشان واحد ما

يسوي انا اليوم بخليك عشان وحده تسوي كتير وغاليه علي كتير وح تكون ام ولدي ولا بتي قريب...خالد انت اتزوجت ههههه كنتي فاكهه اني ح اقعد ابكي وانذب حظي عشانك ولا عقلك المريض أتصور اني ممكن أكون قاعد انتظرك ترجعي لي...خالد انت بتحبني ومستحيل تكون نسيتني المستحيل انه أكون هسي واقف قدامك وبتكلم معاك ... طالما مستحيل ليه جيتني جاري اول ما طلبت منك تقابلني جيت جاري صاح بس ما عشان حبك وبموت فيك انا جيت جاري عشان اشوف الذل والانكسار الأنتي وصلتي ليهو والحمدلله الكأس الشربيتيني ليهو زمان اه انتي هس بتشربي فيهو واشربي فيهو وضوقي مرارته وسابها ومشى يادوب خالد حسي انه ارتاح ويادوب كرامته رجعت ليهو ... قعدت تبكي لبني بعد ما فقدت اخر زول كان بحبها رجعت للبيت وهي دمعنها في يدها واول ما دخلت لقت اخوها طالع بشنطته جرت عليهو وهي بتبكي وتقول ليهو ما تمشي وتسيبني انا ما عندي غيرك ... لبني ابعدني من وشي انا حلفت مكان فيهو انتي مستحيل اقعد فيهو ليه ياخي انا اختك ليه بتعمل فيني كدا ...لو متزكره قبل ما تعرسي عريس الهناء السبتي سيده وتاج رأسه يوم حنته عشانه قلت ليك لو عرستيهو لا انا اخوك ولا بعرفك بس أنتي ركبتني راسك ونفدتني كلامك ودي النتيجة كم شهر وجيتي لينا مطلقه ومضروبه اقعدني مع امك وخليها تشوف ليك حل زي ما ورطتك وشال شنطته وطلع وقعدت تبكي كل الناس البتحبهم راحو منها وبقي مافي غير امها وابوها في البيت وكل واحد بقي عايش في حاله لا اكل بلمهم ولا في فرح دخل بيتهم عشان يلهمهم وحتى صحباتها مقاطعاهم من يوم ما جو ينصحوها بأنها ما تسبب خالد وهي اتهمتهم بالحسد والغيره عشان ولد خالتها مغترب وعنده القروش

□□□□□□□□□□□□□□□□□□□□

رشا حبيبتي...خالد ابعد مني انا ما طايقه اسمع صوتك ليه ما عاوزه تسمعي صوتي معقوله بس انا حبيبك ... اتلفتت عليهو ودموعها نازله علي خدها وقالت ليهو حبيبتي صاح بدليل الرساله الرسلتها ليك لبني عشان تمشي تشوفها وانت ما صدقت جريت عشان تشوفها ... انتي قرיתי الرساله...اي قريتها ...

هي فعلا طلبت انها تشوفني وانا مشيت وشفتها بس ما عشان انا بحبها وما صدقت انها طلبت تلاقيني....يعني مشيت ليهو...اي مشيت....وبتقولها في وشي كمان....اي بقولها عشان انا ما عاوز اكدب عليك وانا مشيت ليهو عشان افهمها وأقول ليهو انا عندي مرا لو لفيت الدنيا دي كلها ما بلقي زيها وأنها حبيبتي وقام خت يده في بطنها وام جنائي وكل شي حلو لي....خجلت رشا من الكلام الحلو دا وبكل رقه وخجل قالت ليهو بالجد قلت ليهو كدا اي قلت ليهو لاني عارفها كويس ح تقعد تتصل وتعمل لي مشاكل معاك قلت احسن اخليها تفقد الأمل نهاي وتفتع مني....هي مش اتزوجت ولد خالتها ..يا ستي تتزوج تتطلق ما شغلتي هي ماتت بالنسبه لي المهم عندي انها تتخارج من حياتنا لاني ما ح اسمح لي إنسان يسبب ليك

بعد مرور يومين وهم لِسَّه في المستشفى وحسام بقي كويس بس ساره متحفظة اي هي ممكن تسامحه علي زواجه قبلها وكمان علي عدم مصارحته ليها بس انه يسافر معاها لحد هنا عشان ينبسطو وما فكر فيني دا العمري ما ح أسامحه □□□

واخيرا الأطباء سمحو للمحققين ان يستجوبو حسام لن حالته بقت تسمح والمحقق بقي يسأل فيهو ويخنفه بالأسئلة بس هو حكي الحقيقه ليهو و انه كان متزوجها من كم سنه بس الحياه استحالت بيناتهم وانه طلب منها الانفصال وهي رفضت وبعدها انا اضطررت عشان امشي السودان وذلك كانت رغبه والدي قبل وفاته وفعلا ذهبت وجلست هناك فتره وبعدها ابنه عمي مَرَضَت وأتيت معها لكي تتعالج وممكن تتأكد من المستشفى العام حقيقه ذلك وحتى بعد ما وصلت قلت يمكن ان تكون جينا تغيرت ونواصل حياتنا ولكن اكتشفت انها بقت اكثر عدوانية ودا كان بسبب إدمانها علي الكحول وجات امه وقالت انها قالت للمحقق الاول ان جينا كانت تتعالج في مستشفى الأمراض النفسية والعصبيه وانا طلبت من الدكتوراه التي كانت تعالجها ان تعطيك أفادتها وهنا المحقق قال ليها بالفعل نحنا استدعينا الدكتوراه ليليان واثبتت ذلك ...طيب ليه تاتي بتحققو مع ولدي بس حسام قال ليها لحظه يا امي انا عندي معلومة مهمه عاوز اقولها للمحقق ...أصغي له المحقق بي اهتمام شديد ... طبعا لمن لقيتها انها ما تغيرت بل بقت أفطع من الاول طلبت انه ننفصل بهدوء بس هي ما وافقت وفي يوم اتصلت علي وقالت انها موافقه انها تنفصل مني لانها ما بتقدر علي العيشه بالطريقه دي هي في مكان وانا في مكان بس كان عندها شرط ...وماهو الشرط شال نفس وختاه وقال طلبت مني ان ننفصل في نفس المكان الذي تقابلنا فيهو اول مره وكان المكان دا في هذه الجزيره وانا وافقت علي طول عشان انه الموضوع وكان اليوم المحدد للسفر يوم الخميس وفعلا مشيت ليها بسيارتي علي أساس نمشي بيها بس هي رفضت واصرت أننا نمشي بسيارتها وانا وافقت علي مضض وفعلا ركبت معاها ومشينا ونحن في نص الطريق اتناقشت معاي وبقت عصبية بصوره فظيعة وهنا طلبت منها نقيف عشان نتكلم بس هي بقت تضحك بطريقه هيسترية ولمن سألتها قالت أنها قطعت الفرامل وعرفت من كلامها انها ما ح تقدر تعيش من غيري ففضلت انها تنتحر وانا معاها هي متخيله اني لمن أطلقها ح اتزوج بس دا ما كان في بالي وحاولت أوقف العربيه بس هي مسكت يدي والعربيه انحرفت وضربت في السور ونحننا اضربنا بقوه في مقدمه السياره اتزكر اني غبت عن الوعي ثواني ولمن فقت لقيت جينا راسها علي الديريكسون والدم نازل منها اتحركت عشان افوقها بس العربيه بقت تهتز ولمن عاينت لقيتها جذء منها طالع علي الوادي واي حركه كانت مني ح نقع نحنا الاتنين وبعدين فكرت انه انا انزل براحه واسحب جينا براحه وفعلا نزلت واول ما نزلت مديت يدي اسحبها وبدت تتسحب معاي بس العربيه اهتزت وانا وقعت علي الوادي وبعد كدا ما وعيت الا وانا هنا خلص التحقيق وبعد مراجعه الكاميرات ألقى الطريق تبين ما قاله حسام كان صاح واتنقل

التحقيق علي كدا وانتهت قصه جينا علي كدا ودا كله وكانت ساره سامعهو وهي واقفه برا ولان الباب كان فاتح وكدا سمعت بكل سهوله ولمن طلع المحقق سمعت ام حسام وهي بتقول ليهو الحمد لله ما جبت سيره انه جينا عرفت بموضوع ساره ... مستحيل يا امي انا ما ح أضيع نفسي والحمد لله جينا ارتاحت وريحتنا ... بس يا حسام لو ما ربنا شافك كنت هسي بعد الشر عليك انا قلت ليك ما تمشي معاها بس انت راسك ناشف زي ابوك امي انا ما صدقت أنها توافق انا نحن نطلق بس هي اصرت اننا نمشي الجزيره عشان ترضي نطلق وانا همي كله كان ساره لمن القاها أسلمها بيدي ورقه الطلاق انتي يا امي ما عارفه انه زعل ساره دا كان زي السكينه في قلبي بس يا امي ما قلتي لي عرفتو مكان ساره كيف ... ساره هي الجات لحد هنا براها طيب كانت وين وعرفت من وين ... قال انه بت خاله صحبتها عايشه هنا وهي الجات ساقتهما الليله ديك وقالت انها شافت الحادث في الاخبار وجات ليك تجري تجري

هي وين طيب انا نفسي أشوفها من ما جاء المحقق وهي طلعت ما جات ... يعني ح تمشي وين أكيدا برا ... وهنا ساره مسحت دموعها بعد ما عرفت انها ظلمته لمن افكرته انه جاي معاها هنا يتفسح بس دخلت عليهم ساره وهي دموعها لسه نازله في خدها واول ما شافها ودموعها ماليه وشها طوالي قام علي حيله عاوز ينزل ليها بس هي قالت ليهو خليك انت لسه تعبان ... انا بقيت كويس لمن انتي رجعتي لي يا عمري وهنا طلعت الام عشان تخليهم علي راحتهم ساره انا أسف علي كل وجع وجعتو ليك بس والله انا ما قلت ليك حاجه عن موضوع جينا عشان ما أفقدك عقلي صور لي لو حكيت ليك قبل ما نعرس كان ممكن ما توافقي وكنت ناوي احكي ليك بعد العرس بس مرضك منعني وخاصه الدكتور وصاني انه أدمك معنويا وإذا انا حكيت ليك كنتي ح تتعبي وممكن ما ترضي تقدي عشان العلاج دا كله ما كان ممكن يحصل لو حكيت لي من الاول ما قلت ليك انا ما كنت عاوز أفقدك يا ساره وهنا دموعه نزلت بس ساره بتحبه وهو خاطر بحياته عشان يطلق من جينا وهنا مشت عليهو وحضنته وقعدو يبكو شديد

ومرت الأيام وحسام بقي كويس وفك الجبص وعلاقتهم قوت اكثر من الاول وسافرو تركيا عشان يعملو شهر غسل الكان دايمًا بتأجل وهي مبسوطه شديد واخر طلعات وسهرات معاه وكل شويه ترسل لي أهلها صورها علي الواتس ومرت علي الحال دا لحد ما جاء آليوم الكانو قاعدين ياكلو وتقوم ساره عشان تغسل يدها وحسام عينو عليها عاوز ياكلها بعينه وفجاءه تشعر ساره بنفس الدوخه الكانت بتجيبها زمان وتسود الدنيا في وشها وتقع من طولها

سأاااااره وجرا عليها حسام وامه وراه قلبه كان بدق زي دقه الساعه وبسرعه شديده وهو
بحاول يفوقها وصرخ علي الشغاله تجيب ليهو عطر وجرت الشغاله جري عشان تجيب العطر
وماهي الا ثواني وكان العطر في يد حسام وبقي يفوق فيها ووين لحد ما فاقت وفتحت عيونها
في شنو انا حصل لي شنو ولا حاجه حبيبتي ولا حاجه وشالها ومشى بيها علي السرير
وختاها وبقي ماسك يديها وهو بقول انتي حسيتي بشنو ... ما عارفه فجاءه بقيت ما شايفه
قدامي ... سلامتك يا بتي ... الله يسلمك يا خالتو. ان شاءالله خير ما تخاف يا ولدي .. كيف ما
اخاف دي الغلا كله ... الله يخليكم لبعض قولو امين امين يارب ومشي جاب قاس ليها
ضغطها ولقاه ما بطل بس اصر انه يوديها المستشفى عشان يطمئن عليها هو خايف انها
تكون انتكست ولا المرض حقها ما عارف كيف كان بفكر بس دا الجا في رأسه

بس هي ابت لكن كيف ترفض وحسام فوق راسها بنقنق ليها عشان يمشو يطمنو وفعلا مشو
علي دكتورها وهناك الدكتور كشف عليها وبعدها اتلفت علي الممرضه انها تاخذ عينه من
الدم عشان يحللوها وجات الممرضه وأخذت العينه وحسام ماسك يدها وهي غمضت عيونها
عشان كانت بتخاف من منظر الحقن من يومها خوافه وبعدها الممرضه قالت ليهم ساعتين
ونتايج التحليل بتطلع وقام طلع بيها ومشو علي الكافيتريا وقعدا ومشى جاب ليها عصير
وهو جاب ليهو قهوه وقعدو يشربو وكل شويه يسألها حبيبتي حاسه بشي ... لا يا عمري انا
تمام ... حلو ... وياخذ شفته من القهوه ويرجع يسألها حبيبتي حاسه بشي لا يا قلبي
مافيني شي ... حلو ويرجع ياخذ القهوه وياخذ شفته ويرجعها ... ويرجع يسألها حبيبتي
حاسه بشي لا يا عيوني انا كويسه ... حلو ويرجع ياخذ القهوه وياخذ اخر شفته
منها ويرجعها حبيبتي حاسه بشي حسام حرام عليك مالك انت
الليله عزبتي والله والله والله والله انا كويسه حلو حبيبتي بس قلقان عليك ... ما تقلق يا
عمري انا تمام التمام ... مسك يدها وباسها وقال ليها انا لو ما قلقت عليك انتي اقلق علي
منو يعني انتي ما عارفه معزتك جواي قدر شنو ختت يدها التانيه فوق يده وقالت ليهو
عارفه والله وانت كمان في قلبي قاعد ومتربع يا سلام عليك وعلي ريدتك والله يخليك لي
يا عمري وفضل يتغزل وهي مره تخجل ومره تضحك بس كانت مبسوطه وفرحانة شديد وهي
جنبه بنتسي الدنيا وما فيها ... حسام ح تكون معاي علي طول صاح ... رفع رأسه وقال ليها
بعد الحب دا كله اسيبك وامشي وين وطول ما انا عايش ح تكوني هنا وأشر علي قلبه وقال
ليها لو ما كفاك قلبي ح ادخلك بين ضلوعي وبقو يتونسو لحد ما قالت ساره ليهو يلا يا حسام
نمشي نشوف النتيجة بتكون طلعت طيب يا عمري يلا وساقها ويده في يدها ومشو
ودخلتهم الممرضه واول ما قعدو سال الدكتور بي لهفه اه يا دكتور وهو كان خايف يقول شي
عن مرضها وبقي زي المنتظر نتيجة تحليله هو وهنا الممرضه جات ومعها النتائج وشالها
وبقي يقرا فيها وهنا بقي حسام قلبه يدق ويده بترجف حسنت ساره برجفه يده وهي مسكاها

ربتت بيدها التانيه علي يده اتلفت عليها هزت ليهو برأسها وهي مبتسمه كانت انسانه قويه
ابتسم ليها وأتلفت لي الدكتور وقال اه بشر يا دكتور في حاجه بتخص مرضها طلع نضارته
وخت الورق وقال ليهو انا صراحه كنت شاكي بشي بس حبيت أتأكد من التحليل والتحليل
أثبت شكى ... هنا قلبه وقع من رجوله... بس الدكتور قال ليهو لازم تدخل المستشفى فوراً
.... بلع ريقه بصعوبه ووشه اتغير هي حسيت بان في حاجه شددت علي يده بقوه لمن هو
حسي بيها اتلفت عليها وابتسم ابتسامه عشان يطمئنها وبعد لحظه من الصمت اتكلم حسام
وقال لي الدكتور خير يا دكتور في شنو وانت شاكي بشنو بالضبط بعد الاشعه المقطعية ح
اقدر اتكلم معاك وأتكلم مع الممرضة انها تدخلها علي الفور علي الاشعه ولاحظت ساره
علي التوتر الحاصل ولأنها ما فاهمه هم بقولو شنو بقت تقول ليهو في شنو يا حسام بقول
ليك شنو الدكتور .. اتلفت عليها وقال مافي شي اطمني يا عمري بس هم عاوزين يعملو ليك
أشعه وتحاليل عشان يطمئنو بس ما اكثر من كذا وكان يحاول يطمئنها وهو محتاج اصلا لي
البطمنو بس ساره عرفت انه في حاجه بس حبت تبقي عاديه عشان هي حاسه انه حسام
مجرس اكثر منها رغم انه هو ما ظهر ليها بس هي عارفه وجات الممرضة وساققتها ومشى
حسام معاها وجهازها وهو ليسو برضو عشان يدخل معاها ودخلو وعملو الاشعه وبعدها
جات مارقه وهنا دخلوهم غرفه ورقدوا وطلع بعد ما استأذن عشان يمشي يكلم امه ويرجع
واول ما طلع انفجر بالبكاء كان خايف من البقولو ليهو الدكتور ومسح دموعه ومشى عشان
يقابل الدكتور بعد ما اتصل بي امه ولمن وصل ليهو قال ليهو خير يا دكتور الاشعه فيها شنو
..... للأسف يا مستر حسام السرطان انتشر في الغدد اللمفاوية والطحال ... رجع لوراء
واستند مع الحيطه وانهار الدنيا بقت سوداء قدامه طلع وهو ما عارف يعمل شنو ولا يقول
شنو بس لازم يكون قوي ويدعمها اكثر لانه دا الوقت ال هي محتاجه ليهو فيهو. قعد في
الكرسي وخاتي يده في رأسه ومسافه وهو علي نفس الوضع لحد ما جاته امه تجري واول ما
شافته مشت عليه وهي دمعته علي خدها البت لسه صغيره كَر علي امي شفتي الحصل علي
ليه يا امي اي حاجه بحبها بتروح مني ليه يا امي ليه استغفرالله يا ولدي استغفر ربك
.... استغفرالله وحضنته عليه وقعد يبكي وهو في حضن امه ولمن هدا شويه قام مشى
دخل علي ساره اول ما شافته عرفت من وشه الكان ما مفسر ساره كيفك هسي ... انا
الحمد لله يا خالتو وقعدت جنبها ومسكت يدها وحسام واقف بعيد ومنزل رأسه عاينت ليهو
وقالت حسام حسام حسام اه حبيبي نعم ... تعال مالك واقف بعيد لالالا ما واقف بعيد
ولا شي بس وسكت ... بس

طيب شنو قال ليك الدكتور ... سكت ما رد ... قال اني ح أموت صاح ... لالالا ما تقولي كذا
بعد الشر عليك وجاء جاري عليها ومسك يدها وقال ليها ان شاءالله يومي قبل يومك ... رفعت
يدها وقفلت ليهو خشمه وقالت ليهو بعد الشر عليك يا حبيبي ... يلا يلا بطلي دلح وقومي
انتي مافيك شي ههههه ياريت أقوم وأجري واعمل كل النفسي فيهو بس انا حاسه انا
عضمي مكسر وحتى ما قادره امشي ... ليه حبيبي انتي مَش هسي كنتي كويسه لمن كْنَا في
الكافتيريا ما عارفه والله بس لمن سبنتي ومشيت واتاخرت علي كنت ناويه أجيك بس ما
قدرت أقوم ... بعد الشر عليك يا عمري دا بس من تأثير الادويه البتاخدوها يمكن برضو

بس ما قلت لي الاشعه فيها شنو مافيه حاجه هو قال دا امر طبيعي لازم يعملو عشان يشوفو تتطور المرض والحمدلله لقو مافي اي شي انتي بس ارتاحي وفجاءه مسكت خشمها هو اتخلع عليها وقال ليها مالك حبيبتي حاسه بشنو ما عارفه حاسه بانتي عاوزه ارجع ... دا احساس طبيعي ... وجرا جاب السله بس ورجعت العصير الشربته كله وبعدها جات الممرضه أدتها علاجات ورقدت نامت بعدها من تأثير الادويه والام مشت البيت عشان تجيب شنتطتها لساره عشان الغيارات وحسام قاعد قصادها ما سابها نهاي

ومرت الأيام والحاله بقت تسوء اكثر وكل ما أهلها يكلموها وما تقدر ترد يكتب حسام ليهم بالواتس ويقول ليهم انها كويسه بس الدكتور منع منها استخدام الأجهزة لانها ضاره مع العلاجات البتاخذها وكل يوم بمر وحسام معاها ما فارقها نهاي بدخلها الحمام بحميتها وما بخلي ممرضه تدخل عليها عشان تساعدوا وكان بتوجع كل ما يلقي شعرها نازل في المخده ودمعته ما وقفت نهاي

وفي يوم كالعاده دخلها الحمام ولبسها وجاء رقدوا ولبسها طاقية وهي بس تبتسم ليهو وكل ما كان المرض ينهش في جسمها كل ما كانت ابتسامتها بتكبر عشان ما تحسس حسام بوجعها وكانت تتقلب علي الجهه الثانيه من السرير وتعضي علي المخده من كتر الالم وفي نفس اليوم دا اشتد عليها شديد لدرجه بقت تغيب عن الوعي احيانا وترجع حسام بقي قلبه ما مطمئن وهو شايفها كدا مشي للدكتور عشان يسأله ليه العلاج ما جايب نتيجة نسي انه دكتور بس كان منزكر ساره والالم البتشرع بيهو

مستحيل يا دكتور مستحيل للاسف المرض رجع بقوه وهاجمها بشده ومسك الكبد والغدد اللمفاوية وفي رأي العلمي ما هي الا مسأله ايام او ساعات ساعات او ايام ويفقدها لا مستحيل نزل عليهو الكلام زي القنبله وما قدر يستحمل وقع حسام من طول المره دي في كل مره كان بتشجع ويقول ح تعدي زي ما عدت المره الفانت بس المره دي رجع هاجمها بطريقه شرسه وعلي طول تم إسعافه ولقو الضغط مرتفع جدا حاولو يظبطو ليهو الضغط ومر اليوم كله وهو راقد واول ما حس انه قادر يقيف علي حيله مشي ليها لقاها ممده طويل في السرير وشبهه ما ظاهره من السرير من الضعف والهزل ووصل وزنها لي ٣٣ وشعرها كله انتهى الا كم شعره بالأطراف ملامحها اتغيرت مشي عليها ووقف جنبها حست بيهو وفتحت خشمها بالقوه وقالت حسام انت جيت يا حبيبي ... ايوه يا عمري انا جنبك اطلبي تدللي بس نفسك في شنو اه يا عمري نفسي اشوف امي امي وسكتت وغابت عن الوعي تاني اتلفتت عليهو الام وقالت ليهو قال ليك شنو الدكتور عض علي شفايفه وقال ليها مسأله وقت يا امي ... لا حولا ولا قوه الا بالله خلاص سفرها يا ولدي تشوف امها سفرها طالما مافي امل و بقت تبكي نزلت دمعته زي الجمر علي خده طلع ومشى للدكتور وكلمه بانه يسفرها للسودان ... وافق الدكتور وفعلا طلع منه وقطع تزاكر ليهم عن طريق الانترنت علي اول

رحله والسفر كان بعد اربعة ساعات مشي كلم امه وطوالي مشت جهزت شنتط ساره وشنطتها وشنطه ولدها ومشت علي المستشفى واتصلت علي حسام عشان ينزل فقال ليها انه ح يمشي بالإسعاف لحد المطار وطلب منها انها تمشي قبله عشان تعمل الإجراءات حقت المغادرة وتنتظره و اتحركت الام بعد ما اتصلت علي احمد تكلمه بسفرها وعشان يجيها المطار وفعلا احمد دور عربيته ومشي واتصلت هدي علي نزار وأخوها وكلمتهم انه يجيبو اهل ساره المطار لانه مافي وقت دخلها حسام الحمام وبعدها لبسها ولف ليها راسها بالطرحه وونزل تحت ولبسها جزمته وقام قعد جنبها منتظر يجو ياخدوها وهي في كتفه قالت بصوت تعبان نحنا ماشين وين ح نمشي عند ماما محاسن ... بالجد يا حسام ... اي حبيبتي انتي مَش طلبتي انك تشوفيها اه انا ح أوديك ليها يااااا الله لك الحمد والشكر بس تفنكر يا حسام ح أشوفها ... وهو دموعه نازله وبقول ليها ح تشوفيها ان شاءالله انتي بس قولتي يارب ... يارب يارب يارب يارب وهو يبكي وهنا جات شرين ووسام يزورها كالعاده كل يوم والتائي كانوا بجو عليها واول ما شافوهم كدا جرت عليها شرين ودموعها نازله ساره ساره فتحت عيونها وهي لِسَّه مسنوده علي كتف حسام وقالت شرييين انا ماشه عند امي وكنت خايفه ما الحق اشوفك الحمدلله انك جيتي الحمدلله الحمدلله وان شاءالله تصلي بالسلامه وتشوفيها ... ادعي لي الحق أشوفها لي اخر مره وسام ما قدر يسمع انينيها وهي بتتكلم كدا طلع علي طول وقف برا ... وبقي يدعي ليها من جوا قلبو وهنا جاء طاقم من الأطباء ومعاهم مساعدين واشرفو علي حالتها وهم بنقلوها وركبت الإسعاف معاها حسام ووسام وشرين لحقاهم بعربيتهم واول ما وصلو المطار طوالي دخلو ولقو الام واقفه ومعاهها احمد ومشي عليهو احمد وبقي يدعي ليهو وودعتهم شرين ووسام واحمد وركبو الطياره ومشو

والوقت كله هو مرقدها في حضنه زي الإبو الحاضن بته



امي اتصبري مالك شفقانه كدا خلاص الطياره قربت تجي خالد جيب الجماعه وتعالو ح ننظرها عند الطياره برا ليه ما نننظرها هنا هم لمن ينزلو بجو طالعين براهم بس المره دي صعبه في شنو يا نزار جيتك لينا كدا فجاءه وإصرارك علي الكل يجي المطار دا فيهو أنا ... نزل رأسه لتحت وقال ليهو بصراحه خالتي اتصلت علي وطلبت مني كدا ... ليه في شنو ساره حصل ليها شنو بالضبط والله ما عارف أقول ليك شنو ..نزار قول البتعرفو ساره ماتت ... لا بس الدكاتره قالو ماهي الا مسألته ساعات دا علي حسب كلام خالتي خالد اختل توازنه وقرب يقع شعرت سماح الكانت بتراقب فيهم من بعيد وهي قاعده مع امها وحبوبتها قامت مشت عليهم ولمن وصلت ليهم وشافت حاله خالد بقت تقول في شنو يا خالد

الجزء ٣٠

كل الحلة طلعت وراء جنازه العروس طلعت في موكب مهيب مافي زول ما كان يبكي علي ساره وحسام عكبر عشرين سنه منظره كان بقطع القلب والحبوبه توصف وتبكي وتقول يا حليلك يا بت امي يا حليلك يا ساره احبيبي يا قلبي المحروق عليك وعلي شبابك ما لسه صغيره وجاهله الما لحقتي اتهنيتي ولا وتكورك اخ ووووووووب ووووب ووووب ووووب ومحاسن اتجرت كثير بس بعد ما كفتت بنتها فعدت في مصلايتها وشالت سبحتها وبقت تقول يارب برد قلبي برد قلبي يا الله وسماح تصرخ وتخطب في نفسها والناس تمسك فيها بس هي نهاي ما كانت متصبره وكلهم في الشارع وراء الجنازة وام حسام واخواتها وأهل رشا وهناء تبكي كانت صحبتها وأختها وكل شي ليها في الدنيا ولؤي بس دموعه نازله واول ما شاف سماح جاريه وسط الرجال عاوزه تمسك السرير جرا وراها ومسكها وهي تصرخ فكني ابعد عني بقول ليك ابعد انا ما بخلي اختي براها ما بخليها بمشي معاها خلاص يا سماح كفايه كذا حرام عليك وجاها شيخ الجامع وقال يا بتي استغفري ربك البتعمليهو دا حرام ...يااااا ناس انتو ما حاسين بالنار ألقي قلبي وبقت تبكي بكاء يوجع القلب ... جاتها الحبوبه تتعزز ومسكتها جرتها عليها وبقت تبكي وتوصف وتقول الليله ما يوم الفراق يا بتي الليله ما يوم السواد الليله ماشه وين مننا ماشه وين وساييه حبوبتك يارب صبرني يارب ومشو الرجال بالجنازة وودعوها أهلها الوداع الأخير الوداع الما منو رجعه ولا مفر

قال تعالي { كُلُّ نَفْسٍ ذَائِقَةُ الْمَوْتِ وَإِنَّمَا تُوَفَّوْنَ أُجُورَكُمْ يَوْمَ الْقِيَامَةِ فَمَنْ زُحِرَ عَنِ النَّارِ وَأُدْخِلَ الْجَنَّةَ فَقَدْ فَازَ وَمَا الْحَيَاةُ الدُّنْيَا إِلَّا مَتَاعُ الْعُرُورِ }

ومشت ساره لمثاها الأخير



بعد مرور شهر

حبوبه خالتو دي تعبانه شديد لا اكل زي الناس وإذا فطرت لا بتتعدا ولا بتتعشي كذا ح تموت نفسها اعمل شنو يا رشا يا بتي تعبت معاها شديد ساره قاطعه فيها الله يرحمها

ويغفر ليها بس الحي ابغي من الميت وكدا هي بتعترض علي امر الله... لا اعتراض في امر الله خلوها انا بتمشي ليها وقامت علي حيلها ومشت علي بتها لقتها راقده ووشها علي الحيط قعدت جنبها في السرير محاسن محاسن يا بتي قومي آكلي ليك لقمه البتعلمي فيهو دا ما صاح عايني لبتك سماح القافله علي نفسها لا شغل بتمشيهو لا بتقابل زول ولا حتي اكل المانت بتك ودي برضو بتك لو حصلت ليها حاجه انتي البتموتي ومحاسن دمعتها جاريه وموجوعه ما قادره تتكلم وكانت ناسيه سماح نهاي لا شايفها ولا بتمشي عليها كل واحد فيهم في اوضه وقافلها عليه لا بقابلو زول ولا بتكلمو حتي مع ناس البيت ورشا ثقيله ما قادره عليهم قومي يا بتي قومي الحقي بتك قبل ما تحصل اختها قامت الام مخلوعه من الكلمه مجرد ما سمعتها من امها انها ممكن تفقدها خافت وقلبها وجعها ما بقي عندها غيرها هي الفضلت اول ما شافت الحبويه بتها قامت علي حيلها حمدت ربها مشت محاسن علي اوضه سماح وساره ما كانت دخلتها من العزاء واول ما فتحتها وشافت سرير ساره فاضي كانت عاوز ترجع ما كانت قادره تشوفه وهو فاضي بس لاحظت لي سماح الكانت قاعده في وسط السرير وسانده ضهرها علي الحيط ومنزله راسها تحت بين رجولها وجعها منظرها وهي لابسه اسود في اسود مشت عليها سماح سماح سماح رفعت راسها وتلقي امها وهي عارفه ان امها ما بتطلع من الاوضه الا للحمام امي وقامت علي حيلها وجرت عليها ومجرد ما حضنو بعض بقو يبكو بي اعلي صوتهم لمن خالد كان عاوز يدخل ليهم بس الحبويه مسكته من يده وقالت ليهو خليههم يبكو عشان يرتاحو ويشفو اصلو الحزن زي المرض بياخذ وقت وعلاج عشان يروح وعلاج الحزن البكاء واكيد ح يرتاحو هم الاتنين

ساره يا امي... الله يرحمها الله يرحمها نحن ما ح ننساها بس الحياه ح تستمر ونحن لازم نتماسك ونتقوي بي بعض عشان نقدر نعيش وهنا يسمعو صوت صراخ رشا يقومو يجرؤ ويطلعو برا يلقوها بنتوجع وخالد ما عارف يعمل شنو سماح تجري تحضر الشنطه وخالد يمشي يجيب امجاد وشويه والكل كان في المستشفى وجات امها وسلمي وشويه ويسمعو صوت البيبي يباركو لي خالد ويبكو وجات الممرضه وقالت ليهم بت تنربي في عزكم ان شاءالله ... بت يا امي جاتنا ساره جاتنا ساره ومسك امه وقعد يبكي

وتاني يوم طلعت رشا وساره الصغيره البيت واصرت رشا تنفس في بيتها بعد ما كانت مجهزه غرفه في بيت امها عشان الولاده بس لمن شافت الفرحة دخل البيت بقدم ساره الصغيره ما حبت تحرمهم منها وطوالي كانت شايلها محاسن وكان ربنا عوضها بساره الصغيره والكل مبسوط بساره وجات محاسن وقالت لي رشا وخالد انتو رجعتو لي روعي بساره ربنا يخليكم لي وما يحرمني منكم وبسببكم اسم ساره ما ح يتقطع من البيت الله يجعلها من البارين ان شاءالله.... امين يا رب العالمين



يا ولدي انا ما بقدر اسبيك هنا وامشي انت ما شايف نفسك عامل كيف لا شعر بتحلقو ولا دقن بتحلق وكل يوم ولد خالتك يجيبك من المقابر دا ما ممكن نهاي كلنا ح نموت وانت لو بتحبها بجد كنت ح تتمني ليها الموت لانه راحه ليها من العزاب الشافتو اخ اخ يا ساره خليتيني براي ومشيتي هي وعدتني انها ح تكون معاي دايم في الحلوه والمره بس هي ما نفذت وعدها ومشيت ... حسام دا امر الله ومافي مفر منه وكلنا ح نموت ولازم تعرف انه الموت الحاجه الوحيده البتولد كبير شديد بس مع الأيام بصغر وانت إنسان واكيد ح تنسي ... انسي ساره دا المستحيل بعينه ... طيب ما تنسي بس طالما انت بتحبها ليه بتعزبها ... امي انتي بتقولني شنو اعزب نفسي ولا اعزبها ... لا يا حسام بتعزبها لانه ألبكاء بعزبها في قبرها وعشان تريحها وتوسع عليها قبرها ادعي ليها او اعمل ليها صدقه جاريه او اقرأ ليها قرآن دا البنفعها بعد كدا وفجاءه يسمع صوت القران الكان بشغلو جده طوالي في الراديو قال الله تعالى: ((يَا بُنَيَّ أَقِمِ الصَّلَاةَ وَأْمُرْ بِالْمَعْرُوفِ وَانْهَ عَنِ الْمُنْكَرِ وَأَصْبِرْ عَلَىٰ مَا أَصَابَكَ إِنَّ ذَلِكَ مِنْ عَزْمِ الْأُمُورِ)) الايه اثرت فيهو شديد مسح دموعه وقام علي طول شال مفتاح عربيته وطلع وطول الطريق كان بقیف ويوزع علي العيال قروش بس الايه لسه في باله بعدها فكر وقرر واول شي فكر فيهو اهل ساره ولمن وصل الصحافه نزل وفتح الباب ودخل لقي الحبويه وخالد قاعدين في الحوش والحزن ماليهم بس شايلين الصبر اول ما شافو فرحو بيهو كان بزكرهم بالغاليه وكمان من التالته ما شافو لانه كان قافل علي نفسه دا كلام هدي لمن جات زارتهم ... قالت الحبويه اهلاً بريحه الغاليه تعال يا ولدي وسلم عليها وقام خالد علي حيله وسلم عليها بالاحضان وقام قعد جنبهم ... وهنا جات محاسن مع بنتها طالعين ومحاسن شايله ساره في حضنها سلمو عليه وقعدو جنبه أمسك يا حسام وسمي دي بت منو بس ما تقولو رشا ولدت اي يا سيدي. وجبنا ساره فرح حسام لمن دمعتة نزلت وشالها وباسها علي جبينها وقال مبروك عليكم وان شاءالله تتربي في عزكم ويرحم عمتها ويطول في عمرها قولو امين امين يارب وقام رجعه لي خالته محاسن وقال ليهم يا جماعه انا قررت اعمل جمعيه خيريه لمرضي السرطان وح اسميها علي اسم المرحومه وتبقي صدقه جاريه علي روحها الكل فرح وبارك ليهو وقالت الحبويه مشاءالله تبارك الله. دا كلام عين العقل يا ولدي وان شاءالله صدقه مقبوله . وحكي ليهم عن التفاصيل

دا كله فكر فيهو وهو في الطريق

.....

ومرت الأيام والشهور والكل شغال في تأسيس الجمعيه والحزن بقي يخف شويه شويه وخاصه وساره كل يوم بتكبر وبتملا البيت فرحه

وفعلا قدرو يأسسو الجمعية الكانت بتوفر لكل الناس المريضه بالسرطان احتياجاتهم وساعدت كثير في علاج المرضي لحد مافي يوم جاء حسام وقرر انه يقرأ من جديد في بريطانيا اي هو دارس أسنان بس ح يدخل عشان يتخصص في علاج الأورام والكل أيده خاصه اهل ابوه بس اهل امه نهاي ما شجعوه وهو اصر وقبل ما يسافر عشان يدرس مسك الجمعية لخالد وسماح عشان يكونو مسؤولين عنها وهو ح يمولهم وقبل ما يسافر مشي علي المقابر ووقف جنب قبرها وقرأ ليها الفاتحة وقال كنتي الحب وما ذلتي الحب ورغم انه الحب قال كلمته وجمعنا مع بعض بس كانت كلمه القدر اقوي من كلمه الحب وبدل ما يبقي للحب كلمه بقي للقدر كلمه بس انتي ح تفضلي جواي وبين ضلوعي والحب علي حرمان من بعدك انا مسافر يا عمري ح ابدأ ادرس من جديد واتخصص في نفس المرض عشان أعالج كل مريض وما اخلي زول يفقد حبيبه لا اب ولا ام ولا اخ ولا خت ولا زوج لازم يا عمري المرض دا يلغو ليهو علاج نهاي عشان الناس ما تتوجع ولا تتألم من الكيماوي

ساره انا ماشي وسايب روحي معاك ولحد ما نتلاقي واجيك وادفن جنبك ما ح أقول ليك الوداع بس ح أقول ليك الي لقاء غريب بأذن الله يا روحي ومشني وساب روحي معاها ورجع علي الصحافه ودعمهم علي امل اللقاء قريب والكل بكى لفراقه وسافر حسام عشان يتعلم من تاني وجواه امل كبير انه ح يظهر علاج جديد وهو في الطياره بقي يقرأ في الجريده وهنا يشوف الخبر

اكتشف علماء بريطانيون علاجاً جديداً يمكنه قتل الخلايا الجذعية السرطانية في جسم الإنسان، وهو ما يمكن أن يشكل تطوراً كبيراً في مجال الجهود الرامية لمكافحة مرض السرطان وإيجاد العلاج النهائي له.

والعلاج الجديد الذي تم الإعلان عنه في لندن هو عبارة عن بروتينات معدلة وراثية تقوم باستهداف "الخلايا السرطانية الرئيسية"، وهي الخلايا التي تقوم بإنتاج خلايا جديدة مماثلة في الجسم، وبالتالي تقوم بنشر المرض الخبيث وتقاوم العلاج بما يؤدي في النهاية إلى وفاة المريض.

وقالت جريدة "صنداي تايمز" التي نشرت تقريراً عن الاكتشاف الطبي الجديد إن النتائج الأولية للعلاج أظهرت أن العقار المسمى (TR4) تمكن من قتل خلايا سرطانية إنسانية تمت زراعتها في أجساد فئران، فيما تنقل الصحيفة عن العلماء القائمين على هذه البحوث قولهم إن النجاح في قتل الخلايا السرطانية سوف يمثل "نقطة نوعية" في علاج مرض السرطان.

وقال البروفيسور في "أمبريال كولج لندن" أجامينون ايبينيتوس: "لقد أخذنا أحشاء إنسانية مصابة بسرطان في المبيض والثدي، ومن ثم قمنا بزراعتها في فئران، فتسببت بأورام فظيعة جداً، لكن هذه الأورام اختفت خلال أيام بفضل العلاج الجديد".

وأضاف البروفيسور: "إذا تمكنا من التخلص من الخلايا السرطانية، فهذا سوف يمثل تطوراً رئيسياً ومهماً في الكفاح ضد المرض، الخلايا السرطانية هي الخلايا التي نريد أن نقتلها في جسم الإنسان، لكنها بطبيعة الحال خبيثة جداً وتقاوم الأدوية والعلاجات".

لكن "أمبريال كولج لندن" الذي يعتبر واحداً من أهم مراكز البحوث الطبية في العالم قال إن التجارب التي أجريت على الحيوانات كانت مشجعة، إلا أنه "لا يزال من المبكر الحديث عن التوصل إلى علاج يقتل الخلايا السرطانية في جسم الإنسان".

وأشارت الكلية الطبية إلى أن الخطوة المقبلة هي إجراء تجارب إكلينيكية على أجسام بشرية، حيث سيتم إخضاع ٤٠ مريضاً من مرضى السرطان لهذه التجارب التي ستكون الأولى من نوعها على البشر وسوف تحدد بصورة أكبر درجة نجاحها.

ويعتبر مرض السرطان واحداً من أسوأ الأمراض القاتلة حتى الآن، على الرغم من الجهود الكبيرة التي يبذلها الأطباء والعلماء من أجل التوصل إلى علاج له.

طبق الجريده وغمض عيونه وقال الحمد لله واتجدد الأمل عنده ودي البدايه وان شاء الله
النهايه تكون فيها الشفاء الكامل لكل مريض سرطان



وبعد مرور عامين وحسام لم ينزل فيها السودان ولا مره وكان مشغول بدراسته والهدف الجا
عشانه وامه بتدعمه فيهو والعم احمد كمان بدعمه ولحد الان لم يكتشف حسام العلاقه البين
امه وعم احمد

وفي يوم الباب دق مشت سماح تفتحه تلقي ليك زول وسيم شديد طول وعرض كان فيهو شبه
كبير من حسام اهلاً وسهلاً عاوز منو دا بيت ساره بلعت ريقها وقالت اي هو

بيتها بس هي الله يرحمها الله يرحمها انا وصلني الخبر بس اصريت انه لمن انزل
السودان لازم اجي أعزي أهلها مرحب بيك افضل وجاء خالد يشوف الراجل الداخلى
عليهم وهنا يسلم عليهم ويقول ليهو انا وسام اخو صحبه ساره اتلفت يشوف هناء وشرين
وينهم ما دخلو كانوا جاين وراه وهنا شرين دخلت ومعها هناء ودخلتهم سماح الكانت
مبسوطه انه ساره طلعت محبوبه عند الناس والناس بتجي من بعيد عشان تعزي فيها

وقعدو قعدتهم وطلعو وبعد يومين جات هناء لسماح واول ما شافتها قالت ليها تعالي عاوزاك
في موضوع ... خير يا بت مالك نفسك قايم كدا وقعدت هناء وجرت سماح من يدها
وقعدتها جنبها وقالت ليها يابت انتي عملتي لولد خالتي شنو الولد جاني بيك وجنني عشان
أجيك واكلمك بانه معجب بيك شديد وعاوز يتعرف عليك واخير ابنتسم القدر لسماح وبعد
معناه رضت تلقيهو وبعد اللقاء اتطورت العلاقة وجاء أتقدم ليها والكل رحب بالفكره وباركو
ليهم وهي حاليا مع وسام وشرين وامها بشترو الشيله من دبي لانه العرس بعد ثلاثه شهور
ورغم انه دا زعل سلمي ولؤي بس في النهايه سلمي ما عندها نصيب في بنات اختها ورضت
بالأمر الواقع وتم الزواج بطريقه بسيطه جدا ودا كان طلب سماح وبعدها سافرو لمقر إقامتهم
في لندن ومرت الشهور وحملت سماح والحبوبه قالت ليهم انو يرسلو ليها زياره عشان
تنفس سماح وفعلا سافرت الحبوبه ومحاسن وبعد وصولهم بيومين ولدت سماح وجابت توام
ولد وبنت واصرت تسميهم ساره وحسام ولاتها كانت تعرف مدي حب اختها لي حسام
حبت تربط الاسمين معا طول العمر وكان حسام دائما يزورهم ومازال علي حاله زاهدا في كل
شي كان همه تعليمه وأبحاثه و زكرياته مع ساره حب حياته



الي كل روح فارقت الحياه بسبب السرطان والي كل مريض يعاني من ويلاته والي كل مريض
يعالج الان بالكيماوي والي كل طفل انحرم من طفولته وأنهك السرطان جسده البرئ والي كل
انثي تساقط شعرها بسببه وفقدت جمالها والي كل اب انحرم من ابنه ولا بنته والي كل ام
اتوجعت علي فلذات أكبادها والي كل اخت اتحرمت من اختها ولا أخاها ولاصديق فقد صديقه
والي كل زوج وحبیب انحرم من زوجته وحبیبته ورفيقه دربه اهدي قصتي هذه واتمني من
كل قلبي الشفاء لكل مرضي السرطان

ودمتم في رعاية الله وحفظه

..... النهاية

